

傅与砺 集诗文集

傅
若
金

文硕阁

wenshuoge.com

目录

关于我们	3
提要	5
傅与砺诗集原序	6
傅与砺诗集卷一	8
傅与砺诗集卷二	11
傅与砺诗集卷三	27
傅与砺诗集卷四	40
傅与砺诗集卷五	56
傅与砺诗集卷六	73
傅与砺诗集卷七	89
傅与砺诗集卷八	97
傅与砺文集原序	114
傅与砺文集卷一	115
傅与砺文集卷二	119
傅与砺文集卷三	122
傅与砺文集卷四	126
傅与砺文集卷五	132
傅与砺文集卷六	138
傅与砺文集卷七	142
傅与砺文集卷八	145
傅与砺文集卷九	147
傅与砺文集卷十	150
傅与砺文集卷十一	154
附录	158

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

傅与砺诗文集 别集类五【元】

提要

臣等谨案傅与砺诗文集二十卷元傅若金撰若金字汝砺改字与砺江西新喻人幼力学为同郡范梈所知得其诗法虞集宋褰以异材荐之台省馆阁交称无异辞佐使安南归除广州文学教授所着诗集有南征稿使还新稿牛铎音等编范虞诸人皆尝为之序至正间其弟若川彙钞之名曰清江集至明洪武中又刻其文集十一卷附录一卷今诗文总为一编不知何时所并若金当元极盛之时亲承宿老指授故其诗极有轨度而文亦和平雅正无棘吻螫舌之音虽不能雄视词坛然亦可以副诸家之垒矣乾隆四十六年三月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

傅与砺诗集原序

傅与砺诗集原序

孔子曰诗可以兴可以观可以羣可以怨朱氏释曰兴者感发志意观者考见得失羣者和而不流怨者怨而不怒四者之事不同而其序宜有先後盖见他日论诗礼乐则首曰兴於诗诗者志之所之以其志感人之志者孰不足以有所感发哉然则兴者岂非居先乎感入之道莫尚乎声音入焉寂然泯然忽而歆起震奋动荡沦浹入之深而化之敏者斯其效曷从而至哉古人云声音之道与政通夫声者合天地之大气轧乎物而生焉人声之为言又其妙者则其因於一时盛衰之运发乎情性之正而形见乎辞者可觐已故曰治世之音安以乐其政和乱世之音怨以怒其政乖亡国之音哀以思其民困正得失动天地感鬼神莫近於诗夫诗道岂不博大哉要其归主于咏歌感动而已斯义也司马太史尝闻之矣其言曰三百篇孔子皆弦歌之以合韶武雅颂之音夫既合之则当时存什一而去千百必其不合者也深矣哉声音之於政也圣人盖取之矣新喻傅汝砺妙年工诗自古今体五七言皆厪厪焉力追古人有唯恐不及意间示余以所着编曰牛铎音者读之连日不厌闻其音而乐焉以为诚识所尚者因揭孔子之言诗徵以师说遂演绎以告之天历二年四月一日范梈书于百丈山房

自至元建极大德承化天下文士乘兴运迪往哲稍知复古至于诗去故常絶模拟高风远韵纯而不杂朔南所共推而无异论者盖得江西范德机焉德机没後又得其乡傅与砺焉德机盛矣余每读与砺诗风格不殊神情俱诣如复见德机也然德机七言歌行胜与砺五言古律胜余亦在伯仲之间而德机得盛名时年已过与砺使与砺及德机之年不知又当何如也天下文章莫难於诗刘会孟尝序余族兄以直诗其言曰诗欲离欲近夫欲离欲近如水中月如镜中花谓之真不可谓之非真亦不可谓之真即不可索谓之非真无复真者惟德机与砺知之及此言之及此得之及此故余倾倒於二君焉而德机已矣余无能为矣庶几犹有若与砺者他日足为学诗者之依归也傅君初字汝砺余以天下同其姓字者衆也而易之曰与砺且以与与汝声相近而便於改称也元统三年七月辛巳朔揭傒斯序诗之为学盛于汉魏者三曹七子至於诸谢侪矣唐人诸体之作与代终始而李杜为正宗子美论太白比之陰常侍庾开府鲍参军极其风流之所至赞咏之意远矣浅浅者未足以知子美之所以为言也崔颢人品非雅驯太白见其黄鹤之篇自以为不可及至金陵而後彷彿焉其高怀慕尚如此谁谓其恃才傲物者乎求诸子美之所自谓盛称文选而远师苏李咏歌之不足者王右丞孟浩然而所与者岑参高适实相羽翼後之学杜者多矣有能旁求其所以自致自得者乎是以前宋之盛亦有所不逮矣国初中州袭赵礼部元裕之之遗风宗尚眉山之体至涿郡卢公稍变其法始以诗名东南宋季衰陋之气亦已销尽大德中文章辈出赫然鸣其治平集所与游者亦衆而贫寒相望发明斯事者则浦城杨仲弘江右范德机其人也杨之合作吴兴赵公最先知之而德机之高古神妙诸君子未有不许之者也其後马伯庸中丞用意深刻思致高远亦自成一家观者无间言而进士萨天锡者最长於情流丽清婉作者皆爱之而与前之诸公先後沦逝识者然後知其不可复得也德机之里人傅君与砺始以布衣至京师数日之间词章传诵名胜之士无不倒屣而迎之以为上客台省馆阁以文名者称之无异辞岂非以其风韵足以及於予所道诸君也哉予去国十年与砺自交趾使还以家贫亲老授南海文学以归嗟夫上

林千树岂无一枝以栖朝阳之羽哉而一官岭海之不厌何也前数年诸公相知者多散出於外今明良一廷无所忌讳清涧之蒲海湾之水不足以久烦吟咏也必矣书其别後稿如此迟其北还则沉郁顿挫从容温厚有可起予者何幸於余生亲见之哉作傅君与砺使还新稿序至正辛巳六月朔虞集伯生序

傅与砺诗集原序

傅与砺诗集卷一

钦定四库全书

傅与砺诗集卷一元 傅若金 撰杂着

清安堂赋为思南李经历作

夫何兹堂之静佳谿谷繚以窈深泉历除而细响树交户而緜陰世溷浊其汶汶咸役体而劳心爱顺时以息养况显敞而开襟羌怡寂以御烦谅君子之所庐感人生之长勤寒暑迭而相驱靡徇逸而非害孰忘患而恒舒虽燕乐其何伤将不见之是图庶依仁以自止洁吾秽而休居

敬业斋铭

惟兹生人均厥受命莫贵惟德莫尊惟性惟性如何万善斯全君子于学思罔或愆惟德如何有积乃大君子于学思罔或懈诗书六艺进退洒扫近思弗遗上達有道夙兴夜寐惟一乃心毋终食弗念毋閤室弗临毋若彼教奕鸿鹄是惑譬兹服田力乃有得圣或罔念亦之于狂孰曰予玩而圣之望敬之敬之远实还是基有节高山君子之仪

楚辞

楚渔父渡伍胥辞劒图歌

江有阻兮路有岐时将迫兮来何迟子弗渡兮我心悲既渡子兮我何以劒为吁嗟行兮子毋我疑

黄鹄歌为刘母王氏作

黄鹄孤飞兮伤其匹俦生则同巢兮冥处何求死宁敢爱兮孰将其雏山则有木兮隰有泉流翺飞何知兮惟饱以娛虽既羽翼兮将母来休毋诒母辱兮无使心忧

寄题袁氏具庆堂

高堂兮巍巍华采衣兮芳菲瞻父母兮壽岂兄弟翕兮孔【一作永】怀出则仕兮自公入则养兮于堂之中昊天兮福尔锡眉寿兮未已夫人兮自有美子曰子归兮将父与母

松涧引【并叙】

松涧引者为林氏子晋作也晋父信卿本中山人客游衡阳乐其土遂居焉信卿死晋复筑室其居之偏题曰松涧志其师之言也晋读书善鼓琴元统初过家上冢因北至京师无何思其所居即慨然别故旧而去为作琴操三叠以赠之

涧之水兮泠泠上有松兮郁青青嗟衡之居兮吾所宁胡淹留兮于帝京

涧之水兮扬清波上有松兮被女萝我啸兮我歌胡不归兮岁蹉跎

涧之水兮石楚楚上有松兮以风以雨筑吾居兮其下谁将归兮来吾与处

归来三曲送李建中

月皎皎兮河汉长黄鹄在天兮招我以翱翔天气凉兮夜未央援鸣琴兮托宫商商声作兮风撼撼归来兮天路杳渺不可以终极

月皎皎兮夜既寒白露下兮衣裳单南风一去兮何时还援鸣琴兮曲再弹曲再弹兮天地为秋归来兮清都之上不可以久留

月皎皎兮寒风作猿啾啾兮怨鸣鹤常恐秋遂为冬兮羣物以萧索援鸣琴兮忽不乐忽不乐兮思吾土归来兮山中之人不可以无父

芳草辞为杜若洲作

乘吾舟兮沅湘揽芳草兮朝行缤衆美兮在予怀灵氛氛【一作芬】兮不能忘进予舟兮极浦将谁思兮远者采杜【此下或有若字】兮葺蘅杂之兮宿莽羌姣服兮夷犹抚予带兮宜修櫂何充兮佩帙荃何化兮为茅沅何为兮汤汤湘何为兮浩浩满庭兮艾萧衆纷进兮谓予不好望洞庭兮楚之野路漫漫兮夕愁予思君子兮孰後來结芳菲兮吾谁与

芝草歌

元化顺兮日月昌至和蒸兮地发祥煜灵草兮贲斋房云缤缤兮流玉英五色烂兮昭文章何所徵兮德芬芳爰作歌兮着勿忘我君子兮思永臧

三言

滋之水奉题苏氏滋溪书堂

滋之水濬且长流安极沛洋洋 滋之涘德所履缤芬芳萃厥美 滋之水澹而文丰乃积淑後昆腾声诗播金石逾千祀永昭德

右四章章四句

五杂组

五杂组机上丝往复还城中儿不获已生别离 五杂组园中花往复还将雏鸦不获已贫去家

右二章章六句

四言

吉月美君子有德以壽也正月二十日壽揭学士

吉月之正日既阳止君子之生辰亦昌止天锡之德孔茂且植允善弗易君子之福
其善伊何如芬如芳如芬如芳于前人勿忘其福伊何如山如冈眉寿以康时君子之庆
庆维云矣亦施于天华之蘊矣亦被于人君子有言有斐其文允也令人德音振振 德音振振
民之正矣百禄既臻神之听矣饮我春酒寿考是承彼厦之安于木之凭曰有君子时邦家之
兴

右四章三章章八句一章章十句

东臯诗题长沙易君美存耕卷

瞻彼东臯每每其田孰其甸之维古之人 其田每每其稼縣縣日月以治厥有丰年
维田弗治维莠生之维心弗制维欲倾之 我思古人有播斯获子孙其承庶茂厥德

右四章章四句

傅与砺诗集卷一

傅与蛭诗集卷二

钦定四库全书

傅与蛭诗集卷二 元 傅若金 撰五言古诗

杂诗五首

夭夭园中桃郁郁松上枝春阳发新荣贞脆谁能知一朝繁霜坠百卉各已萎青青乃自保不为时所移向非厄岁寒何以别奇姿

植兰弥九畹种菊被三径幽芳固殊姿馨德良可竝皋兰以为佩餐菊以资命睠言理芜秽恒使枝叶净芜秽苦易侵枝叶苦不盛岂无桃与李贵此谐野性

穷巷有畸人夙夜勤古道敝衣适至骭疏食恒不饱歌声若金石颜色终岁好岂无当世念所趋恶佻巧美玉不足珍怀义以为宝

闲夜坐中庭素月流我怀鸣琴发玄思俗音难与谐微颺经前楹余响正裴回欲歌南风曲听者良已希愿言荐清庙复感风来仪

异人言种石可以致双璧千金受玄秘辛苦乃有获温其比君子韞椟良爱惜青蝇易为污恒恐伤厥德连城不愿售思以置君侧终岁无与言持之将安适

从军行

征夫远从军徒旅无时还炎晖薄五岭修蛇横道间朝食未遑饱夕寝焉能安驾舟涉广川驱马登崇山生别已不惜矧畏道路艰岂不怀室家王事有急难生当同富贵没当同忧患

少年行

长衢【一作衍】若平川轻车驰流波上有都人子明肌艳朝霞芳尘扬远风白日耀舞罗少年轻薄儿调笑相经过狎坐酌美酒日莫酣且歌千金罄一笑豪右焉能加时俗夸朱颜美女悦春华春革岂不好迟暮当如何

经采石

未明发芜湖终饭次采石大江天同浑巨浪山与敌松寒苍虬姿厓古老铁色其傍有仙冢云是李太白生为长庚精没与大块息因思开元中出入蒙帝泽御羹白瑶杯宫砚青玉滴恩荣日深重意气何赫奕酣歌泰华小豪饮渤海窄颇闻宫中怒遂有天上谪殷乱微子行楚昏屈

平斥嗟哉唐家帝同姓逝安适何年为兹游千载但故迹骑鲸信缥缈捉月诘昏惑得非厌尘
羈无乃达寄客翻然委之去富贵何足惜杜陵平生友梦寐频见忆白骨焉所求青山亦岑寂
相去嗟已远令人心悲塞举酒欲酌之帆去招不得

晚憩

朝济黄河流莫驰长路尘路长无时已河险难具陈高歌激层霄缅怀古之人剡木以为舟斲
木以为轮自非制作圣何以通万民飘飘远游子勿用叹苦辛

杂诗四首

皎皎素明月娟娟含令姿浮云遽起灭圆景遂参差山川莽回互天地亦相疑焉知冥昧中明
洁终不移弦望有恒运清光宁久亏

寸隙尘所投片言害所藏行徒恶蹶马岂复惜其良荣辱具自致否通亦靡常修正未蒙福为
邪欲何望天道岂远人抚心徒自伤

温温匣中玉什袭慎自持荆和始见赏举国竞慕之青蝇遽言集鱼目亦相嗤昔为人所宝今
为人所疵保终谅庶几逝者已如斯

白璧易为毁常惧世所捐忧心日悄悄自好反成愆君子远嫌疑胡为偷自安始知丘山累乃
在半辞间盗金信不疑攫尘惑子渊故心苟不易既往复何言

飞雪篇

北风厉中宵明晨散飞雪连翩素彩动泱泱玄陰结羣林互腾耀衆景纷变灭既增寒竹姿复
宜青松节因高始成势遇坎俄就缺东西衢路间来往昧深辙衆秽交凌践幽光自娱悦皎皎
恒易污无为恃清洁

寒竹篇

寒竹依涧阿石生何磊磊滋息因厚地生成藉玄宰春阳散华景枝叶被光彩及兹芳岁阑使
我忧心瘁遽悲凛节变但恐惊尘浼寒燠既异宜迟莫复何悔淇园?未息嶰谷音犹在君子夙
相好深怀邈云海竹性凉靡迁人心惧中改愿言卒封植勿使伤樵采

梅花曲

素芳何婉婉皎服耀江湄美人慕佳植托根乃在兹朔风振严冬孤花难自持流尘复浩浩焉
得不为缙芳筵坐积思急管夕伤杂顷筐佳实所愿及良时感彼李下人正冠乃见疑礼义

夙所敦人事偶乖睽抚树倚增叹中心谁复知

刑部王主事幕尝有菊一蒂三花尚书僚属咸异之号三台瑞品属朝之太天士能文辞者传咏其事至是奎章赵授经以其卷见及为赋五言一首

西曹应秋商庭户肃以清金行戒时令嘉菊正罗生台精丽前除流耀发华英三萼专夕秀衆芳谢春荣连枝靡阿比同气斯合并匪兹恤明刑何以获休徵愿言保初服永怀歌德馨

勤耕亭

日月靡闲暇四序【一作时】更运之斯人务作业矧敢怠遑时负耒适西畴恒患耕作迟仲春时雨至羣物具含姿牛食青涧阿鸟鸣芳树枝兴言播嘉谷夙夜将耘耔岂不怀逸居亦念寒与饥但使秋税毕聊乐及吾私羲农虽已远沮溺不吾欺努力顺时令素餐非所知

右诗为邹福作也福丰城田家子事艺文揭先生余力能读书为声诗又喜国语习通其学然朴慎不忘乎勤先生甚喜之尝手书福自为诗七首叙其所从出京师为文词者福多得其题述是何福之能使人爱若是也学者果皆系所出乎於是益知艺文为有德矣

寄题奉元张氏望松亭

青松翳高坟重壤闭玄陰孤亭何郁郁林气肃已深白云翔其巔悲鸟相与吟伫立以瞻望哀思不能任时祭罗豆觴祖考聿来歆岁晏寒风至零露亦在林危柯起凄怆令人生悲心逝者已如古来者复为今

清明日游城西诗并叙

予资嗜幽澹所遇名山水兴至辄翛然径造兴尽即休无留滞之意客京师三年闻西山之胜未至焉乃元统二年二月二十五日为清明节风和景舒卉木妍丽金华王叔善父四明俞绍芳同里范诚之与予从小苍头载酒骹共出游城西遂至先皇帝所创大承天护圣寺纵观行望寿安香山而还先是约信宿徧历山麓诸寺乃止至是谓三子曰是行适意尔即一诣而穷其胜岂更有余兴哉相与登高丘藉草而坐酒数行约赋古诗五言六韵五章道所得之趣书二十字乱器中人探五字以为韵时诚之止酒予又性不饮叔善绍芳脱冠纵酌旁若无人予亦吟啸自若都人士游者车服声技相阗咽金壶玉盘罗列照烂意若甚薄余数子者而又有若甚慕者焉既夕罢归所赋诗各缮写为一卷明日会余于杜氏馆中夫予在同游间年最少而好任意兴三子不以予年少而夺之诚之与予俱不举酒而能从二子之饮不厌其醉是游不已乐哉叙以识之

曜灵动若木晨鸟鸣东窗兴言集俦侣西郊出翱翔登高望荆吴延目极三江密林何庵蔕【或作掩蔼】嘉树翳苍苍感此时节迁慨然思旧邦乘风即清旷薄使我心降出自城西门未

知道所穷竝驱陟长阜山川郁何雄累累道边坟四顾生悲风茫昧万物始晏晏天地终陰阳
相推化焉知抔埴工谁能同朽木俱尽委蒿蓬

梵宫何巍巍白日耀流藻前楹交网树陰阶被灵草宿昔构华丽河沙施七宝丹霞通飞阁清
飈激驰道车马纵【一作从音同】横至虚空漫浩浩飞龙逝不返令人伤怀抱游子爱良辰
出门各有携阳春发惠气好鸟鸣喈喈芳花明曲陬【一作渚】新杨拂大堤羣物纷相悦斯
人多所怀飘彼陌上尘化为水底泥百年亮如此不乐复奚为长风度广泽清辉泛遥甸曾宫
岌崔嵬落景驻遐眷羣观各侈靡金宝列丰膳幽赏聊共娛谁云极游衍唼唼水中鳬翩翩云
间燕微生亦何勤志足【或作七非】非所羨

寄题吴兴马氏清华堂

丰堂翼华构阳景丽前楹曲流相纒带轩牖一何清微波涵素晖嘉卉发丹荣中庭列图史芝
柱亦罗生有酒介眉寿内无忧患并朝弄石泉水夕采玄玉英从之不可得愿欲濯尘缨

题渊明漉酒图

渊明性嗜饮所遇适其真漉酒东篱下邈若旁无人捐绂非所吝焉爱头上巾田园日成趣松
菊相与亲百年何为尔酩酊及兹【一作此】辰【或作晨非】陶然至和内混沌以为邻

送陈助教衆仲赴江漣儒学提举二首

登高送将归车马横道周白日明大河远望怅悠悠宿昔违乡国慷慨事行游怀宝非固售同
气乃相求兹焉去皇邑被命赴南州诜诜胄子徒惻惻不能留逝将敷文教还可被遐陬我无
千金赠临别恒怀愁独有清商曲可以慰【一作喻】绸缪

秋风吹浮云鸣鴈复南翔山川【一作水】何寥栗草木日夜黄客游岁云除【直虑切一作
莫】僂俛怀旧乡君行即吴会执别此河梁淮泗多奔流云海浩茫茫灵飈翼飞舳驰景曜征
裳去途日已远来会日已长援之不可得踟躕情内伤

瑞芝曲【并叙】

瑞芝曲者为麻阳簿任君作也君掾顺元帅阍时芝产於所寓之地以为瑞图之以传四方思
州刘文学来京师持以示余求咏其事按王充论衡土气和则芝草生又鷖冠子曰王者德盛
则芝草生醴泉出然则祥瑞之至有以也任君是图岂私有之哉亦将以侈国家之瑞也吾闻
古者以君子在位贤人衆多为国休祥任君继自今相率其僚为岂弟之政以布天子之德于
民则为祥莫大焉草木之瑞云乎哉

圣人运元化和泽被遐方黄灵启幽秘朱草发嘉【或作佳】祥晔晔晨敷秀蔼蔼夕含芳庆

云流瑞露丹霞沃天阳綢繆所凝结玄造亦何常夷居勿云陋斯人乐以康继今崇令德诸福应时昌

题陈氏菊所

陶公逝已远举俗慕高情之子厌尘杂开径挹其清晨起除翳菑【或作?】种菊蔽【一作满】前楹结根固其所独立谁为荣中园何茱萸绮席?朱萸车马日自臻丝竹腾妙声凝霜既被野蓂露复盈庭百卉岂不佳朝敷夕已零东篱信凄索可以托幽贞

题董氏具乐堂

董生筑高堂于以养其亲温轩纳飞旭凉牖谢流尘大椿蔽庭前慈竹映冠巾中厨足甘脆可以奉昏晨有酒及嘉宾余欢洽四邻生当隆盛时至德复无垠羣动各蠢蠢灵明贵斯人既复为男子夙夜怀苦辛年命恒【或作能】几何胡为劳其神所以荣公者乐世乃忘贫矧兹堂上翁安富殊等伦夫妇齐寿考遐福日以臻有子才且贤有孙复诜诜如何不为乐言笑及良辰好鸟四时鸣佳花萎复新黄髮日娛戲焉知冬与春

挽张隐君

峩峩浮栅山郁郁彭蠡滨中有隐居者逍遥毕冬春读书偈城府杖履率耕耘鸡黍会田家酒醪合四邻既醉亦咏歌富贵如埃尘一朝厌浮世含笑返其真贵贱同一尽各为丘与坟所立苟不忘浮荣焉足珍

彭叔璵得杏花一枝归置小斋同居王叔善甫邀余同赋杏花曲人一章约五言五韵

朱葩含朝景流芳自中园顏色一何丽【一作媚】灼烁耀棣【或作灵非】轩嘉宾从外来临赏各欣然同根岂不好异处乃殊妍贞心谅自知脉脉终不言

题丛蕙

蕙叶何青青罗生被岩陬中庭忽邂逅四顾风萧萧含翘纷旖旎怀馨洁以修时俗苟不佩芳草或为茅微物恒易迁君子内伤忧愿从芝兰化庶异薰与莸

题草虫图

大气流天地动植纷自形阳卉耀春华陰条敷夕荣昆虫信微细于以托生成守宫夫何慕蛩触战奚争蚩蚩伏青蕤跂跂缘紫茎促织焉念寒牵牛不事耕蜈蚣性含毒多足复能行庄周齐蝶化晋惠昧蟊鸣玄蟬翳高枝君子慕其清蟪蛄溺所嗜污秽不能灵感兹动中怀变幻焉足凭羣生各有命鸿化亦何情

送张景阳归覲

鸿鹄怀远举骐驎慕高驰志士多慷慨文墨徒相羁挟舟行远游翩翩至京畿京畿四方会冠佩交陆离紫宫承星辰高盖岌云霓圣人内垂拱至德徧羣黎求言逮微贱一善思罔遗君子道既达胡为忽言归严冬霜霰零晨起候鸣鸡送者亦在门南望各逶迤愿君自贵重岁寒勿相违

题【原阙】

太虚凭絪縕万化更往还涵生虽异灵蕴德谅斯全圣人系周易兹道廓以宣鬼神无逃情天地泄幽玄稽微内无象举大穷八埏研思何能极精义乃不烦来者纷讨求窈窕元气端君子依恒运小人昧至言忧道不可忘正利非所先需进良有时知命复何患

使至真定赴都计事遇大雹伤谷时逆臣唐其势诛

午发潯阳城莫投郭村店人烟树相错分野昴所占连屋临古涂幽花垂深堑行旅各已息下马卸征轡形容风日槁衣服尘土染倚牀秋萧萧汲井月灑灑舍翁得客喜亭长见官厌田家始收获勤苦供税斂夜来大雨雹妇子忧食歉还闻公侯家终岁酒肉饜天子今圣明诛锄尽奢僭覆车监前辙焚室戒微焰祸淫良已速福善终必验区区子何人行役奚足念

中山北道傍丘阜

自出城北门平野亘长云道傍多高阜累累若丘坟丰草为不生白日何氤氲焉知非陵墓下有长逝人棺槨化为土衣冠腐为尘既往不可见来者不可闻百岁何足恃为生良自勤

八月十三日至京

孟秋凉飊至驱车出西门去京始弥月白露忽已繁兹行亦何为于役义所敦山川既悠远晨夕违清温我马北以南岂不慕丘园努力在王事贤劳奚足论

九日夷山驿

驰驱涉长道时节良易更去日能几何商飊飒以盈玄蟬号且息羣鴈翩南征兹辰发重九在俗岂殊情抗袂出虚馆登高望旧京圆穹无留翳素颢有余清延瞩周四遐但见古时城颓宫委蔓草乔岳袭前名茫茫陰阳间感此百虑并我性不解饮虚觴聊自倾

使还至长沙侍严亲及外舅孙公游

仲春景气妍卉木具萋萋中园凝芳晖时鸟鸣且啾游子远于役岁晏乃旋归父母日瞻望亲

戚久睽违及兹时物佳少长翕相宜携壶出东郭聊以舒永怀鸿鹄随天风焉能忘旧栖王事亦可念勗哉以驱驰愿言饮春酒各保黄髮期

歌风台

黔首厌秦暴龙德奋炎刘英雄乘天诛拔劔起相仇天风隳陵谷飞云扬九州天下事既定怀土未遑休置酒宴高台中厨进庶羞悲歌落林木父老皆涕流功臣日菹醢壮士复何求至今丰沛间长顾使人愁故乡帝所爱零落遗旧丘大运各有终圣贤谁能留焉知万岁後魂魄复来游

云松巢为榴益之题

青松矗云际此有巢居者心清谢秦爵根远思夏社斤斧庶不戕栋梁谁能舍常怀太古世木处人事寡高步凌颢颳幽楼据潇洒星河入户动雾露当虚浮重霄纷相属九域莽在下磅礴俯大气微茫见平野飞仙遇相即风翮时可把浩浩区中尘流景若驰马凤鸾或丛枳燕雀乃大厦所以安一枝万事齐土苴

送范悦古再之江西宪史二首

客行辞国都南望越山河燕赵宛相距吴楚为我家别离生永叹送子以长歌长歌慷以慨忧愤一何多大道日隳坠逝川无还波浮云翳中天明月乃为瑕君子烛微词小人祇自阿素心苟不渝非意焉足加严霜厉松柏日出当奈何岁晏将自见慎勿改其柯

疾风暴陵谷所触为我仇林木无宁枝大江汨其流悄悄君子心荧荧增隐忧岁月忽驰迈行道阻且修白日临九圉环照靡穷陬卞生献奇璞再别始见收不有固穷节焉能忘怨尤行矣勿重陈居易复何求

送别宋子与

人生若浮云冉冉各四驰居同桑与梓会合乃在兹华月洞灵襟高霞敷丽词晤言永相好暂失系怀思矧当万里行策马从此辞旧乡未同返胡能忘嗟咨仲春景气妍翔鸟悦深枝弭节湘川潞迂轡俯江湄及家洵云乐怀土非所期荣名务不朽慎勿弃良时

用谢玄晖入朝曲分韵送马中丞赴南台得收字就用其体

金陵郁迢递行旆暖悠悠兰台清露集松庭晴霭收白鹭回修渚朱凤矫崇丘离离曳青綬晬晬振彤驹远甸芳风散神都旭景浮临轩结冲想还车宁久留

朝出国南门

朝出国南门北顾望重城紫宫承星辰双阙岌云兴贵贱各有安孰知昔所营天地忽震荡山川皆沸腾虹霓贯白日鸟兽相号鸣达士多忧伤贪夫偷自生伫立何长叹天道安可明

西行出周道

西行出周道历览坐平原澶洹何寂寥丰镐着浮烟二公营洛邑王业亦已艰禾黍忽杂离麦秀复芊芊不见旧宫室但感书所言嬴氏灭诸侯雄跨六合间商君用法令一朝废井田赫赫彼宗周在昔多圣贤消歇无复余何况恃强坚

和周伯温翰林斋宿

英颢散微颺圆灵夕清穆词林届严祀斋房敞空曲临下赫明明在公诚属属风条象九奏露树彰三沐书告蠲柔翰陈诗列明烛从昏礼既迨旦兴犹夙皇德亮时歆景命恍有仆升气清萧间奠币玄纁束神休对精享至和敷百禄将事庶无懈来祀永相瞩

秋日怀揭翰林二首

凉风吹庭树天地何萧索玄蝉寂不鸣羣鸟飞相失寒气日以至谁能无处室驱车望江介道路焉可述河济无安流原野皆荡潏稷黍宁复遗草木但蒙密虎豹无时号蛇龙多夜出对此不能言怀人易成疾

远行去乡邑单栖无匹俦黄鹄鸣中天夙昔乖所求东西无恒舍南北异遨游同居更杂处谁能心不媯日月游无厌弦望疾若流咫尺踰千里翘思若三秋白露凄以降寒风忽我遘兰芳委岩谷蔓草靡道周君子多思念感物凉怀愁海河岂无梁风波安可由且复加飡饭无为增隐忧

送仇继善归光州

季秋寒风发时物日凄凄鸿鴈鸣索羣野鸟求其栖寒暑不贷人客游多所怀昔为山上云今若水中泥曲躬徇微禄时俗谁能谐大道良阻修中路顾低回朝发城南门日莫淮水西归哉从吾志贵贱焉可齐

送萧介石

游子慕名都负志辞草莱驱车望国门宫阙何神哉月入轩车动鸡鸣闾阖开王侯多宴集弦管切云哀燕俗信豪雄自古皆爱才黄金致贤士宾客四方来俛仰时既迁蔓草没荒台不见古时人何以舒永怀舍兹复南去怊悵不能裁【怊一作惆】

冉冉岁将莫寒气下严霜征夫怀往路执手野旁徨草木既萧条山川悠且长念子今何向言

适邹鲁乡泰山郁崔嵬沂泗浩洋洋自昔生圣人衣冠宿所藏诗书被遗俗礼乐未云亡岂不念时命斯道不可忘愿求同心者携手与翱翔

题胡氏存菊堂

素商薄庭户丰草日易萎晨兴顾林薄百卉无复遗丛菊依前除迟莫独相宜清飈振绿叶零露发幽姿淹留谅有俟暴盛非所期对此时物佳欣然赋新诗嘉宾既在门有酒复盈卮日莫采其英斟酌及兹时四序委元化焉知荣与衰

九日会饮和胡古愚并简诸公

凛秋肃已至荣木遗故枝萧萧鞠在庭泛泛酒盈卮兴言爱重九良会欣及期饮酒非所性杯至聊共持天地啻余闲羲和逝若驰陰阳纷离合变化杂神奇太古不可还淳风日已漓佳辰乐清讌言咏竟余晖微月忽在楹惊飈满裳衣斯兴良未极携手且同归

题【原阙】

圣人肇宫室制作配陰阳般输守规矩经画故有常营构在斯须斤斧若飞扬深林产乔木可以胜栋梁大材谅不遗细者各相当青云岌华夏丹疏通曲房日月齐晦朔天地儼圓方茨塋既具周丹堊亦辉煌居处信崇高先民不可忘君知太古世巢穴以为堂

和赵德隆秋夕雨

落景翳重城凝陰起初夕萧条飞雨至散漫轻飈激洒幌静弥多喧檐暴复息清商乱急管遥怨生离席游子恒念乡气凄感时易既兴北风叹亦抱南山戚晨鸡不废度征鴈无宁翼向道乖夙期寸陰违所惜咏歌良可兴幽怀坐填积

和韩都事秋夜

招摇指西北河汉被天东四节自成岁衰荣焉可同阳卉日萧条陰林不复浓慷慨夜多念太息惊凄风鵬鹗【一作巨鹏】蔽中天野草集蜚鸿【即虬螭】羣物各有适焉知心所从

雪中送宋上舍仲敏归滑州省亲

北风何烈烈雨雪亦霏霏游子去成均将归【一作往】古灵昌诗书岂不乐岁宴怀我乡我乡伊可怀父母在中堂休告亦有时定省焉可忘浮云踰大伾白日照宣防子行日已至送者各尽觴当歌念远游令我愧中肠

寄题番易刘氏静观斋

万化纷往还陰阳相终始人生齐性命谁能独离此寂寂山中士冥冥会其旨大穷六合外细
撮秋毫里因兹达变化何尝惑生死林春野花发庭雨流云起对坐终日间悠然阅图史

菊坡为白公严赋

嘉菊生林下含英覆坡陀离离带长坂苒苒间层阿灵飈度鲜蕊浓露濯寒柯静者爱幽姿对
之行且歌朝作常不忘夕息以婆娑凛秋薄原野百卉忽已过伟兹霜中秀独立谅殊科始志
苟无违芳菲岂在多

四月十四日发京

六龙西北驰羣鸟东南翔感我客游士心神随飞扬迢迢踰大河怳怳越崇冈已惊时序易复
念道路长驱车出东门浩歌慨以慷燕薊岂不乐吴楚为我乡父母久违侍兄弟不在旁当兹
遂归志聊可慰中肠

劔门图

险门天下险亦复天下壮峥嵘扼西南气欲轧万象石壁摩往来风湍束奔放深蟠虚无底峭
出日月上二仪含崎 万古设眺望一夫或当关强敌不敢傍胡为昔人国恃此亦倾丧圣朝
今无外皇化极浩荡势狭秦汉争治同唐虞让乃知不在险六合德可王前年南中行其地少
平旷悬车度重隘束马下叠嶂翻疑蜀道坦劔阁固殊状及此观画图间关愁西向浮云从中
来日莫一惆悵

城西墓田【题下或有和罗若川韵】

世传神仙寿举俗争慕之不见松与乔高坟但累累松柏?路衢行者惨透迟遥遥千载心只为
後世悲春秋更代谢万化谅如兹自古皆有尽令名百世遗生时不努力死後竟何为

送何志友抱琴远游

客从东南来辞我将远征九州何辽邈道路纵复横商飈振长林露气凄以清感此岁月变念
子将何行闻有太古琴鼓之南风生一奏天地和再奏万物成知音亦已寡持此感人情愿言
【或作由】荐宗庙可以备咸英

题胡质夫更好山亭

盘盘青山阿苒苒嘉树林中园谁所治亭榭蔼沉沉贞松?奇石修竹乱珍禽朝雨濯丹葩春阳
敷绿陰游观日成趣岩谷有清音他山岂不好谁能同幽襟矧兹蓄灵秀芳气蔚以深油云始
肤寸可以致甘霖沛然泽羣物乃复返高岑始知兹山静仁者谐夙心即此得逍遥浮名何足

钦

题胡信夫一川风月亭

斜川多佳山流水会中园华亭郁深秀卉木茂且蕃明月贲林幽清风行树间流彩散复定微云中往还幽人坐平石日夕观其澜素晖回衣巾爽气在棂轩会心时自知意得复何言

赠揲蓍萧达则

太极函二仪万象昔未形陰阳倏变化奇耦互相乘羣生六合中动作何营营吉凶纷自致忧吝焉所徵天道良已微人事岂无恒圣神发蓍策揲侂见其情大易摠玄秘至言不可更俗流师异端恠妄昧前经达生乃藉古兹义日修明愿言善其用庶以道自成

挽刘雨卿

达人慕高隐乃在北山陲感昔生离乱弱龄已自持在世何所营课子以书诗秋桂擢丹葩春兰敷紫蕤既寿亦且康浮名何足羈一朝乘化尽溘然与世辞天地亦有终圣贤各如兹生存苟无憾委顺复奚疑

玉芝曲为邓或之作

圣人履昌运至德配方员郁郁休气翔粲粲灵草鲜英云被素趾甘露洒华颠上有飞凤凰下有涌醴泉铜池詎方秀瑶圃谅齐妍闻昔松与乔采之以得仙愿因献天子服食致长年【汉宣帝时金芝九茎产於函德殿铜池中芝色如金铜池承溜也】

题顏友立耕乐堂

深居谢轮鞅毕力事田园生世食其勤谁能同久安晨兴负耒出日夕乃来还时雨集丘隅灵禽鸣树间桑麻蔚【一作郁】北牖稼穡藹南阡邻曲多往来斗酒数为欢诵书不求解契道乃忘言在昔讥素餐畎亩多圣贤簞食苟无忧作劳非所叹

琵琶怨

美人挥哀弦上客叹蛾眉急响多悲思孰知心所之感者奉绸缪不言生别杂誓将桃李颜结君长相思如何双栖翼中路忽乖睽不怨欢会难但恐恩爱亏含情冀同顾中曲多苦辞君子苟不听贱妾欲奚为

团扇辞

团扇昔在时素手不相离凉温得君意动息亦有仪炎暑良未徂恩爱讵中衰何言遽相失一旦弃如遗旧物谅非贵故心不可移愿因新人得持以置君怀

题过氏适安堂

营营俗间务莽莽城中尘疑冰悲夏虫恶影笑涂人远者悟兹言思还乐我真生世嗟物役谁能劳其神过足谅非慕为欢聊及辰深居无尘杂丰屋丽且新庭柯集翔鸟池藻散游鳞观化获自然戚戚非所遵庶将依仁宅处乐以终身

题苏氏耕乐堂

少年思薄宦既老思田里耦耕非吾事素食良所耻时雨行东臯平畴被流水兴言命童稚东作从兹始饭牛乖苙陰秉耒郊原里旧麦既青青新苗复靡靡升堂举杯酌闲暇阅经史有秋庶可待敦本聊自喜古人不复存斯士亦云已食力吾所安夜行贵知止

题王元载御史为潘彦宾作幽人瞻绿图

曳杖缘芳沚引睇涉前林修篁郁葱蒨亭构邃沉沉零露发春姿流云滋夏陰苍辉度行袂碧影赴横琴美色非所贵高节良可钦岁月自流迈霜霰日交侵青青乃不渝瑟瑟有余音比物思卫风瞻望意何深爱求诗人体实获君子心永言托嘉喻聊用写幽襟

徐氏生意亭

芳春会阳景佳气蔚前楹春泽亦已和时物日滋荣茫茫大钧轴圯块四时成熟知万象先甲者悉未萌陰阳无停化元气以流行观兹悟生理人道亦有恒百谷播始获【一作获】太仓积乃盈愿言树丰德奕世永其生

题【原阙】

圣人御天下九五应乾元神物何矫矫精气久乃全屈信陰阳际出入有无间风云一时合雷雨相後先下顾周八方上行穷青天流泽无愆候原野以丰年功成不自居寂然归九渊

观外偈为天宁讲主慈公赋

团团虚白室了了圆通士心观乃非目性定犹止水羣动纷自形诸缘遶相倚譬如中堂上坐见前林里空方无定在内外非可拟凡此分别见皆缘识根起微尘含空豁玄象标月指应现本无方恒不离所止世人执邪见外鹜何时已应当离诸相玄悟从此始

题宜春鍾清卿清露轩【清卿能琴】

秋气集太虚夕光溥高树时闻阴液坠暗识商飈度旒旒星动林英英月霏雾凉局息尘想幽
琴寄玄悟寂历松上声逍遥丘中趣钓天澹斜景银河暖微素古调今所稀太音谁能喻仙人
饮沆瀣寿命金石固千岁不可期空歌徒延慕

挽谈孝子采【采字文卿清江人侍父尹零陵父病吁天乞以已年益父寿已而采卒而父安
葬茂材乡常山】

白璧伤易毁幽兰悼先頼陰阳孰吹嘘修短从所制伊人邦之秀少小拔其萃孝友积和顺辞
华着光丽青春何忽忽韶景晬云逝爱亲希长年保已非素志至今常山下行客挥涕泪芳风
吹暖草英云被丛桂去者日以长来者日以继立世务不朽生死徒歔歔顔殤易为感跖寿何
足贵

挽廖节妇【孝子妻】

关雎有恒匹别鹄不更双婉婉令母仪煌煌君子堂事夫死同穴谁能易其常皐兰殢夕露庭
菊厉朝霜芳龄誓靡适暮齿终弗忘懿德耀高间清风弥大邦哀荣一朝异缟素发道傍虚窗
委断织重壤煜幽釭高山上戢戢流水下汤汤瞻言歌卫风三叹我心降

题柏友亭二首

交道日沦丧结恩不结诚朝为春华发夕已秋叶零薄俗伤易迁使我慕清贞深居谢朋游嘉
树旅前庭影直静相偶心通潜有聆霜霰依时至雨露互滋荣下根附旁薄上枝拂窈冥兴言
着歌咏伐木感嚶鸣德义古所敦切琢庶相成友已苟无益不如草木生

种木必种坚取友必取端泛友无完节常木有凋残彬彬魏亭士古柏意所欢封植嗣前规斧
斤违世患衆芳或摇落修干郁桓桓旧本亦已固新枝日复蕃夏?交座隅秋影溢檐间薰濡致
馨德采服资妙顔不有後凋操谁兹同岁寒

题登瀛洲图

龙姿御昌历词馆萃羣贤对问日优暇更番时後先退集乐余闲谁能徒食眠游艺亦云末寓
情谅匪专十洲不可求瀛海以言传遂令是中士望者称若仙丹青孰是非翰墨互腾宣才难
古所叹後者或求全

和虞公同李伯宗赋昱公四珠精舍

泠泠清涧流磊磊碧山岑岩栖遗纷竞禅憩悦幽深雨过虚室寒宝气发前林明月交珠柱微
风来乐音圆明摄诸境空观明宿【一作夙】心嗟兹远行客怅望结冲襟

渊明图

渊明高世姿稟性良寡谐出仕谅云偶忽去亦奚疑人生驱衣食微禄恒累之枉已既非志在俗固多违万锺不足顾五斗奚以为卓兹千载中作者与为期

题麋架阁所藏故人新竹图

参差?奇石礫砢连孤树初箨既从风新枝复承露瞻兹时物化感彼芳辰度故人思久要夙昔乖良晤山阮诂非伦求羊谅同趣虚心愿自比从今至迟莫

九鹭图

鲜鲜白鹭羽振振清江滢露草寒已衰风芦近相蔽飞鸣各自适离居亦有次虽愜江海情终怀云霄志君子思有则画者工取譬仪羽庶可希修洁诚所贵

羣鴈图

微茫洞庭野隐约潇湘岸鸿鴈将栖息飞鸣求其伴先集良未安後至凄欲断使我怀弟兄因之中肠乱留连江海远惨淡秋晖晏常恐随天风高飞入云汉

题袁宏泊渚图

秋气集空渚月彩泛微波夕坐起遥思中流闻咏歌移舟近相即酌酒望银河高怀世稀偶良会岂更多未知百岁下视此复如何

题袁安卧雪图

积雪既填户冲风或入衣空庐独僵卧岂不念寒饥薄俗何足干固穷良自为自非洛令贤谁能顾荆扉兹事已云往高风今絶稀

刈兰棘图【为了上人题】

树兰勿近棘剪棘或伤兰恶木翦复生芳草树不蕃空门一诸幻君子殊衆观薰莸戒同器玉石忌俱燔不见致刍人怀馨增永叹

题张仲衍书屋图

茅屋闭柴荆度桥闻读书风含万谷动云集两座虚松叶走山犬花源通夜渔世俗自多违林泉非见踈他时或相忆来就北山居

题云崖图

高崖含青空气所出入綰縕日千态崿絕恒特立雨合龙挂低风回鸟飞急寄言为山者进
簟庶可及

题张伯龙书屋图

清江带茅宇絕壁连松寺溪响渔未归桥声客应至数鸦林外落一犬庭陰睡终日对羣书焉
知俗间事

题墨竹

吾闻崑仑竹可截黄鍾管千尺云外姿数寸烟中断时人拘两目所见何自短抚卷方寂寥清
风坐来满

题石榴画

汉使致石榴千秋见嘉实浆寒玛瑙破枝重珊瑚屈忆昔闻大宛疑将薄西日丹青有微喻意
岂贵远物

题山水小景杂画九首

晴烟翳高树野水连幽草浑疑辋川业复似斜川岛鹭下白波闲莺啼绿陰好安得买田庐相
从是中老空村断行迹深雪连昏暮惨淡既平冈坡陀复盈路时闻一树折犹见羣鸟去中有
映书人柴扉对何处江白云稍归山青树如沐轻舟渔石渚独骑经林麓野气昏已明衆声断
犹续坐忆泛湘时村西见茅屋云烟状幽絕丘壑怀栖遯新雨松树凉轻飈竹林晚闭门堆乱
石曳杖行修坂寂寞垂钓翁扁舟去人远云归山欲暝月出泉相映石影生夜寒松声起僧定
遥疑露下立或发风中咏幽境何閴寥长廊罢钟磬平湖写山影远屿来花气鱼鸟终日闲琴
书有时至风檣出仿佛云水生迢迢对此独逍遥谁能识幽意云山不可极野水多相似古木
生夏凉幽篁起秋思渔舟石下出归骑山陰至中有隐君庐苍茫何处是盘盘苍山根泉出如
素练含风静复响触石惊相溅竹回秋气来松凉夏陰转山翁阅妙理独立无人见野树?轻舟
晴波照层巘平桥昔未断孤客来何晚坐使春思多应怀暮山远

题墨梅

老树亚晴空疎花带寒野风流不自惜澹泊从人写岁晏孰相娛空山少来者

孤花何婉婉玉立含幽素短短时出桥疎疎或临路坐疑檐下月半照牆西树

傅与砺诗集卷二

傅与砺诗集卷三

<集部,别集类,金至元,傅与砺诗文集__诗集>

钦定四库全书

傅与砺诗集卷三元 传若金 撰七言长短句古诗

奉题仇工部壁间古松图歌

苍松在山自奇古沟水翳之人不惊忽然图向堂上壁满坐叹息长风生交柯盘郁森昼晦其下将疑鬼神会雾雨寒霏虎豹毛雷霆怒坼蛟鼉背乃知巨笔老且神力斡造化雄千钧皇天不天栋梁具后土潜回霜雪春尔松已为人爱惜见尔为尔生颜色山中岂无材木倚绝壁未逢匠石嗟何益【虞公见之题云绝妙绝妙吾人新来第一手由是名动京师】

题卫知事广衍仓西轩墨竹歌

吾闻渭川竹如簟太仓欲致那可得开眼睛烟落户牖透裳冰雪生胸臆爱之借问作者谁母乃与竹同标格自是君怀足清致故须好事留真迹阴森雨气发中林飒爽秋声起前席微坡直具百亩意老干真凭万钧力玄豹犹含隐雾章苍龙已奋干霄翼火云六月思远避安得坐我林间石待实谁怜彩凤饥钓鳌未试长竿直为君歌罢久叹息羣玉萧萧动高壁【百一作千】

猛虎行

长林瑟瑟多悲风猛兽引子戏林中白昼横行动山谷周遭十里无麋鹿路暗樵夫畏独归行人愁向山家宿近山日日取牛羊更囓居民横路傍民要耕田给仓庾官家得知射杀汝

寄题岳阳萧氏四亭

舍南舍北佳山水虚檐黛绿【一作翠黛】浮空起明月秋生坐榻前白云暮落屏风里微茫远色带晴湖造物径营趣独殊世上徒传摩诘画胸中谁得辋川图

右天开图画

山人住山尘鞅断草色看见流年换叶落长林鹰过清花开杂树莺啼乱秋去春来醉复醒常时玄鹤下青冥岳阳道士应相过千岁松根煮茯苓【看一作屡鹰一作?】

右山间四时

流泉??出地底稍切行云翻日光环山已历千峰窃到海宁辞百折长波涛日夜相摧激户牖
凭高兴何极风雨冥冥声合时蛟龙变化那得知

右百川伟观

长松当檐拥高盖翠色浮光照庭内天矫声从霄汉回苍茫气与风云会柴扉昼寂思共倚藜
杖秋闲知独对辛苦移根待雪霜江头种柳三年大

右倚云独秀

墨蒲桃歌为俞绍芳题【绍芳名述祖四明鄞县人】

大宛蒲桃连万区贝丘蒲桃员十大宿昔仍闻植汉苑见之坐右神森爽露余大实垂堪?烟际
危藤引初上度海疑从博望槎入林恐【一作似】倚昙霄杖流沙飘飏岂易致【一作到】
别馆芜废今谁赏萧萧素壁走龙须风雨蜿蜒日应长忆作挥毫云正愁炎天忽若对清秋玄
珠满把君能得緑酒千鍾【一作樽】不用求古来豪富夸蓄积肯贵翰墨相传留君不见扶
风孟氏子笑谈一斛买凉州【後汉扶风孟佗以蒲桃酒一斗遗张纁拜凉州刺史】

赋得秋夜长送方叔高

秋夜长长如岁长如岁尚可夜凉薄人不能寐羣鴈各南翔一鳬尚北飞团团素明月流光照
我衣当歌正激烈慷慨送将归丈夫成名微亦足焉能终夜悲刺促秋月皎皎夜何长念君客
游思故乡当垆美人惜年芳遥【一作长】夜起舞歌清商歌清商送急管为君酌美酒请君
勿辞满夜长迢迢漏未终离思比之何时断离思长夜犹短

浑沌石行【九江方叔高得武侯鱼复八阵碛中小石于其处白质而黄章状若鸡子字曰小
浑沌揭艺文为作浑沌公传云】

浑沌以来不可数万八千岁生盘古綑緼乃在卷石间光恠潜通落星渚来从鱼复人尽讶坐
念武侯心独苦八阵图成泣鬼神三江石转凋寒暑苍波喷清圆且坚鸡子结成生理全久当
化鸟非为恠大未成羊亦可仙元气犹涵太素前英雄事往唯存石天衡【一作冲】地轴今
谁识虹上当疑雾雨寒坐中歛恐风雷黑摩挲直如见溟滓位置岂肯同沙砾长路相将拂劒
随天陰勿使精灵得

奉题達兼善御史壁间刘伯希所画古木图

远树含幽姿近树亦古【一作老】色水傍常【一作长】见画不得乃在君家【一有中堂
字】之素壁青林寂寞行人窃白涧微茫断烟隔入门萧萧云气生落日便恐归禽争耳後飒
爽行【一作发】风声知君夜眠愁雨黑留客昼坐宜秋清刘侯学李侯画手称独步【一云

画者刘伯希近此称絶艺】时见作古松盘屈百怪聚【一作奇形势】中林一株直且良安得刘侯写其趣【一作安得挥毫纵奇气】

慈乌謡仿乌生子为刘氏子作晋宁刘氏母王蚤寡育其子成人仕为艺文监筦库吏得禄以养其亲士大夫皆歌咏之

慈乌慈乌阿母养汝时乃在刘氏庭树间喙尔乌子尚乳时安知阿母宛颈独宿日夜畏汝生忧患喙尔乌母自劳苦令汝逸虽有风雨巢坏阿母身蔽覆不使乌子寒喙尔乌子身已大高飞入上林苑使阿母端坐身反哺者我天子至仁罗网不令及尔身尔一身更得食太仓粟阿母与尔朝食粟夕止舍喙彼乌生子何必八九雏阿母长饥不知彼乌子处喙尔慈乌尔母子慈且孝愿尔生子如尔孝尔身何须复忧其後凡今之人各各有父母

送邓朝阳归赴分宁州杉市巡检

男儿生当游八区焉能郁郁守座隅往昔滯留湘中日我兄翱翔天子都先皇崇文坐垂拱平明西阁千官拥琼岛称觴日月闲玉阶奏赋星辰动後来执笔随天官纂述大典垂不刊书成入对紫微曙宴罢归辞青琐寒兄今得官二釜足惜乘逻骑【一作腰弓骑马】南山麓我有家书欲寄将柴门回映清江曲

朝阳余同里天历初至京师尝因天壽节献万岁山赋後以能书助修大典当得内郡校官借江西司警之职近家故也南山在宁州境修水之上杉市宁属故及之

送危尊师奉香还龙虎山

蓬莱使人朝帝阙馭风上下何超忽青节春辞雾阁还紫箫夜送天香发山上蟠桃应着花五云何处是仙家【一作太清家】但祈下界多年谷长共羣仙饭熟麻

白紵词

白苧白白如霜美人玉手亲自浣制作春衣宜短长春衣成有时远行归无期愿君着衣重爱惜风尘变白能为黑

题太白玩月图

明月出高树上悬青天中下有万顷之澄江扬波泛彩清若空江风吹人色凄凜此时对月谁能寝十千斗酒何足论举杯直就花前饮花前饮酒无与俦酒酣意气轻王侯仰招行云不可得但见月与河汉俱西流仙人伐桂树玉女倚琼楼顾盼暂相悦弃去终莫留昨日已浩浩来日复悠悠人生如飞光及时不饮空白头君不见月中玉兔捣灵药不能医此万古之闲愁何如尽醉江石上【一作醉卧长不醒】天地与我同虚舟长啸【一作兼兼】六合间浩然何

所求

黄鹄山人歌

黄鹄之山仙者所游上有万里之云气下有千古之江流日月往来扬光於絶顶崔嵬崒嶭横高秋山人隐其下奇气与等侔时逢王子乔白日相邀留口授长生诀吹笙缑岭头玉京羣仙朝帝所合沓风云会龙虎中有一人王子徒上帝命之司紫府长跪谢山【一作仙】人引之凌九霞左攀琪树枝右接蟠桃花逍遥佩明月出入太清家有时乘獬豸下界触羣邪帝令司民命祸福无舛差坐调陰阳运帝车文昌六星示光华光华??照地维凤凰麒麟班陆离仙人飘飏翠霓旗手把云裾宴瑶池宴瑶池饮緑酒玉童东来献长壽下顾黄鹄山苍苍年命与之同永久

送奎章阁广成局副杨元成奉旨之徽州染纸因道便过家钱塘二首

新安江水清见底水边作纸明於水兔旧霜残晓【一作夜】月空【一作夜月隐】蛟宫练出秋风起五云高阁染宸章最忆吴牋照墨光明朝驿使江南去诏许千番贡玉堂

緑槐五月高云冷行人辞阙瞻乡井奎璧秋回帝座深斗牛夜隔天河永君今【一作今君】衔命出江关却到徽州几日还天上应须朝绂节湖边何得爱青山

忆昔行送雅勒呼正卿【初名雅古登天历第御笔改雅勒呼】参书南归参书闲居京师行中书调广西选以为静江同知比上其名中书正奏授高邮时广西寇盗而参书母老即移家归武昌待次遂作此奉送兼问讯江汉故人

忆昔文皇御天历知君已是青冥客宝气经年动斗牛璇光彻夜通奎璧比来蹇剥人所叹况复贫病家多厄【一作当路宣昭气斯直】忽闻除书双及门老亲白发生顔色秦邮近水足杭稻桂林只今多盗贼待次且食武昌鱼携家不过湘南驿王祥旧来驱别乘贾谊未久遭前席此时父老怨来迟他日攀辕会沾臆骐驎那愁九州大凤凰蚤恨三山隔秋浮江汉云木清夜过淮河月波白新诗屡成知自诵远道即见何由得黄鹤楼南【一作前】遇故人因君为致长相忆

立春日对雪【乙亥】

帝城东风作春雪千花墮地吹还灭云气微分五凤楼日华稍动苍龙阙天涯对节每思亲况复愁中数见春坐忆【一作?】高堂献生菜朝来说着远行人

古杉行题陈兵曹所藏李遵道画灵隐道中二杉【题下一有图字】

灵隐道中古杉树上与云雾相胶葛【一作轆轤】李侯一见为写真霜雪萧萧起毫末此杉

苍茫几百年鬼物扶持人所怜贞心岂容蝼蚁蚀老干或有蛟龙纏山林万里那得致见者皆
惊栋梁器暗壁寻常度雨声晴窗仿佛生秋气【一作晴轩恍惚来秋气】吾闻大厦衆力持
此杉谁能久弃之君不见道边不材木拥肿百围安所施

陇西节妇歌为阎母田氏作【夫汝明客死剑南子为帅府经历】

陇西节妇生何苦二十夫亡子方乳琴底愁闻黄鹄音镜中畏见青鸾舞自从十八嫁良人年
年【一作三年】离索怨征尘叶落啼看陇西月花开【一作飞】坐忆劒南春劒南忽报消
息至生死那知蚤相弃寒日秋明化石心悲风夜落崩城泪誓将埋玉归同穴终拟遗珠照来
世谖草萋萋种北堂柏舟渺渺临东逝于今门户有光辉八十红颜世所稀郎君佐府纓朱绂
年老辞官着彩衣当时哀苦痛欲絶晚节尊荣忍能【一作更堪】说寒织犹残断後机香巾
未解来时结人间万事可胜悲肠断江波日夜驰君不见会稽愚妇轻贫贱不待白头生别离

奉题陈参议溪山四雅图

陈公退食一事无开阁【一作合】示我溪山图晴林当昼发烟雾顷刻松陰生坐隅恍闻鸣
琴动踈【一作修】竹一亭宛在清溪曲树下风声出舸舡石间水影摇棋局隔溪高空郁森
爽丈人避世嗟长往嗜书无论终日读爱画时更临风赏可怜九老幽致同欲往从之不可通
我贫何时见此屋怅望林壑生清风【一作谿谷来清风】

题顺元帅府都事杨君昭雪卷後

至大间夷寇野鹄刘弄兵鬼方肆杀斂为民害至白昼入城登元帅庭大呼狎视镇兵若无人
者时杨君为幕白府僚发卒捕之获其渠魁七人贼衆溃走南边以宁事闻会执政有衔元帅
者以专制论罪凡在府者坐之後八年朝廷亦知其枉命在坐咸复予旧官属关陕之变杨君
适居蜀不得通今年始来京师因靖州刘从事持其邦人士所送赠文若诗为言状及其为人
才能遂共感激作忆昔行一首以赠之

忆昔南夷瞰罗鬼魑魅魍魎何为尔夺马朝驱大市中椎牛夜啸长林里公然入城欺守帅况
论过邑残居里府僚会谋饬将卒杀捕渠魁衆皆靡事闻执政议专制忍使羣盗轻过鄙明罚
终能達帝聪复官更遣司军纪幕中杨君西蜀彦宿者同患今须起感时每欲泪沾膺论事犹
闻血生齿寇盗【一作贼】风烟互骚屑朝廷爵禄思任使至尊日夜忧四方安得边臣尽谋
士

用王著作【字骨之】见寄韵奉题其所寓听竹轩

王家好种青琅玕四壁秋声生夏寒朝回每独风前立客至时同烟际看北牕数竿最幽胜满
耳萧萧客【成作世非】尘净截管休将学凤鸣【学一作作】世间古曲无人听

邯鄲行

邯鄲城頭下白日邯鄲市上風蕭瑟故壘空余鳥雀悲荒垣只見狐狸出何王墳墓對山阿尚憶諸侯爭戰多趙客歸來重毛遂秦軍老去畏廉頗黃塵白草宮前道鬼火如燈夜相照公子秋來不見歌【一作過】美人月下那聞笑當時冠蓋激浮雲撻鐘考鼓宴青春只今惟有郵亭樹還送年年行路人

傷哉行

傷哉何傷哉出門聞天語掩袂不敢哀道傍行者但踟躕使我寸腸為之摧嗚呼上天生下民下民何多災玉龍駕若木奄忽復西回吾聞女媧斷鰲立四極胡不使之萬古不動長崔嵬天高蒼蒼不可及下民號之空仰泣

廣西謠

廣西謠一何悲水泠泠山淒淒寧逢獠賊過莫逢官軍來獠賊尚可死官軍掠我妻與子

八十里山行

桂林之區獠賊雜處南有八十里之高山絕天綿延開險阻賊人倚之【一作山】作巢砦劫掠經年勢還大官軍收【一作征】捕費供給主將逡巡竟【一作意】何待居民近山晝夜愁山下行人皆白頭況聞良家半為賊官府貪橫仍誅求安得大聚邊頭兵甲鑄田器盡鋤高山作平地高山平獠賊斃

南屯老翁行

南屯老翁年七十官府征徭困供給大男送糧赴軍前次男守寨不得眠盜賊時時劫生口東隣西舍日夜走今朝喜見朝廷使持酒含淒說前事筋力雖微不敢休辛勤更備官軍至教兒應役莫逃亡祝男成長身日強但愿明年盡殺賊耕種官田得几力

泰宇篇

元氣渾沌物之先至道周流充大圓洪覆六合完以堅曠劫不壞體自全真人乘清馭紫烟坐掇羣動觀化遷手持玉芝授至言恬澹無為游泰園太虛之室洞玄玄縹衣神君宅中間開闔兩扉日月旋列星離離耀棖軒玉樞金龕固靈關物物不干妙自然崇台中峙朝列仙內景含照洞無邊以虛為牖靜為垣子能居之神永安

云庄行為將作院使約約正德賦

房山山川蓄清美参错田庐间流水中有万顷之白云划然变化开奇伟纷纶北贯居庸合缥缈西连太行起映日初缘赤县来乘风忽被青冥里云庄主人起庄中亦如云气随天风从龙已取应时运作雨犹【一作尤】资成岁功一朝进退卓然异衆人浮沉那得同乃知其善发天性况复所由承世忠身居富贵心何有马上看云数回首别墅思临谢傅棋故园忆对陶公酒朝有旧臣人所贤即今未得辞归田颇闻醉後王摩诘乘兴时能画辋川

东溪行为滁州万户杨俊卿作

东溪主者杨将军少年领兵多树勲心将富贵同流水身以承平住白云闻道云深是溪处扶桑直对门前路青山左抱日光回寒瀑西连雨声注将军临溪乐诗酒沙鸥水鹤相亲久螺赢经年缀鼓鼙蠨蛸尽日蒙刁斗白团羽扇小纶巾闲携棋局过比隣舟中有客时寻戴花底逢人非避秦人间何所无丘壑车马憧憧走城郭红叶空藏秋渚断緑萝自傍春岩落近者征南兵未休荒村穷谷多罹忧愿移部曲隳残寇却向溪边娱碧流

送袁庆远赴潮州经历【庆远淦西人号景山】

结庐清江山与隣帝里留连冬复春南陌花开临别酒东城柳发送行人行人直望潮阳馆水驿过家风日暖天入沧溟裊?长路经庾岭题诗满桑浦人家炊晚烟昌黎祠庙草芊芊候吏立当榕树底丞徒列及荔枝前府中文牒纷相积官长权迎幕宾客 母秋还岛雾清鳄鱼夜徙溪云黑游子天涯兴转孤明朝相忆定何如上林无日无来雁会有邹人寄帛书

栳城节妇词

栳城妇郭氏子一生长闺门底少年嫁夫夫早死牀头明镜不复治落花深院鸟声悲昔时山前哭夫处辛苦携持葬姑去一身未亡儿女小今长大身益老大行行舟河水枯妾心皎皎终不渝县官旌门人见好死生离别那可道

秋夜曲

草木摇落鴈南飞文牕皎洁承月辉凄风入房露沾扉红颜含彩垂佩褱簪金鸣玉扬舞衣兰釭射耀照君帟远行胡为未言归

七星砚子歌

吾闻飞星堕地时匿彩含光或为石坯凝适与精气会采斲犹疑鬼神惜君家文房七星砚坐令识者嗟难得天上还愁失白榆匣中歛见开玄璧寻常传观润生手造次何忍污以墨孤月秋悬列宿稀五云夜堕三台拆新晴试笔当广庭顷刻烟雾生青冥忽忆前年渡河汉奉使不识天文经归来空有支机石长使人间知客星

送笃敬夫御史之南台

布衣忧国人共嗤有时沉思坐终日不愁贤才进用尽但恐吾道经纶屈忽闻故人拜御史走读除书百忧失文气寒依北极回德星夜径中天出故人昔在天历岁忆送君行把君袂潇湘洞庭霜始清蓬莱弱水风能至董生对策遭英主韦相明经起高第丹阁终看集凤凰青云早见驱骐驎一生忠义心所留身至霜台仍黑头感君气槩重交分令我怀抱开羁愁绣衣南下动江海宝剑东行次斗牛吾闻獬豸憎魑魅肯使鸱鴞为寇雠

天师张大玄祈雪歌

至元二年冬不雪天子夙夜忧黎民宫庭择日诏方士台观通天求百神留侯之孙住龙虎世领祠官列圭组鳧雁经时诣紫微凤章半夜飞玄武皇天爱民祈可必腊雪依微应三日望拜还闻在竹宫受厘忽报临宣室天地杳默韬玄功赐予纷纭恩赐【一作数】隆请和六气辅元化常使九州歌岁丰

铜爵砚歌

邺中文砖天下奇流传为砚亦堪悲月砌寒倾古台莫雨犁耕出断钗时荒凉火烧狐兔窟金棺别葬奸雄骨石麟暗刻魏春秋铜爵空题汉年月可怜此砚依浮世曾见高筵美人醉行迹犹沾旧鞦韆尘啼痕已灭新粧泪向来登践日纷纷即会磨洗见奇文题诗为吊西陵树地下曹瞒那得闻

禾簇簇题邹福所藏勤耕图

未簇簇禾簇簇去年缺雨今年足人家耕种少得闲一春强半田中宿塘上水生禾欲齐春禽爱近落花啼出入无人看门户野庭一任人来去有时耕罢亦长吟归来不记入村深书编从挂牛角上诗卷闲留桑树阴田家小心畏法令常愿秋租得余剩隣翁昨日到城还闻说官家有新政民间禁马不禁牛有牛耕田君莫愁喜有後题罗天则鹄见尾图云得子?也

喜有後喜有後酌君酒为君壽丹青百年知为谁今人不及古人手是谁幻此灵鹄解人意坐令见者嗟神异鹄兮鹄兮尔何慧既不学海上精卫禽衔石填海恨海深又不学蜀中子规鸟空山夜啼愁達晓梨花乱开春日晴喳喳来踏树枝鸣风里花开时见尾烟中树合但闻声深闺少妇听倍喜却忆春来郎远行郎远行儿在腹郎归来儿在目想君得画归有期正是闺中闻鹄时

题萨天锡岁寒图

松树青冥气千丈野梅幽竹连萧爽月下微风縞袂开尘前大雨苍鳞长看君墉壁有此奇君更与此同霜姿乍闻清瀨泻悬石忽若流云生石陂

乌全子为晁安儿作後母害之刘长道者生之

乌施施尾褫褫生时作巢养子雄乐雌一雌死一雌来三维待母食一雏长独饥彼母胡不仁
子不雛母将奈何雏在树母啄逐雏去树百鸟利雏?常恐身毙巢亦颠母虽爱二雏巢坏宁独
安忽有黄鹄从东来挟雏置树间含哺以食教以言今日羽翼成黄鹄不言恩

武氏节孝篇武用妻苏氏子名德政

孰不有妇武氏有妇贞且慈夫疾自刳股夫亡守空帷志不可夺义不可亏命子有遣言千载
为母仪孰不有子苏氏有子孝以顺生时养母不违母母没长思奉遗训负土为坟广茔域东
西筑台高百尺二泉出地蛇所导神物冥冥寸心格泉废尚可发土夷尚可增吁嗟苏氏子同
传身死有名人鲜能

远将归

远将归恨归晚通州河头有韶雇行人将归不言远人家生子少离乡一生长
在父母傍自怜出入无年月北走京师南走越他人富贵轻贫贱一日金多弃乡县小官禄薄何足为得及父
母康强时说着还家客心喜此身虽贫亦不耻

覆舟叹

吴中富儿扬州客一生射利多金【一作钱】帛去年贩茶湓江东今年载术黄河北远行香
火倚神明从来风水少遭惊近日舡行御河里顺流日日南风喜笑人上水风打头岂拟自家
船入水前船各自向前行後者还来逢哭【或作笑】声妻子家中未知死同侣将书报乡里
道傍叹者独何为昨日宁闻今日悲岂不见他平地上风波顷刻少人知

书阳罗堡

微雨萧萧湿行李马头即见长江水烟浦明侵白鸟边风帆乱入青天里故人南北久离居况
复经年无素书明日重吟汉阳树何须不食武昌鱼

双剑图歌

莫邪干将古神劒得水化作双龙翔斗间宝气入江灭波里金鳞翻日光道人笔锋如剑利亦
能化龙致神异黑风魑魅涛欲立白日陰陰雨将至忽然逢之不敢窥爪甲云气常淋漓便愁
中夜雷霆怒两龙乘云尽飞去

金人击鞠图

古来北方善骑射材力往往矜豪雄吾观金人击鞠图意气已欲横土中黄旗鵬羽措天黑绣柱龙鳞掀日红鸣鞭纵辔捷一发左回右折如旋风流星逆乱拂衣里飞电翕忽生马鬃极知此艺较轻矫驰骋亦似观成功後來唇齿不自惜纵习武勇终亡国当时得失争一丸百岁安危复何益

题笃御史海鹄图

空庭海鹄谁所状海气初高鹄神王云脚西腾弱水涯湖头东出飞霞上此时扶桑色始分下视百鹄空其羣日中金鸟侧相避篱下凡禽何足论

醉仙图

吾闻真人絶嗜欲酒有何好仙好之八人坐饮崖树下沉醉千日无醒时梦中冥冥浩劫始世人不知其所以苍梧洞庭孤月生阆风玄圃羣飈起猿啼鹤翥无聊赖颠倒烟霞在冠屨壶中尽是长生日物外无非共游处醒时所执醉若遗万事纷纭何足恃呜呼仙道或在酒於我不饮生何有

武夷山雨图怀杜徵君

武夷山中春浩浩疾风满地翻瑶草云来九曲川欲平雨发千峰树如扫谷口车轮不能辨水边茆屋终相保可怜卿相多黑头空谷斯人着书老

孙伯大山居图

洞庭之区水所瀦波涛四时春太虚故人卜筑乃厌此因遣好事图山居昨日开图见山色坐中烟云生顷刻峭石雄争华岳青飞湍怒截天河白衡门鸡犬仙源里野径山桥宛相似扫花可以坐白云采药谁能记流水知君爱山不在山画者所见非人间竹陰对客自吟啸松下闻泉时往还我生食贫若奔走石田茅屋今安有招隐空怀小山桂读书未种先生柳看君此志真絶尘只今功名始发身会须买田增筑室迟莫有意来相亲

伯大山水图

斋居胡为见云壑白日虚岚满秋幌何水深蟠地底回层崖险历空中上苍茫不知开辟始咫尺须论数千丈林端远岫微有无岩畔精蓝鬱萧爽杂树悬罗拂轻黛寒松覆谷含清响仙源或在人间世洞口孤舟欲长往嗟我生平最漂泊中年万事何鞅掌忆昨征行多所径至今絶境怀幽想雷霆半夜山忽至风雨三春石应长对坐聊歌隐士芝无因一试仙人杖

方少府云山图

岳阳方君嗜山水妙墨千金不论价好事林生偶相得乘兴能为米家画云壑幽森愁翠虚风林飒爽宜朱夏石桥对面寒泉落茅屋无人午烟罢知君家居洞庭左亦有别筑东山下乡者入侍白鹤宫终日奔随六龙驾谷中白云昼自满石上青松岁当化为怜东驾事趋谒常拟还山事【一作治】耕稼我亦平生贪胜境谁其未老身闲暇就君买山安得钱愿乞长缣扫嵩华

送蒙古学正杨茂先归

古来篆籀久不作圣代同文变新学近者秦书废旧传诸生汉诂求先觉岳阳官舍冷於秋微禄淹人岁月流已闻给告还乡县明日风帆失郡楼

题宋道震皇都春色图

客居栖霞山自号栖霞子平生好诗仍好画诗兴苍茫画图里昨日山中开酒壺酒酣听我说皇都坐闻皇都好春色引至东家观古图东家古图长一匹数字犹题马麟笔上有宋皇飞白之草书舞凤回鸾弄【一作耀】云日此卷临摹用心苦犹恨生绡不如古歛从坐上见平芜便恐征衫湿微雨雨中如闻人语声彷彿谓是长安城水波已暖浴归雁宫柳初长啼早莺闾阖霏微五云起楼台隐约千花底是中冠盖多贵人想见行车若流水岂无礼乐成教化亦有文章待闲暇山人胡为独长往或问长安指图画君不见古来出处称逵生山林朝市各有名百年适意无不乐聊醉春风歌太平

题章存诚十二马图

韩干画马天下闻笔力远到曹将军忽从座右见神骏落日萧萧愁暮云雄姿利气闲且逸雾鬣风鬃十二匹神龙变化未可知天驷光芒有时失去年刷马喧都鄙纷纷杀马输马耳骐骥遥依沙漠寒骀骀尽向江南死江南近来一匹无君家乃得存此图便当持献穆天子上下八骏同驰驱【江南死一作风尘死】

题刘焕宗明皇四骏图

明皇昔时爱名马天廐所育皆神龙今君画图有四匹无乃神骏来九重圉人控御愁闾阖千里长安草萧飒沙苑昼疑云雾昏渥洼夜恐风雷合因思蜀栈銮舆苦那见唐宫教坊舞老骥飘摇弃长道美人寂寞归黄土开元旧事谁复陈独使此马传其真今人观画心所忽古者千金市骏骨

梧皋行为淦张会庆赋

玉山桐林君故乡闻有梧树参天长高枝苍茫会风雨老干偃蹇殊陰阳江皋颢气接翠飞屋下春泉流细香敬侯种木晚为用少陵移居恒不忘只今城中池水侧还植遗根志先德鸾凤

楼枝渐长翎蛟龙伏窾终生翼飞英拂砚春常满落叶当庭晚逾积避暑时开背日牕听风或坐临流石兰台御史玄圃僊高风劲节时所贤直将文章着始末坐使泉石生光妍昨者寻君坐梧下为君诵诗神?然他时清庙制琴瑟君有长材宁弃捐

刘宗海山水歌

吾郡山水邑材艺皆絶伦昔时稚川善游戯妙墨往往追前人後之作者非一士刘生妙年下笔新意营惨淡窃元气功接虚无通鬼神一生精勤嗜奇古十年不见今楚楚忽然遗我四老图白日云烟起牕户头上松花坐处落手中芝草饥时咀此翁眉骨非世人踪迹何因到城府谁依涧石开茅屋亦遣疎花映修竹樵斧时冲白鹿归渔舟独系青枫宿嗟余奔走贪长道见画幽人愧尘俗近时诏下徵隐沦兹士胡为置空谷

牧牛去题袁庆远经历所藏画

牧牛去千山复万山上山日出愁起晚下山日入苦行难手中鴈鸽牛伴侣养来多日能人语纵牛不牵绳自垂听他行食母苦之欲归尚忧牛不饱更近前溪多水草但愿年年牛尽肥主翁足食身足衣农家养牛国所赖恶少城中杀牛卖

赠相士潘碧山

安城碧山子所居以色自取夫何如眼同秋水照絶壁心与浮云行翠虚古来善相称许负子有藏书服膺久直言往往惊四坐乃使世人畏其口呜呼万物同一气妍丑於人岂天意蜂目谁知不可亲虎头自信终能贵近者遇子岳阳城知我贫薄谓我清顔回屡空吾岂敢猗顿多赀非所荣潘生潘生子非佞我生久已安徽命君不见松柏空自材岁晏萧萧雪霜盛

赠医士谢茂德

淦江远近皆名山仙翁羽客多往还玉田辉辉生宝气丹竈往往留人间谢君逢之得其道家积羣书日探讨上池饮水能知物东海得方还却老早时玉桂照庭阶世俗纷华志寡谐几回酒到能倾座何处诗成不放怀古来医术资造化内足看君貌闲暇市上悬壶岂近名城中得药应同价种来林杏日青青猛虎环行衆不惊岂无诏使求弘景亦有词人传宋清近者江城喜邂逅人生那得长相就丹砂见说可轻身迟子南行觅勾漏

题胡志同所藏牧牛图【志同名泰豫章人善书】

達官肥马饱欲死农家畜牛恒苦饥春田百亩用牛力出入饲之须以时平林苍苍雨如雾散牧前坡自知路今年作苦牛勿辞去岁凶荒阙王赋

题香室僧所藏简天碧松桧图

孤松直立苔满身皮骨老作苍龙鳞墨池得水怒穿壁屋上垂髯寒近人傍有双桧左纹皴短蛟下蹲不敢伸神灵变化或有日雷电时时撼香室

牧牛图歌【并叙】

牧牛图者袁氏之族送其经历君赴潮阳而作也图有竹木水草其间一牛食且饱由由然弛其绳以憩牧者弄禽於其侧而各自得焉盖民之就牧者有类是牛善养之而不害焉则可终岁食其力矣经历君既去潮而归余始获观图於其第且闻潮民多德君者图果有补於是行哉请作歌以题其後後至元四年十月某再拜

我生田间食牛力牛为民命古所惜汉相行逢躬自问齐王坐见心先戚看君此图谁所画牛傍牧者何闲暇哺禽独坐芳草中归遥应过竹林下牛饥或【一作自】食饱或眠养之勿害天者全服箱可以致远道力穡由来知有年吾问长民如此牧养民得肥国当足君不见去年东海头家家卖刀买黄犍

傅与砺诗集卷三

傅与砺诗集卷四

钦定四库全书

傅与砺诗集卷四 元 傅若金 撰五言律诗

发武昌留别诸友

客子南来久京华北望遥交游惊远别文物庆清朝江汉春先动幽燕雪渐消芳年各努力流
岁不相饶

江州社日阻风

社日长为客行人总念羣湓江春过雨庐阜晚生云渌酒治聋饮清弦送别闻风檣未得动坚
坐且论文

大雾过安庆

水郭浮蛟室云帆度客星江空连海白山远入淮青访古聊须到乘流未可停遥疑天柱晓风
雾飒精灵

吕梁洪

巨石中流伏盘涡尽日旋善游因土俗近住有人烟险或过三峡深疑及九渊轻舟脱鱼腹锦?
得徐牵

下邳怀留侯

豪杰关休运乾坤属远猷自须成汉业岂独报韩仇黄石嗟长往青山感昔游同时多草莽事
定覓王侯

对雨

到京余二月听雨独今朝暝压高城暗凉通积水遥犹宜深润泽已足净尘嚣万里甘为客讴
歌乐圣朝

七夕

耿耿玉京夜迢迢银汉流影斜乌鹊树光隐凤凰楼云锦虚张月星房冷闭秋遥怜天帝子辛

苦为牵牛

八月十四夜闻雷

京华万里客已念久离羣月幸中秋见雷惊静夜闻奔腾回朔野黯淡带南云百感西风里星河子细分

中秋有感

万里中秋月孤斋病客心庭闱兼喜惧书问隔浮沉地出西江永天旋北极深苍茫家国意搔首独长吟今夜霓裳曲宫中遂不闻乾坤划惨淡河汉错缤纷鸾背霏寒雾龙髯湿断云巡游多近侍宗社倚元勲日夜瞻銮驾生灵系圣躬都门一骑至血泪万行红桂月虚秋殿梧云冷暮宫孤臣重北望掩袖立西风翠华游幸地怅望感清尘洒竹啼宫女持弓泣野臣金盘残月露玉座倚星辰独有龙鸾气长令草木春

海子上

独步金河上遥看碧海隅桥疑通月窟船或到方壶蛟室寒投杼龙宫夜出珠浮槎八月晚应念客星孤

即事

目断虞渊日心伤魏阙秋霍光元在汉周勃固安刘庙社多佳气公卿足远猷辰居终不改羈旅莫深忧未有龙庭使犹严虎卫兵云山秋色远星月夜楼明逆旅多防盗迁居竟入城窃闻定神器且可慰羣情闻有西宫使还从北极来日浮三岛动天抱五陵回羣志安中土繁星总上台深知社稷计须仗栋梁材

客舍

清商忽已动大暑欲全苏竹响秋声合松凉雨气俱玄蝉依木静苍隼入云孤画扇宁忘汝只伤节候殊

诘陈宗道酒不至淹高刘诸公坐

酒许今晨至灯从昨夜花遣人听击马留客过栖鸦高适邀同坐刘伶兴转賒不成投辖饮怅望隔风沙

赋得天际舟送兵部张孟功治河

日下行人发春晨去鷁催?侵斜月解帆向断云开度鸟窥诗卷垂红映酒杯寻源不可尽奉使几时回

幽居即事

夏木陰森合晴牕隐映开青禽翻露起紫鸽上云回酒自隣人送书因过客裁非关傲朝士真畏犯炎埃地僻连高树庭虚集晚烟鸟衔朱果落虫曳碧丝悬扣户鸣空盎开渠得古钱深惭穷巷客时枉故人牋

咏大树答靳御史

大树高风集惊潮四面【一作静夜】来轮困蟠厚地萧瑟撼平台雨暗蛟龙出天清鸛鹤回明堂须重负岁晚见奇材造化涵滋息神灵会渺茫色分羣木秀陰覆数家凉白昼鸣风雨玄冬度雪霜因知免樵采故解拂云长

送别汪仲罕赴处州丽水簿

枯苍晴树里远色正氛【一作氤】氲江白连苍海山青入缙云俱传习主簿兼似鲍参军县路多行客看诗定覓君

夜宿揭监丞斋馆

旅舍尘都满斋居意自幽花时晴独往树底暮相留诗许家僮学书从坐客求何因谢拘东来往屋东头山东王僉事君实数因书问讯以诗代答三首

都门相送别千里只驰情寄鴈经时到乘?累月行春浮海岱阔风入泗沂清遥忆题诗处花开乱晓莺闻道轺车出观风处处临汶流春雨净梁甫夕烟沉书到能相问诗成想独吟京华万里客牢落损乡心君家琼树好斋馆旧相辉客至看皆惜春来见亦稀迟迟数字往悄悄寸心违无限临风意何能把绣衣

送金华王琴士还山

年少京华客【一作士】囊琴暂出山忽闻春水满径逐暮云还三洞飘玄鹤双溪下白鸂应寻牧羊子时过緑萝关

寒江独钓图

岁暮渔竿客天寒向水云孤舟清泛泛双鬓白纷纷雪树微茫见风筝缥缈闻王车如出猎何处定逢君

次孙伯刚鹤雏诗韵二首

弱羽为人养卑栖每自归步苔依坐石窥竹映开扉絶岛秋云回空庭夕露微纷纷野田雀终日稻梁肥青田伏始出华屋到如归水立风行沼庭凄月入扉已含仙气足犹混羽虫微寥廓终高去轩墀岂自肥

题画扇

絶境羣峰合深居积水蟠俗人来已少山客见犹难朱阁凭风回青林蓄雨寒此中宜野服何事欲朝冠

挽苏郎中

蚤岁攻铅槩长材异斗筭如何违画省即复返青郊朝士伤任隗乡人慕薛包新城风树晚行客泪痕交时事多违乾坤露易曦斯人嗟已远令子足相辉白日明珠树青云起绣衣能令墓前石终古照山扉

得舍弟书有喜

忽有乡关客能传舍弟书披衣喜不定倒屣问何如竹巷新容马花溪夜得鱼吾亲足自慰邻舍总安居

和雨中桃

烂漫多临水霏微乱塞蹊燕轻沾叶喜莺满坐枝低歌袖归时湿行舟望处送夜闻春涨发因忆武陵溪

中秋分题赋广寒殿

月殿悬银榜云阶倚玉梯沆寥天上出回合雾中迷御气通黄道仙音合白霓行人不敢近桂树长皆齐

奉和揭监丞立春病中之作

京华频立春年老更迎新汗竹从官事储参养病身乾坤万化出日月四时均小阁长吟里清诗独过人相思梅蘂春复见柳条新霜雪频过眼云霄各置身感时怀子美违俗忆灵均肺病今何似朝来未见人

近日

近日人皆弃方春客未还忆寻云外路吟看雨余山庭草通行屐檐花对掩关萧然坐离索此物慰羈顔独客书空坐惊尘过眼飞亦知穷巷窃能使故人稀雪树晴犹湿春苗暖渐肥风光历庭户多谢不相违

揭监丞枉和仍韵奉谢

花树莺初乱江城鴈欲还春愁兼独坐暮色更千山风雨蛟龙宅星辰虎豹关年华将世故不用损朱顔城阙春风起楼台雾雨飞杂花移欲遍幽树种仍稀水鸟时时狎林鸟个个肥独怜生事拙常与世情违

寄题余泰昌隐居

闻说幽栖处遥连郁水天径开移竹地渠饮灌花泉坐客留倾酿隣人访草玄京华远游子那得共盘旋

挽徐希韩【浦城人性好竹号筠山】

少日遭离乱经年葺丧亡吟诗自可老好竹未能忘学舍余春雨封丘对夕阳传经仍不泯遗泽故应长

挽徐春山【浦城人葬岩岭】

道路干戈後田园积累余族凋年歉粟儿课夜分书岩树成新冢山花落故居欲从高士传潜德在乡间

和王着作晓起偶成

宿雨过前林微风泛客襟蜚沾槐下屐蛛挂竹间琴同巷常疑远过门转觉深知君挥玉麈挥罢更长吟

卢沟桥

古道旷秋色平桥卧夕阳水声西下急山气北来长数骑凌空阔孤烟入渺茫人传耕种地宿昔战争场

拒马河

落日苍茫里秋风慷慨多燕云余古色易水尚寒波岸絶舡通马沙交路入河行人悲旧事含愤说荆轲

萨天锡画屏

入坐闻流水开屏见远山路通烟树窈窕对野桥闲拄杖晴俱出渔舟暝独还祇慙万里客尘土污朱颜娟娟幽竹好个个倚天长白日含烟雨清秋动雪霜浑疑过云梦犹忆对潇湘何日开三径吹笙引凤凰

延津渡河

驿路南征远河津晓渡危风霆划荡云日互参差鸣橹中流急悬帆出湫迟交州却回日应及水清时

金竹道中书题驿壁

征南万里使行道畏蹉跎平壤踰淮少青山入楚多田依深谷转路迫断厓过後夜南楼月羈离奈尔何

对雨

飞雨飘飏至庭树发余荣随云纵渡阁从风杂入楹依微方露密羃历配丝轻繁思良难理虚襟坐复清

道傍松

鬱鬱羣松里萧萧数骑行色愁侵碧寒畏入衣清远雾看时合微风听处生栋梁须汝在来往莫相轻

石塘驿

道路清秋莫林峦白昼昏入松云气满傍竹雨声繁信马知前驿闻鸡识近村偶然逢水石真使慕田园

蒲圻道

萧瑟行松竹蜿蜒出薜萝地临江北重水近岳阳多赤壁残云去青山宿雨过登高望不极怀古意如何

港口晓行

早起星犹在前行路稍分人家隔树见山鸟过桥闻涧响多於雨林昏半是云晓逢力田者愧

尔一生勤

临湘

宿雨愁泥滑长途畏日斜黄归断径犊青聚古祠鸦野屋时依竹山园各种茶巴陵看渐近遥识故人家

平江道中

洞庭南去路幕阜翠峻嶒走马千峯过哦诗万谷膺竹深围乱棘松老落寒藤明日长沙道梅花发未曾

熊黑岭

百折疲登顿羣峯互接联风烟含古木云日射寒泉路出飞猱上江流去鸟前据鞍临絶顶注目尽遥天

柳先生祠

江抱零陵郡山藏钴鉞潭古人如水去祠树与天参述作笼诸子风骚过二南後來窃时誉吾辈得无惭才大常为累居深允自安虫蛇沾翰墨鱼鸟识衣冠息壤风烟古愚溪月露寒经过怀古迹系马重盘桓

桂林

桂林南望远山路与云连浅水清涵石攢峯乱刺天干戈仍岁月瘴疠接风烟蛮寇何能定边氓亦可怜

宾州

过岭冬犹热缘山夜未宁树残兵後赭草发烧余青西寇迷仙雾南人恨使星民居日稀少唯见短长亭

仙奕山

絶壁青天里危亭緑树中云封丹竈冷日照石平空五岭尘犹暗三山路岂通黎民忧盗贼何处覓仙翁

大小石垒

崦嵫山如削崎岖路欲荒竹繁兼雾暗藤落与风长鸣鸟时相近垂猿巧自藏只疑人事隔随处药苗香

腊日入安南

冬入安南国云迎使者轺郡闻秦日置柱想汉时标江路篁犹箨山田稻始苗皇恩涵远迕行役不辞遥

凭高

世祖初开业安南早贡琛国蟠蜗角小地接犬牙深使节犹频入蛮兵莫见侵数州须拯恤万感寄登临

佗覽驿

日月低铜柱云霄下玺书山通汉使道田统马人居文字雕题後衣裳断发余槟榔杂鸡黍相迓满郊墟

将归

道路南驰远山河北望深班超晚投笔杨震夜辞金事往徒劳问诗成只自吟昔人闲倚柱谁谢此时心

答别龙州萧从事韶

北极丝纶下南陲政化通灵槎浮度斗瘴草偃随风殊俗难为别清谈喜屡同驰驱不可住心切大明宫使节明金虎腰弓偃画蛇蛮夷趋号令原隰见光华边树犹含绿江梅各放花忆君依幕府何日定还家

还闻柳州破道阻将泝江

交趾方通使宾州忽被围还闻山路塞径就水程归上府空金碗前军老铁衣谁能平政化不事总戎机

梧州嘉鱼亭

舟楫回沙驿旌旗驻郡亭江通五甓白天落九疑青此日瞻云气谁家见客星军须昼夜急寇盗【一作掠】几时宁

崇仁峡元日思亲

野宿逢新岁乡书隔故园树间深倚棹沙际迴开樽水影摇江獭岩声应峡猿高堂鹤发在万里忆儿孙

别静江文学诸公

乍见先愁去将行未忍分字期归後寄歌畏别时闻驿树通春雨江船隔夜云驱驰念吾弟羽翼待诸君

和智礼部早发兴安

早发兴安道人瞻奉使槎雨来鸣近树云去落谁家解?眠看竹哦诗独煮茶归程足幽意莫向市朝夸

浯溪

舣棹依江岸寻桥过寺门竹深题字满苔古刻文昏石色兼云冷溪声杂雨喧浯亭正何处为覓漫郎孙

石镜

方石开玄鑒寒辉截古铜映天浑欲回含物坐疑空云影无时度江光尽日通往来多自照妍丑莫相蒙

衡湘驿

烽火连诸郡旌旗转百蛮野莺先客至江鴈及春还吴楚青天回潇湘白日闲登临慰怀抱况复近乡关

长沙见严亲

游子方春至严亲尽日怜别来忧道路喜定问山川百粤元过岭三湘总入天归朝诚努力江上莫留连

金陵晚睡

金陵古形胜晚望思迢遥白日余孤塔青山见六朝燕迷花底巷鸦散柳陰桥城下秦淮水年年自落潮

沛县

县路迷青草行人?綠杨时逢沛父老能说汉君王芒砀来秋气彭城送夕阳凭高发慷慨远色正苍苍

六月二十八日至京

使节违双阙天书下百蛮雨蒸归日路云合去时山岭表兵犹动溱阳驾未还安边数策在不得犯龙顏

中秋同王叔善诸公分韵得中书字

皓月开良夜清□洗大空气浮银阙动光与玉壶通雾露分毫末河山得镜中寂寥今夕会欢喜故人同城阙临秋迴庭轩抱月虚桂枝凉可把桐叶净堪书会合惊时序飘零忆里闾壶觴聯共引文字足相於

题陈大禧山水

古木风烟底遥山雾露余野船依渡小村舍隔林虚路暗疑闻犬江清或见鱼行人向何处应就白云居

赋赠秋海楼埏

长天尽碧海远色赴高楼日涌层波夜风回絕岛秋鉤帘逢鹤度倚柱见龙游何日临空濶从君望十洲

胡廷英箕山别业

高年余菊水别筑在箕山野鹤行相逐溪云出自还树陰迎客健花下引孙闲游子京尘底闻风欲汗顏

酬黎别驾

远道勤相忆明时愧不才偶乘天藻出亲到越裳来离别留诗卷登临罢酒杯尺书非敢爱南鴈或迟回

酬景德载

迂濶长忧世羈离久任天春归万里别腊尽一书传江汉讴歌底潇湘盗贼前相思未即见真

愧德公贤

和王申伯寄子伯昌叔善

闻有闽中使遥怜阙下寒客袍装恐薄宾馆住宜安天廐千金足霜空万里翰丁宁重远业留简後來观尺素题封远骊珠满把寒长吟中夜起清梦几时安霜雪惊华发风尘惜彩翰王家子弟好吾辈得相观骨?拘游宦田园隔旧乡竹闻删後美松见种来苍着述工何用驱驰苦备尝承家不可坠季子?相望一老淹闽海三年忆帝乡珠非照乘赤壁是礼天苍文物归朝覲声诗托禘尝周南不必恨有子慰深望

挽栝苍姚君卫

南宋倾危日东园隐逸年芝云瀑泉外松月烂柯前自决生营葬人疑坐得仙犹闻化去日能写示儿篇处士樵歌远空山宰木寒田生晚传易陶令早辞官白日开琪树青天下玉棺看君真不死文采映芝兰

挽李森高夫妇

厚德乡评在高情世事违孟光能共隐萧史不同归夜雨悲悬榻秋风忆断机承家足文采同穴有光辉

挽刘侍御

台省思耆旧朝廷失老成遂悲刘寔死犹拟谢安荣星落长沙白霜留建业清湘山夜来月还照泪纵横

京师守岁

日月催时序乾坤隔晦明残年万里梦今夕几人情久客烦朋友双亲倚弟兄深惭须薄禄不得谢浮名

次黄次举韵

寻君已出俗久立向空庭把袂惊相得开樽愧独醒雪余梁树白山忆故园青未有同归日哦诗且共听蚤岁违乡里终年恋阙庭久同今日俗敢谓古人醒奉使心常赤逢人眼倍青纪行多近事愁思不堪听

送罗宪使

双阙除书下三山綉使来荔枝迎马拆茉莉近人开轻箬行时把单衣上日裁不须愁湿热水雪满乌台使节安邦郡轺车出帝京星连百粤动风过七闽清贡赋东南入疮痍日夜生到官频访问常使慰羣情

发通州

燕骑经旬发吴船此日行树知风起色帆识雨来声骤转长林暗斜分絶塞明河流今夜满无复滞归程野树龙葱合官桥屈曲通入天迷远近看日得西东酒旆青摇水渔罾白映空时还问村落何必似城中

河西务

驿路通畿甸敖仓俯漕河骑瞻南日去帆听北风过燕蓟舟车会江淮贡赋多近闻愁米价素食定如何

直沽口

远漕通诸岛深流会两河鸟依沙树小鱼傍海潮多转粟昏秋入行舟日夜过兵民杂居久一半解吴歌海戍沙为堡人家苇织帘使催通漕米兵捕入京盐蟹忆霜时贱蚊愁夏夜添归人倚船坐闲爱草纖纖

五月二日青州

舟行旦复莫愁坐惜离羣斜日看帆影微风爱水纹乡心增渺渺节物渐纷纷何处榴花色如今似舞裙

长芦

水国常含卤沙场业煮盐转输分使出征樵置官监桥坏仍通市船来总落帆依依道傍柳无赖拂征衫

秦邮

缥缈平湖白微茫远树青田分高下水道俯短长亭鹅鸭烟中乱鱼虾雨里腥秦邮看渐近城郭记曾经

湖中方洲即景

野屋垂杨里方洲积水回船通菰叶过门对藕花开岂是嫌城府真疑断往来居人惜未学诗

句不能裁

安庆

驿路通淮甸归人及皖城山围天柱起江赴海门倾孤塔凌风回危楼近水明舟中频怅望犹忆去时程

初归

远道起乡国中宵梦弟兄松篁数里见桑柘十年成慈母惊相问隣儿笑共迎无钱未是恨骨?慰离情

送罗克一为李太守之金陵市书

泮水诸侯学名山太史书万籤悬日乱层阁伫云虚发帑增收蓄升堂备卷舒知君远行役不敢独怀居银汉通秋使金陵入晓行人称蜀太守士得鲁诸生画舫归时重青编到日成惟应问俗者因尔得风声

灿明叟修崇庆寺

坏刹连嚣市新功啓施财斧斤云外集楼殿日中开紺树明珠网青莲映宝台极知龙象法终倚栋梁材银汉兴危构金轮转大车像严香是国僧至饭如家半岭晨飞锡诸天昼雨花林泉浑欲改城市忽疑除

西隐庵

大隐还依市空林旧结庐犹闻拔宅去谁见入壶居闾树围僧衲山花落梵书幽人数来往高兴定何如

送巩志道桂宪使

宪使才名旧南还岁月迟湘中独发夜岭外早行时暑雨过榕树凉风起桂枝殊方慎寢食莫遣发成丝相见嗟已晚相知情独真一生多好直终岁少言贫岂是经微禄祇应念老亲送君徒怅望心迹不堪陈五岭连乌府羣贤列綉衣闭门文史足巡郡简书稀日月明丹徼风雪满翠微时劳念踈远吾道亦光辉

卧病

风雨长沙郡泥涂陋巷居病嗟眠食少贫觉往还踈杨柳低牕湿莓苔映座虚淹留未足恨昆

弟久无书

志道雨中留饭

急雨侵危坐长衢滞独行乾坤一气塞沟壑衆流生巢鸟忧漂户江鸥喜结盟主人因饭客对此未忘情箕毕星多好江湖水乱行暑兼云气湿秋共客愁生东海犹闻变南夷数背盟相逢得相慰世故莫关情

张振卿见访和韵

漂泊怜生事经过念索居紫苔归鹤晚青竹照萤疎避俗门多掩期人席久虚题诗拟相属桐叶正堪书近闻长者辙能到故人居青眼非关傲苍头或见疎孤城秋水回高树夕阳虚想见池亭里归来试草书

挽黄君政

弃吏初安业遗荣乐莫年药同康伯价书异石公传庭月余秋树湖云隔夜泉岳阳耆旧在挥泪鄂山前

竹树图

匠石求林尽伶伦制律余画图开莽苍牕户起萧疎江汉秋云迴潇湘夜月虚故山泉石在种植意如何

挽朱斗南

乡里生离乱丘园老治平读书长嗜义推食岂求名南斗龙光在西冈马鬣成儿孙哭遗业寒日黯铭旌

常宁刘百户园林

胜地通虚馆遥天出乱峯市声临水絶云影到池逢溪筱摇飞凤庭柯走蛻龙田庐应可老尊俎日相从颇爱将军第幽同处士园石浮春雨翠溪抱夕阳喧虎鬬空悬壁熊居数过门遥疑花树底鸡犬近仙源少壮从戎事归休遂野情鶡冠时自着龙剑夜犹鸣竹下思羊仲瓜前感邵平知君纵幽赏心已薄浮名春日名园好常时俗客稀树间斜引径花外别开扉沙鸟随行李池鱼上钓肥往来祇适兴出处已忘机小隐依侯甸芳筵照客星傍梅杯泻白当竹座含青山气分南岳江光赴北亭暂游聯自记重到忆曾经

善原道弟原性处问舍弟信

令弟来衡岳何时出桂林干戈百粤外舟楫五湖深惜别长回首言归总慰心岭南子季在书问岂浮沉

送巴陵谕张复心

化俗须文物成功録岁年禄微那避事官冷亦称贤俎豆诸生在弦歌一邑传洞庭临别日总有送行篇

挽杨都曹

都县师秦吏江湖屈楚材上官劳荐引中路坐迂回宾幙秋莲废仙源夕树开佳儿旧相好闻问不胜哀

美齐东王师献

圣代昭耆德王家重伯兄性疑元亮简心见伯夷清海岱成高隐江淮罢远行潜夫堪着论处士岂虚名太史书遗逸今时见古人曾参无更娶原宪有长贫粮絶宁终饿庠焚竟自陈高情嗟已矣薄俗愧真淳

义上人求母沔阳

开士辞家早慈亲割爱深倚门思一见飞锡誓相寻鴈度云移寺乌啼月照林此时忧白发长路政关心受法从西竺怀恩限北堂书来一洒泪经罢九回肠汉沔连春水江湖散夕阳袈裟柁楼底远色正苍苍

答杨闻礼

家学存先业囊书受异人江湖行欲徧山水宿相亲黄壤罗翁仲青云满縉绅百年多宅兆融结任鸿钧城市逢君地庭轩为客开花陰通杖屨木末见楼台对雨传飞觥看云抚画幃淹留未觉久犹恐过黄梅

和赠陈与之

午日清江道南风满緑苹暮年为客健长路对人贫忆弟余双鬓还家称一身有孙堪慰眼莫厌把盃频

桃源图

闻说避秦地花间忘岁年偶逢渔父问长使世人传丘壑浑疑幻林庐或近仙至今图画里惆

怅武陵船

送云间师游剡

杖锡违萧水风帆向武林海红秋树远江黑暮钟深云起通香气潮来合梵音亦知无住着随处得安心吴越青山乱隋唐古寺多雨中持钵去松下棹船过业净唯诗在心空奈法何故山明月夜犹恐忆烟萝

傅与砺诗集卷四

傅与砺诗集卷五

<集部,别集类,金至元,傅与砺诗文集__诗集>

钦定四库全书

傅与砺诗集卷五 元 傅若金 撰七言律诗

道士矶阻风过吕相墓

危樯风急晚相依闲谒荒坟吊落晖白酒暂谋同辈饮青山因感昔人非荆襄万里空残堞吴楚千帆掠断矶今古高门总丘墓英雄何用苦沾衣

韩淮陰庙

淮陰万古英雄恨楚树荒荒夕照残水夹废城春草合云昏遗庙野花寒封齐安用真王印兴汉空余大将坛高帝旌旗俱寂寞断碑零落後人看

桃源道中

忆曾亲到武陵回忽遇桃源偶自猜岂有水通仙洞去只疑花映县门开日明画戟官船上风猎黄旗御膳来想得故园寒食节共言游子近燕台

宿迁舟行

天涯风物最关情每问舟人计驿程几处新蔬随晏食谁家艳杏照春晴水通淮海波涛壮地入青徐土壤平正忆祓除逢上巳可慚寥落过清明

黄河

黄河万古来天上白日千雷鬬地中浮水巨鼇时出曝傍巢灵鹄自知风神珠化浊何由得仙木寻源或可通闻道千年圣人出此生何幸见时丰

徐州

断山数里见浮图水树微茫映日踈舟楫尽经危石过人烟稍近白云居朱陈村远思遗俗楚汉台荒想故墟万古风帆自来往新诗吟罢独踟躇

沛公亭

遥山寂寂对危亭坏础欹沙柳自青四海久非刘社稷千秋犹有汉精灵丰西水散烟沉浦碭北云迷雨入庭坐想酒酣思猛士歌风台下晚冥冥

济州遇大风

黑风扬海舟欲翻黄尘蔽天白日昏牵江百丈有寒色转野孤蓬无定根少年涉历深世故长路艰难销客魂坐笑杞人真不慧浮生久已信乾坤

会通河伯祠晚眺

水神祠下晚维舟闲倚穹碑诵远游西日射云明兽几北风吹土集貂裘漳川近绕幽燕出汶水分兼济漯流过客岂知疏凿苦当时荷锺几人愁

至京

京国古为形胜地野人今识帝王居无时云气浮金阙尽夜奎文映玉除岂复常何须论事蚤闻司马已成书?中独有长杨赋欲向何门曳客裾

咏怀

一春风浪淹行客六月尘埃满上京邻馆朝烟同杵臼故园暮雨隔柴荆西州近日犹防寇南诏经年久用兵独夜起瞻龙虎气五云终绕凤凰城

驾发

天门晓启黄金鑰路马遥翻碧玉蹄银烛荧荧花外出翠蕤冉冉柳边迷千官劔佩屯云合五卫旌旗拥日齐後夜龙沙驻清蹕侍臣不寝听鸣鸡

呈王继学大参特领江东宪二首

丈人文律擅风骚往昔朝中属望劳宣室近闻徵贾傅汉廷重见遣王褒苍松雪後森森直玉树风前凜凜高几处疮痍待苏息遥瞻使节下江臯

蚤年弄笔向山阿行径春深长薜萝逸驾未能攀屈宋苦心虚拟过陰何南游泽国黄尘满北望都门紫气多最说蓬莱旧仙侣妙音时复奏云和

登楼

楼上秋风吹画屏楼前秋思满都亭金河水去涓涓碧琼岛云来冉冉青近见萧何成第宅旧

闻汲黯在朝廷明时进用多英杰迂腐深惭守一经

秋兴五首

天上旌旗卷莫寒人间鼓角送悲酸瑶池日落回青鸟月殿浮云掩素鸾杨柳渐稀秋瑟瑟芙蓉已老露漙漙砧声苦近南隣客寥落羁怀强自宽

落木萧萧满帝畿候虫飞处趣寒机客星入斗秋深见神女行云日晏归复喜诸公扶社稷祇怜弱弟奉庭闱短章讽罢频回首目送江南鸿鴈飞

梧桐树晚细含烟闾阖门深总映天龙去鼎湖云漠漠鹤吟华表月涓涓东都日望金舆发南徼犹惊羽檄传只在忠良勤夙夜五陵佳气故依然

白日遥看锦绣悬重重楼阁隐青烟化城或在诸天外方丈长疑积水连每说神僧飞杖锡更闻童女上楼舡西风日暮何萧瑟一度凭高一惘然

敝裘已畏早寒侵岁月祇惊久客心莫倚长卿能作赋始知季子故多金天门守虎星辰冷云气从龙雾雨深直北关山时极目背人聊复短长吟

题张齐公祠

将军结髮事先朝百战山河血未消总说霁云能慷慨兼闻去病最嫖姚烟尘剑戟迷秋峒风雨旌旗落暮潮自古英雄须庙食精灵何待楚辞招

送湘中李从事赴郴幕

长沙上游山水窟郴阳自古说名邦天围翠岳连三楚地合清湘赴九江归去收书经石室坐来挂版对寒窗西风惨淡都门别莫爱青楼倒玉缸

和宋子与病中

知君憔悴对医师总为庭闱接梦思去国休题王粲赋忧时苦爱杜陵诗关河落日传飞箭城阙高秋遶画旗自有羣公勤辅翊不妨羁旅暂栖迟

寄汉阳黎暹州

郎官湖头秋月辉大别山下暮烟微隣家竹好题诗到别墅花浓放棹归稚子摊书黄叶下野人送酒白鱼肥惟应对客多清兴解念征尘染素衣

寄冯架阁

风沙独走燕台路秋思长悬楚观云直北橐驼终日见向南鸿鴈几回闻过门每忆逢春雨迁
讐能应坐夕曛数就行人问消息知名总说汉冯君

崇天门朝贺

輶路尘清列羽林侍臣鹄立肃森森风含凤吹青冥阔日射龙旗紫极深两庑佩趋临水玉九
门诏出映泥金从来汤武须传业更在伊周老尽心

雪中次元茂才

北阙今晨雪满墀腐儒忧国畏人知月寒弱水迷三岛云暗苍梧失九疑瑞木细飘天上叶梅
花潜发岭南枝山陰那得乘佳兴起遶前轩自咏诗

客馆对雪

主人并马清晨出独客挥毫白昼吟空院雪花时近眼故园梅蕊总关心天迷汉节南征远目
冷燕台北望深但使年丰成国用敢论游子少黄金

元日

漂零京国逢元日俯仰乾坤任四时天上椒花虚作颂江南梅蕊废题诗三山日动苍龙阙六
管云回翠凤旗元老议成周典礼小儒思见汉官仪

正月十七日丽正门观迎接口号

南徼旌旗万里回中天城阙九重开龙门仗簇青云起鹤禁香通紫气来父老多流去日汨公
卿不乏济时材已闻奉玺归金室早听趋朝进玉杯

和宋架阁病後出游

近说能诗宋之问还同多病汉相如出门跨马惊春晚临水闻莺似梦余柳边苑路通飞观花
底宫泉溜决渠每历凤城多杂兴须君把笔更来书

送贺尚书致仕後赴召上都

使者徵行立晓风宰臣传诏守离宫关中旧忆留萧相江左俱看赴谢公路经琴峡秋声满天
绕滦河御气通闻说至尊劳睿想莫令行色後宾鸿

送唐子华赴嘉兴照磨【子华名棣吴兴人善画】

闻君秋思满南湖行李今晨发帝都
幙府初乘从事马江城还忆步兵鲈
树浮白日山侵越潮蹴青天海入吴
闲暇凭高动诗兴须成一醉扫新图

和孙太常元日

日射天门海雾晴云飘仙路岛风轻
柳边仗出开旗影花底朝回散佩声
为客频占新岁事思亲复起故乡情
不论万里羁离苦惟愿朝中政化平

澧阳桥

谢家作桥涔水上行客题诗江雾中
天接五溪南去永地连三楚北来通
青龙莫见云汀湿乌鹄秋闲月渚空
闻说道傍多骏马何人环佩立西风

春雪次韵

才见天花散碧寥即看庭树失青条
侵香静向金虬拂舞轻兼彩燕飘
只怪春丛俱烂漫可知年谷最丰饶
蹇驴莫出多诗思却恐傍人拟灞桥

出郭

晴光缥缈泛青春远色氤氲动紫尘
出郭自因芳意早寻幽兼得野情新
花边古寺翔金爵树底高坟卧石麟
却倚层丘望城阙上方云气绕龙鳞

送会稽方泳道之松阳令

松阳令尹之官去三月都门柳拂衣
作郡旧闻成式在去乡今见买臣归
春光绕县居人满秋柿连村过卒稀
从此管弦遍闾里看君鳧舄近云飞

寄河间赵运使

雪尽官河春水生移家还出凤凰城
竹间退食占灵鹊花外题诗听早莺
盐井青烟晨缥缈漕沟素月夜分明
京华久客遥相忆欲托音书不称情

送临川僧明极

天寧堂中云所居生公聚石意何如
山前振锡应逢鹤池上开函或召鱼
有时风树鸣珠网当昼天花坠宝书
岂忆今晨送师处蓊门南望说乡闾

送马伯成书大典恩授学官待次归

蚤闻献赋拟扬雄晚说传经出马融
载笔旧登天禄阁将书能到大明宫
苑花送酒归时发江树迎舡去处通
会待诗书化干櫓青灯重约故人同

送杜德常御史赴西台二首

御史才华旧省郎翩翩云路起鵷行
天回紫阁明奎壁地切乌台动雪霜
分陕定存周礼乐过秦犹有汉文章
欲因巡郡还搜访别酒临风意独长

绣衣此别定如何驄马西行处处过
驿树苍茫连灞滻江花浩荡过岷峨
三秦久诉诛求尽六诏仍闻警急多
早听封章切肝胆为怜编户困兵戈

忆到京华未相识将诗往往向人传
只慙燕石登重柜岂有骊珠出九渊
青云满路逢倾盖白日临岐送着鞭
好去南城访遗谱杜陵自古盛才贤

送方从事赴潮州二首

阙下风流秘省郎移官万里向潮阳
树边海气浮天阔云底洄流出地长
见客惟应辞薏苡思亲定复忆桄榔
诸公佐郡多能事日对韩山送酒觞

都门十月把征衣肠断千峯木叶飞
江上也知鲈膾美岭南还恐鴈书稀
梅花月落晨趋府榕树云生昼掩扉
幕下故人如问讯帝乡为客未能归

寄潮州袁经历

去岁京华叹别离千回坐想到州时
潮人载酒昌黎宅海客移船广利祠
南去只凭相忆字北来频问近题诗
岭梅处处开应好何得春前送一枝

送蒙古潘学正

奎宿凝华协帝符龟图呈画照坤舆
衣冠治定通重译竹帛文同变六书
分教已从官独冷致身寧论术犹踈
明朝鼓棹潇湘去处处秋秔荐白鱼

次韵元日朝贺

宫漏催朝烛影斜千官鸣玉动晨鸦
交龙拥日明丹旰飞凤随云绕画车
宴罢戴花经苑路诗成传草到山家
小儒未得随冠冕遥听钧天隔彩霞

对雨怀揭监丞病起

微雨霏空坐转添把书终日对廉纖雾交忽复深连海风引时能近拂帘树底征鞍愁易湿花边坐席喜相沾孰知病起多幽思行乐时时过画檐

答张自观自江右赠诗至燕

十年江国苦淹留万里京华恣远游坐客浪传鹦鹉赋市人争指驪驪裘久疑传说骑箕尾空使张华望斗牛此日朝廷盛文物春来相望莫深愁

和揭监丞闻王少监宅二月梅花盛开

南州腊近梅偏盛北地寒多暖始繁总为萧疎含冷色独判迟暮答春恩谁家爱树开幽径此日逢花忆故园何逊能诗意无限莫将愁思绕孤根

送周士稚归盱江二首

华子冈头春色幽麻姑洞口好山稠天晴暗草生归思日暮浓花唤别愁岐路不堪长送客故乡那得便同舟知君文力驱江海岂学苏秦着弊裘

为客京华岁易迁看君游倦独幡然更同夜语何由得不漫春还也自贤作赋未成前殿奏论经犹拟後生传仲舒况有贤良策汉主经营最盛年

和孔学文从奏延春阁

宫漏沉沉晓仗移衮衣当殿听朝时风含鸡舌飘青琐日射龙鳞动赤墀奏对御筵多密近退趋春院总委蛇喜闻近日稀游幸阁下儒臣出每迟

题王晋之崆峒山房

君家堂上小崆峒开凿犹疑见禹功青润每愁灵雨至白虚常喜细泉通缙山远色来琴底艮岳余姿落座中欲侍轩辕亲问道广成何许倚秋风【小空同石名】

秋日巡山和王君实四首

大驾常年幸旧都守臣巡徼礼如初西山云气来仙岛北极天文绕帝居龙去欲腾秋水剑鴈回疑得上林书山河满目今全盛戢武才多国未虚

九重城阙拟清都万井闾阎倍国初但见貔貅无急警始知鸡犬亦安居鈎陈月转秋移仗太

一天低夜降书圣主肃兴思辅治由来廊庙不宜虚

巡山千骑接神都谷满秋田露下初烽火不闻乘夜警人烟多见入云居百年礼乐成周典万古山河列汉书喜有新诗继风雅诸公才气总凌虚

衣冠如雨耀神都郊甸新凉拂马初日月近临黄阁贵风云遥限紫宸居少陵漫拟陈三赋司马先能着八书想见九关严守虎玉堂金殿最清虚

七月十一日赴安南

燕城秋早五云开路入南交几月回奉使始从天上出行人争看日边来班超万里终投笔郭隗千金更筑台圣主恩深极炎海伏波铜柱任苍苔

马上

四牡光华照早秋路人传看使交州青云北起飞龙阙白日西明洗马沟山上浮图兵後石道边斤堠古时丘据鞍欲访前朝业沙草微茫水自流

涿州楼桑村先主庙二首

先主君臣并材杰天倾炎汉苦须扶曹瞒力尽才分国葛亮谋成竟托孤道路只今通陇蜀山河无复限荆吴行人为指楼桑庙肠断西风散白乌

孤村缥缈见灵祠废宅苍茫失故基蜀鬼夜还风满盖涿人朝祭雨沾旗玺文定复归寒水桑影犹疑覆短篱终古乡间有遗恨衣冠空想汉威仪

登真定龙兴寺阁

网户层层映日开宝栏曲曲近云回水连钜鹿河流合山走封龙岳气来天乐有时飘下界佛香终日覆前台微躯新病宜高爽倚柱长吟莫却回

公事毕重发京师

故人送别古城头已去重来不敢留司马旧为持节使洪乔今作置书邮路蟠冀魏通江汉山尽荆吴入斗牛却到日南应万里早春还忆凤凰楼

范阳

督亢陂前草没沙武安庙下客思家西风落日犹驱马北地秋陰亦见蛇不劳邹衍重吹律何

得张骞独泛槎从此南征思何限象林铜柱更天涯

栾城驿

极目荒城断复连古人遗迹种为田陈余墓没秋云里栾武台荒夕照前岂有声名惊絶域惟将文字纪流年西风传舍尘萧瑟南北经行亦可怜

赵州石梁隋李春造上有张果老驴迹

赵州南梁石壮哉李春旧刻暗尘埃水流日月隋唐去山卷风烟冀魏开白驴谁见仙翁度?马今迎使者来却恨秦人驾东海谩劳心力望蓬莱【梁作桥】

磁州

晓出邯郸露满空武安红树起西风鼓山路向云间落湓水船从地底通秋草尚疑曹氏塚野花无复赵王宫古来富贵皆黄土莫笑行人忆梦中

武城

武城村南十丈尘百回立马问行人古台坏雨埋铜爵高冢移云卧石麟三分早恨英雄死九锡深悲命数频万古漳河自来往秋来临眺最伤神

淇州

汤陰县前秋气悲路人为说纣亡时比干死諫犹存墓西伯拘幽尚有祠草没废城牛牧远树侵官道鸟飞迟西风落叶成多感行过朝歌却赋诗

汴梁

汴上荒城绕故宫山头危石堕秋风夷门市起闻嘶马梁苑樵归见断鸿鬬草尚余残後碧进花无复盛时红欲登高处肠先断满目闲愁赋未工

上蔡

上蔡城头黄叶多闻鸡看剑起长歌徒怜丞相东门犬犹忆将军半夜鹅树底衣裳沾雾雨马前灯火动星河凉风满路吹行铎那似金门听玉珂

汝南

驿骑如云远自天眼中陈蔡郁相连高尘映日飞黄雾乱木含风舞翠烟汝水近通城北路礮山遥带郡西田经过莫怪频回首无限秋怀揽辔前

武昌

武昌城中山气凉欲行还住意何长荆衡树暗来狄雨江汉栖高下夕阳祢衡作赋愁鹦鹉李白题诗忆凤凰此去朝廷今未远南征烟火日相望

登南岳二首

衡阳烟树翠重重知有僊居近古松采药犹嫌山鬼识诵经不使世人逢日光冷射朱陵洞云气晴熏紫盖峰惟恨南征逼霜雪未能相逐徧携筇

万壑千峰次第开祝融最上气崔嵬九江水尽荆扬去百粤山连翼轸来入树恐侵玄帝宅牵萝思上赤灵台明年更拟寻春兴应及潇湘鴈北回

兴安县

乱峰如剑不知名篁竹萧萧送驿程转粟未休离水役负戈犹发夜郎兵百蛮日落朱旗暗九岭风来画角清空使腐儒多感慨西南羣盗几时平

谒罗池庙

柳州刺史爱罗池庙食千秋傍水涯隔坐桄榔风瑟瑟近檐橄?露垂垂唐碑载事班前史楚曲迎神叶古词欲借题籤卜行役祇慙无礼强知诗

书南寧驿

岁晚驰驱忆帝京北风回首重关情中天日月回金阙南极星辰绕玉衡父老尚烦司马檄蛮夷须用伏波兵也知文德能柔远传道新恩欲罢征

次韵智礼部赠黄忠州

旧临边镇早从戎新遣诸郎亦有功留在豹韬知合变佩来龙剑识英?西山几月烽烟定南土当年贡赋通会见文翁化成俗不劳壮士挽强弓

书如月江桥市驿

迢迢旌节指天隅历历山川载地图市发朝霞晴卷布江生明月【珠名】夜还珠礼从陆贾

来时定俗自任延去後殊亲见蛮邦慕冠冕只今圣德似唐虞

泸江

泸江之水发南诏龙编古城居下流冯夷伐鼓迎汉节泉客弄珠随越舟鲸海遥连白日动鳌山近戴青天浮层波莫据鼃鼃险日夜东归未敢休

题天使馆

元统三年颁正朔诏书还到极南开使旌入馆青云动仙盖临江白日回谕蜀岂劳司马檄朝周终见越裳来还家耆旧应相问文化如今遍九垓

却侍姬【连夕蒙遣侍姬皆即辞却我辈非陶谷辈人不宜以此见】

夜宿安南天使馆主人供帐烂相辉宝香【一作熏】烬起风过席银烛花偏月照帟王母谩劳青鸟至文箫先放彩鸾归书生自是心如铁莫遣行云乱湿夜

落梅

梅蕊纷纷落小池粉墙犹护折残枝临风见影时堪惜步月闻香每自疑万点扑檐飘乍急数回沾帽拂还迟北来羌管多愁思好谢行人且莫吹

华林村

华林步头江径迂晴烟渺渺见村墟水边茆屋围青竹树底柴扉掩绿蔬国老把杯齐送别馆人操纸解求书归程正遇寒花发满处清香逐使车

崇仁峡

扁舟夜宿鱼龙窟久客长怀虎豹关岁暮思家成白发天涯持酒得青山张骞浪喜蒲萄入马援终嫌薏苡还天子只今劳遣使将军何日遂平蛮

赠黄天瑞【临江人善奕棋当路喜之遂得巡徼之职】

岭外相逢春正寒知君能奕动衣冠风帘落子花摇席夜烛收枰月转阑松下或寻仙客对竹间应任野樵看由来此道通兵法即遣筹边也未难

寄雅正卿

送别都门秋叶飞临岐犹记把征衣
峽南岁月莺啼早江北风沙鴈过稀
张骞奉使经年至马援平戎几日归
却望旌麾倍惆怅往来人事苦相违

桂林喜吕仲实金宪至

正月交州奉使归忽闻鞍马发王畿
岭南障雨开铜柱江上春云逐绣衣
草热虫蛇常并出树深豺虎近皆肥
明朝按节劳谘访边郡于今未解围

寄湖广金宪姚子徵

忆君骢马赴金陵送别题诗久未能
秋後也知鴈自击春来惟恨鴈无凭
洞庭地坼连青草林邑天回带白藤
南北驰驱只相望飞霜何处濯炎蒸

过故妻墓

湘皋烟草绿纷纷洒泪东风忆细君
每恨姮娥工入月虚疑神女解为云
花陰午坐闲金剪竹里春愁冷翠裙
留得旧时残绣在伤心不忍读回文

洞庭连天楼

崔嵬古庙压危沙缥缈飞楼入断霞
南极千峯迷楚越西江衆水混渝巴
蛟人夜出风低草龙女春还雨湿花
北倚阑干望京国故人何处认星槎

和黎别驾飘然楼

老子楼居颇近僊楼东常系泛湖船
衣冠已任隣人识文字兼从过客传
桂夕把杯还问月花时吹管欲乘烟
登临莫苦怀乡国着述犹堪托暮年

送罗用宾靖州教官兼简诸从事

柳色新袍照洞庭西南几夜候文星
水浮七泽通黔白山拥三苗过峽青
铜鼓不劳归铸马绛帷还见坐横经
府中从事君知己应共哦诗使六丁

龙翔寺

梵王宫殿倚青冥先帝旌幢拥百灵
宝网自鸣空里乐琅函时出赐来经
近山凤去花仍碧遥海龙归树独青
玉輦宸游竟寥廓行人挥泪读新铭

凤凰台

太白题诗凤游处古台萧索换流年风流偶出齐梁後文藻犹含晋宋前淮水夜明沧海月石城春暗秣陵烟古来宫殿俱无迹风雨凭高独黯然

候友人不至戏作

仪真城下菖蒲节晴日江头锦绣文旗影送船侵树过笛声催鼓隔花闻双龙镜化闲风雨五马歌沉暗水云日莫故人期未至谁家看舞石榴裙

送奎章典书王可宾归陈

儒臣侍讲黄金殿阁吏依光白玉除亲在未沾三釜禄使回先寄数行书丛台日莫啼乌鸟蔡水霜清见鲤鱼归到高堂说文治五云遥指帝王都

送张良佐归乡

知君京国久飘零旧隐南宫树色青平子莫年能作赋志和初岁已明经石田每恐荒秋雨银汉虚劳问客星闻道乡心与诗思夜随寒月遶柴扃

挽刘汉璋

旧游京国梦林泉老就扬州筑墓田海上遂疑徐市去济南谁得伏生传药栏寂寂临春水松馆萧萧对暮烟身後愧君名或泯故人哀思倍凄然

送笃御史之南台二首

旅馆天寒尽日空绣衣临访走儿童已闻俗客惊题凤更讶隣人失避骢短缺实愁归後见清樽虚拟别时同明朝振策秦淮道惆怅燕云隔断虹

金陵台畔栢森森马首飞霜已满林定有文章兼论建岂无风采属登临东隅地限诸夷远南服天围五岭深吴楚诛求极困敝干戈饥馑转关心

送赵仲礼御史兼呈王侍御五首

文章御史久为郎南赴金陵道路长百粤云山连楚大六朝烟树入隋荒清秋按郡行骢马落日登台咏凤凰新喜诸公振风采早闻当道去豺狼

都门相送意踟蹰别路秋生白羽车霜雪总看鵬去疾风烟那问燕来踈岭南斥堠愁烽燧江左诛求畏简书白面少年空解事绣衣行县定何如

建业城头乌乱啼知君感古夜闻鸡荆杨贡赋元趋鲁晋宋文章渐入齐草疏或依松影坐哦
诗应就竹陰题书来宜忆京华客日日长衢听马嘶

袞袞晴云塞要津终闻圣主用儒臣蜀都文物来西汉奎阁图书近北辰此日赐官簪獬廌暮
年留像画麒麟极知风俗须扬激肯使贤才但隐沦

赐车南粤初归日驻楫秦淮欲莫天啸咏偶经梁旧寺登临犹忆晋诸贤谢安别墅虫鸣里王
导新台鸟去前多谢府中贤侍御别时能作送行篇

和马中丞送丑子元按部湖广

法星夜入斗南天人候乘骢动隔年岭外转输疲郡邑海隅征戍废田园马援定地思标柱苏
武归朝恨啗毡想见巡行得风俗尚论信赏劝才贤

题奥屯主簿藏其叔沧江公翰墨

从父旧为湖北使老年亦就汉阳居晴登大别题黄鹤暖立沧江翫白鱼杜佐未忘工部学庾
郎休慕右军书只今耆旧凋零尽抚养伤怀淚满裾

次韵曾士敏寄其子经筵典书元杰二首

南丰老人鹤髮稀遥怜令子客邦畿步随玉佩趋延阁书发金绳对袞衣休怪赤駟终日去也
知苍隼得秋飞江边吟罢无人见拄杖时能陟翠微

天涯游子日思归行李何时发帝畿司马未论金换赋买臣终欲锦为衣紫駟车动秋尘合黄
犬书回莫雪飞我亦乡心满江浦千山烟树正霏微

宋氏西亭

宋家亭子渭城西宾主幽寻每杖藜把酒柱间桑树远披衣墙下麦苗齐雷霆暝闭龙门石烟
雾晴生瓠子堤何日相从览奇胜新诗还对野人题

重午寓揭公馆

翰林宅中值重午节物惊人心欲摧汨罗万古烟波去幽蓟今朝风雨来山中菖蒲已可服庭
下石榴犹未开主人总有故园意与客慰藉共倾杯

送熊天瑞南归

豫章先生筋力优既老携书能远游风烟迢迢燕蓟晚日月蹉跎梁宋秋青灯独夜有归梦白髮终年无客愁京国今晨却南去将诗万卷更何求

送林彦广祠南北镇

中使传香下玉墀儒臣代祀出金闺旛幢北起开恒岳舟楫东回入会稽望海也知晨驻马渡江休信夜然犀名山见说多仙气应得从容散杖藜

咏林广文种竹

高斋丛竹珍如玉手种堦前看发生故土已兼云带至新稍都谢雨催成坐中曙接淇园緑檐下秋含嶰谷声见说主人多野趣客来从看不通名

旧叶萧萧槁复青新丛细细斩还生斲当醉日愁仍损浇过炎天讶忽成步月独归贪翫影临风闲坐喜闻声相过况是无尘俗青简留题最盛名

寄王君实二首

北望衣冠忆省郎远随车驾幸滦阳苑中苜蓿空骐驎池上梧桐起凤凰中使有时传赐酒近臣何处避含香上林此日无来鴈吟罢题书欲断肠

游子江南生事微五年京国梦柴扉弹冠总为王阳在垂橐虚随陆贾归藜藿已秋仍寄食芰荷当暑未成衣诸公也念求升斗日夜高堂白髮稀

送王思文上舍

京华日夜忆庭闱路接南天思欲飞衡岳数峰开缥缈洞庭千树入霏微馆中共惜何蕃去江上应逢宋玉归来岁花开拟相覓预愁烟雨湿春衣

题陈从古寿藏可居亭二首

浮世百年那得知丘原同尽不须悲云间拔宅星河冷海上求仙日月迟盖棺只合生前定荷锺徒劳醉後随絶爱可居亭下客青山相好即相期

山中筑室真堪老身後知归即是仙预断竹根开秘壤亲栽松树遶空阡一生慷慨飞鸢外千岁风流化鹤前想见登临增旷逵酒壶棋局任流年

送孙伯起掾岭北二首

久为掾吏趋公府忽去亲朋赴朔城黑水旧闻龙北起青天惟见鴈南征苍茫部落连诸邸迤
邐山河接两京王室由来重藩屏省郎切莫负才名

北去频闻霜雪多驿程犹是过滦河悲风絶幕回苍隼落日穹庐卧紫駝行色且谋寒夜饮别
怀休忆醉时?都门已隔千行柳况复乡山老薜萝

题纪静卿竹围

闻君种竹今成围绕舍青青手自治花坞犯根休听斲韭畦妨笋更教移即通好客深开径稍
断行人远插篱因忆故园荒欲尽为君怅望一题诗

寄鄂季弟幼霖并寄仲弟次舟二首

弟兄终岁长羁旅南北何时却定居春至数瞻衡岳鴈秋来犹食武昌鱼每愁年长须经事即
恐家贫废读书仲氏应门独辛苦平安消息近何如

吾亲霜髻日纷纷为客艰难不使闻养老只须常善饭生儿何必总能文书同洛下思黄耳心
似河阳见白云季弟还家报兄好归期犹恐过春分

闻张吏部督海运归咏怀奉简二首

日边双节下沧溟云际千艘赴驿亭直为邦畿须转粟也因江海念流萍玉京永夜瞻卿月银
汉清秋识使星待尽西风始相见客愁如酒一时醒

絶域归来岁月过应怜辛苦涉风波楚人不得轻毛遂汉使因能屈赵佗自古诸溪连盗贼祇
今五岭徧干戈微官乞就江南地直念庭闱白髮多

别山北宪掾傅子通二首

边城置驿往来通宪府临藩政化同三语忽传收荐鹗一经犹得佐乘骢辽东地尽玄菟阔漠
北天寒白霰空此去行秋勿容易吾先台阁旧生风

北望车尘损客顏涂阳万水复千山乾坤岁莫多离别道路天青忽往还海鹤朝吟风满旆冥
鸿夜度月临关此时马上应相忆却羨寒云尽日闲

九日同陈道之携酒过揭公

每岁登高喜重九今秋天地独堪惊青山即恐西风满白日长愁北极倾【时地动】故人对
酒思陶令今上求言忆贾生忽见新诗使肠断看云对菊泪纵横

安南使馈香因分送京下诸公

南粤名香屑异材
远人持赠比琼瑰
采经铜柱秋云湿
熏对珠崖夕雨开
入朝喜见朱鸢定
充贡还随白雉来
久忆诸公拟分送
却愁薏苡误相猜

送着书曹裕之赴铨

京国风尘共起居
朝廷文物用吹嘘
不缘张斐能推律
谁识虞卿解着书
江路月明梅渐发
蓊门霜落柳全疎
看君被檄南州去
即见青云动里闾

酬黎别驾

天涯为别动经年
空有音书托鴈传
时见远人来阙下
不忘孤客去江边
青山访竹云生褐
埜寺寻僧雪拥氍
想得郎官湖上月
清辉长共此心悬

送东宫说书周仁袁归里

知子京华厌久居
慈闱多病忆江鱼
云深鹤禁辞通藉
月暗螺江梦倚闾
别骑冷随沙树远
归舟晴照埜梅疎
独慚岁莫仍羈旅
肠断千峰隔敝庐

傅与砺诗集卷五

傅与砺诗集卷六

钦定四库全书

傅与砺诗集卷六 元 傅若金 撰七言律诗

元日朝贺後闻赦

紫殿风云会搢绅荣光又逐岁华新近时铁马清南海昨夜金鸡动北辰法令已行秦郡县礼仪仍见汉君臣独劳圣主哀黔首还以殊恩服远人

春蒐和贺伯更

竹殿千旗拂紫宫臂鹰年少喜遭逢子云赋好谁能荐司马才高不得从天外帛书无过鴈苑边云气尽成龙金輿早晚还双阙玉体寻常镇九重

鹰隼晨飞马正骄驾鹅春过雪初消鸣鞘捷应金鞬脱荐鼎肥胜玉筋挑朱袖拂云归苑近翠华吹雨度山遥即今谁入熊罴兆空使愁心似柳条

送临川黄次举南岳巡检

客游帝城今几春忽闻归思满江滨谁怜日月淹文举自爱云山入徼巡潇湘树合瞻南岳临汝花开忆北人若过长沙访耆旧更因回鴈寄书频

送赵宗吉御史兼寄笃敬夫

只今台阁用文儒几处疮痍待扫除念我北游同社燕看君南去食鲋鱼云霄旧载郎官笔江海新乘御史车若值故人凭寄语金陵诗思近何如

和危山臞寄弟四首

天子开朝策治安近臣每入漏初残香飘紫殿回金爵仗下彤庭度玉鸾御苑纵田春正乐边城吹角夜犹酸腐儒未省经邦计直道休歌行路难

画戟连云甲第高内官如雨送春醪贡金半铸分封印赐锦多裁侍宴袍自古圣明非独治至今材武系相遭文章且共安微命廊庙由今录旧劳

故园兄弟总相思久客怀归屡失期司马却惭题柱早东方翻恨上书迟都门树暗愁中见乡国花繁别後知昨日南桥访春水望云回首独多时

天涯骨肉久离居京国风尘鬓欲踈
娱日强倾开岁酒忆家频看隔年书
路通一水花开里门掩千峰木秀初
便拟邀君此时发归舟同食楚江鱼

送梁实翁免催铁归乡

几年催铁困吾州乡井供输日夜愁
废冶月明谁鼓铸空村民散更诛求
岂闻兔肾成干莫虚拟龙光在斗牛
此日罢征君倍喜楚江春色满归舟

壽王左丞

南极诸星映赤霄东风二月满青条
焚香凤阁春开宴鸣玉龙墀午散朝
但使经纶齐稷契不劳服食慕松乔
日长自度昇平曲闻听云间合九韶

野航亭

孤亭闻道小如舟来客闲能学棹讴
常疑竹里通归桨只拟花间弄钓钩
月明入剡宁论夜风起思吴不待秋
城市谁知有江海烟波祇在屋东头

送卢茂实之广东宪幙二首

僊城近接衆山回宪府遥临百粤开
海上喜通持节使幙中兼得济时材
蛟宫织罢鱼龙出蟹户珠还蚌蛤来
预想到官多暇日清诗题徧岭头梅

京国相逢念客游微官初试岭南州
越裳白雉亲曾识勾漏丹砂岂愿求
荒径久违元亮宅故山犹隔仲宣楼
瓜期况在经年後未得相从狎海鸥

城东遇雨

四月銮舆出凤城此时游子动归程
蓬莱一水通云气闾阖千门度雨声
书卷喜从船尾载酒盃愁就马头倾
长年三老欢相语沙际河流一夜生

送张尚德改除雩都萃头巡检

儒官乘障气飘飘章贡南边路不遥
纵使人烟连百粤也胜风俗混三苗
春行近市盃随手夜逻前山箭在腰
直以诗书化强御不劳铜柱入云标

寄王君实张孟功赵子期三首【子期名期至顺进士篆书冠世】

左司衡监冠时流忆昨相逢早见收
介子初还汉使节鄂君又泛越人舟
诗因海燕犹须寄书

换池鷺或可求不有文章夸异俗天涯何以慰羈愁

吏部先为画省郎独怜驱马向殊方越裳万里来中国楚客三年忆故乡度岭敢辞南海热溯江终忆北风长清诗诵罢频回首愁絶都门柳万行

兵部风标映海霞只今人物数才华六书尽学周王鼓重译亲通汉使槎每喜名公能荐士最怜游子独思家诗成定覓何人寄日日江头访鴈沙

寄李仲伦孙伯刚兼呈张吏部

微官万里向南溟却望京华树色青最忆故人能作赋只怜多士废明经孙阳遂使知名马李白虚传是列星东道喜逢贤吏部岂无余力致青冥

寄王叔善兼呈子山内相二首

为客长歌行路难得君真使旅愁寛也知文气来西汉敢以诗名敌建安秋榻每当明月下春山闲就乱云看只今清兴谁能共纵有朱弦不肯弹

学士高操今罕俦主人与客俱风流花连紫阁天文动树隔青宫月影稠长杨献赋仍须荐曲几行书不待求楚客南归苦相忆系船时复忆江楼

寄陈维禎兼呈揭公公许为故妻作传二首

官树青青隔帝阍维舟北望每消魂风来独使占云气雨罢频劳测水痕下榻往时同假馆吟诗清夜忆过门君家太史今司马着述时应教外孙

太史临文笔最精一闻往事独伤情每怜对镜窥鸾舞犹怪吹箫逐凤鸣列女未终刘向传故妻虚瘞柳州铭书成定寄湘江浦预拟招魂学楚声

澌州示同舟

来时岐路满沙边回首何堪问岁年槎上独乘犹是客坐中同载或疑仙风鸥乱起还依草雨燕卑飞却避船旧见垂杨已如此往来能使几人怜

眉山图

眉山自古闻天下此日逢君出画图空翠忽浮云气合江流还浸月轮孤独疑参井通秦塞始信岷峨限蜀都见说直西多鸟道懒从开国问鱼凫

送王检校止善二首【前海道经历】

海上三年幕府开日边万里荐书来却承雨露归南省还接星辰绕上台负弩应怜县令至怀章莫使郡人猜京华昨日同时发惭愧扁舟独後回

江左名藩天下雄吴中贡赋与闽通转输旧倚萧丞相检校新烦魏侍中画省芙蓉深映雨碧湖杨柳近含风於今幕府多名胜闲暇登临定得同

赠黄仕任地理

蚤岁为儒颇恨疎中年游艺独何如谢公自制登山屐郭氏亲留相地书丹壑夜营仙客苑青溪晨访野人居他时期子千峯下为卜云林更结庐

题阮谦仲客子光陰集游吴小稿後二首

江上经年别故林天涯何物写乡心长亭莽苍含朝莫岐路峥嵘对古今行世共怜车辙满忧时恒恐鬓毛侵嗣宗文采诸孙在亦有幽怀托苦吟

江左传君处处过六朝文物近如何齐梁祖述风流尽吴越登临感慨多雨暗海门秋对酒天晴江浦夜闻歌此行賸喜添诗兴莫向流年叹逝波

题山谷萧峡诗後【为阮谦仲所得】

太史遗风不可寻祇饶遗墨重千金云烟惨淡连萧峡风雨苍茫入阮林持翫每淹孤客坐买藏终见两贤心向来豪夺今何在抚卷长歌百感深

题罗士哲画送张仲简谒虞杜二先生

满幅晴烟写别离行人江浦放歌时树深一水通临汝花发千峰到武夷问字只携门外酒寻仙岂看洞中碁扁舟却出名山路应得藏书慰所思

方壶

蓬莱员峤对嵯峨知有羣仙日日过琪树晓通云气近羽轮秋会月明多秦人采药空依海汉使乘槎但入河谁识高斋有仙岛不劳万里涉风波

围春亭

暖风迟日布云林中有华亭结构深窗户每兼山翠合衣巾无复市尘侵居人隔坞求花气游

客巡墙得树陰始信桃园浑不远欲从渔父一相寻

送胡一清北游

早闻闭户读春秋近说辞家赋远游怀玉空迷父母国贡金终入帝王州中天城阙连阊阖东壁图书近冕旒自是圣明思至理可无俊彦应旁求

清意斋为一清题

高斋闻道无尘俗好客惟应数往来幽共白云秋缥缈迴同玄鹤夜徘徊水边坐石时依竹雪後寻溪独见梅况有文章每相发也知韦柳最多才

答何好礼

凤凰城中花若烟客游多是感流年春生江汉思南国雪尽幽并见北边远使岂贪归有橐微官仍苦坐无毡相逢未恨今晨别满把骊珠慰目前

赠相地姚立雪

闻君早得青囊秘藜杖登临日几峯花?或寻仙洞出树间时与异人逢只疑东海闻归鹤莫怪南阳有卧龙吾郡古称山水国白云常伴往来踪

送何时春北上

何郎早赋远游篇忼慷题诗向别筵自古衣冠多爱士只今台阁况求贤秦吴道路元通楚赵魏人才总入燕好向明时致勲业莫将风雨负华年

送何时学游湖南北

涔阳极浦远帆多忆昨狂游是处过今日送君如梦寐少年为客莫蹉跎沅湘日落明秋叶江汉风回乱夕波若过楚累凭借问沙头芳草近如何

送朱道夫涿州伏化巡检三首

郁林文学负才华刀笔三年滞海涯乘障复趋丹徼远问途应傍碧虚斜山中绿酒开浮螳石上雕弓照画蛇南望桂枝相忆苦使来先许寄长沙

伏化官居倚竹棚此邦幽絕少炎蒸洞穿白石通勾漏江泛清浚转猛陵挥翰有时风在竹罢琴中夜月侵藤遥知盗贼今全息独使才情得见称

去年京国欲离羣前日潇湘喜见君
边吏只今多用武世儒何事独能文
湘南作客迷春草岭表思亲隔暮云
莫怪书生佩弓矢起家犹忆汉将军

西江石梁二首

西江断桥不可渡好事架石横
清冷遂疑云海通三岛无复天河限
两星夜涉不愁风满濑晓行还爱月
浮汀遥知溪客多幽兴炎夏频来倚
画亭

西江波浪日沄沄驱石成桥事出羣
常怜乌鹊空依月只怪蛟龙未得云
中流屋影晴先见别浦滩声夜转闻
知有驷车当过此蜀中司马最能文

送蒙税使【江东人为新淦务使】

闻君监税独多年行旅皆称使者贤
江岭近通南海货市门深聚北风船
金陵晓雨归帆外玉笥晴云祖帐前
若到京华论国计莫令官府重缗钱

刘汉中张天彝邀饮

二子才情自不羣座中宾客总能文
酒壶烂漫倾春露歌扇留连驻暮云
湘树别时春冉冉江蓠归处绿纷纷
闲门此日偏相忆风雨萧条不共闻

同孔学敏游仙游观二首

凤音亭下草如熏谁见仙姝倚翠裙
环佩忽疑游处得笙箫犹想去时闻
湘江竹暗连春雨衡岳花开隔暮云
千古游人自来往登高回首思纷纷

恒仙宅前江水盈凤凰山下野禽鸣
犹闻采药辞空谷无复焚香礼上清
云里并游金节冷月中同载羽轮轻
登临尽日多惆怅欲倚鸾箫和楚声

题裴思敬别业

宦游江国久为家况有田园楚水涯
直为思亲劳梦寐不堪行役向风沙
故池引径元依竹春院开门总映花
尽道此中多野趣肯因微禄负年华

送严允恭北上

严氏风流着汗青看君年少复明经
上书自拟干天子垂钓谁能问客星
燕蓟北回天漠漠潇湘南下雨冥冥
远游直为明时出自古贤良重汉廷

送薛仲方归涿省墓

淮海飘零忆范阳南来踪迹转苍茫幽燕日落悲长道江汉春深梦故乡家在惟供一洒泪书来祇使百回肠明年何处求先塚北望松楸满路傍

汉江衔山图

西来一水浮襄汉上有羣峯截杳冥层构回临沙渚白乱帆斜?石林青地雄缥缈连嶓冢天险微茫带洞庭咫尺风烟应万里无因一上岷山亭

寄许参政

相第巍巍画省东布衣时许往来通忽闻冠盖辞三殿犹有文章在两宫故园抚树思陶令别墅看花忆谢公楚客南游最相忆扁舟前月到湘中

题壽寧观

壽寧林壑抱清虚上有羣仙旧隐居花里昼愁云失洞竹根晴爱水鸣渠山人自着茅君传弟子亲持柱史书游客暂来还径去未能真与世情疏

题画船入蜀图送黄尚质赴夔州蒙古教授

楚客之官泛蜀船画图盈尺见山川九江树色潇湘外三峡猿声灩澦前方译渐通巴俗语国书新纪汉人传岂无好事能携酒问字时时集讲筵

送平乐尹宋彦礼

湖南大府收羣彦岭表名区得令才边吏赋田疲战伐古人为邑慎怀徠昭潭树傍鸣禽合仙岭花临倚棹开此去风烟隔湘浦知君时忆楚王台

送蒋廷良归省因简袁潮阳

送客湘江见白苹登高怀远况思亲斗牛紫气临三楚吴越青山到七闽南下恰逢香稻熟东游仍忆荔枝新扁舟定过袁宏渚烦寄殷勤问故人

送赵璋甫

名家之驹不易得昔人传业子如何花飞南岳客游远水落西江乡思多太息长怜汉傅策独醒谁和楚累歌归舟岂爱鲈鱼美应恐秋山损薜萝

寄卢经历

去年阙下遇君时御柳千条拂马垂
楚客南来空有赋汉臣北望每能诗
月生庾岭思梅树霜薄交州见荔枝
溟海迢迢苦相忆培风犹倚故人知

送姚子微二首

双阙除书下玉阶三湘回棹拂珠厓
天垂铜柱南低海地入金陵北近淮
江国鴈来秋肃肃驿楼鸡动晓喈喈
大家定有东征赋鲑菜随船慰老怀

野人忆别寸心倾台宪频闻被宠荣
湖外树围乌府立岭头花夹绣衣行
平原未得收毛遂北海亲劳荐祢衡
惭愧駉骀後骐驎西风回首独长鸣

宜江岁晏柬余太守樊别驾

梁楚烟尘日未寧故园迢递感流萍
北风岁暮闻乌鹊南浦天寒见鹄鸕
游子未归心转切故人相爱眼终青
羈栖自喜依仙馆不爲笼鹅写道经

宜江元旦

北望天门拜冕旒宜江晴色满云浮
故人作郡分铜虎新岁行春见土牛
花外乐催银瓮出宴余香逐彩旗收
喜闻近日平诸寇坐使今晨散百忧

和余太守对雪见怀二首

江雪寒连驿树遥鹤裘清坐听萧萧
中天月避光芒合南国云含瘴疠消
因忆玉田春种石乍疑银汉夕通桥
使君辛苦迎骢马也念幽居寄閭寥

闻道停车傍水宫登高怀远赋能工
野寒鹰隼回西日沙晚鳬鹭聚北风
留客每劳分禄米忆家时拟问归篷
阳春欲和休论寡且共长歌答岁丰

送元景说赴茶陵学正二首

一官分教古云阳十月携家过武昌
枫下系舟晴望岳竹间闻瑟暝浮湘
炎灵日落思前帝汉庙风悲感故王
见说此州多士族看君琼树映琳琅

忆在京华跨蹇驴每怜穷巷致回车
嗣宗旷达元耽酒曼倩诙谐早上书
万里尽瞻黄鹄举三年空忆卧龙居
今晨振铎仍南去预拟归来会石渠

题李子亿梅屋

闻君绕屋梅花好，絶似孤山处士居。
雪里夜疑香隔坞，月中晴爱影当书。
洛阳富贵伤华阀，江国风流忆故庐。
昨日宜溪芳树底，相逢春思独何如。

送邓仁康赴龙泉延庆巡检二首

一官万里思求盗，南浦扁舟日夜东。
岁莫荆扬江尽落，时平瓯越路全通。
龙文远弃泉中剑，蛇影高悬壁上弓。
但使一乡称善俗，断无豪客啸秋风。

武功频起汉将军，儒术徒淹郑广文。
也为奉亲需薄禄，便堪乘障累微勲。
同舟夜梦巴陵月，行李秋瞻鴈荡云。
来岁岭南逢驿使，松舟消息许相闻。

别孔学礼

感君相爱复相亲，岂有文章解过人。
书法未通吴郡草，诗名虚拟杜陵贫。
晴游别谷留兼日，夜宿幽斋语达晨。
别後湘江见回鴈，帛书无惜寄衣频。

送刘子谦赴广西帅幕

湖南相倚最相知，惆怅征帆欲去时。
感事每持清论在，怜才犹与故人期。
边城南过低榕叶，幕府春来长桂枝。
舍弟南游借披拂，书回应得慰离思。

刘焕章山居图

司空山前处士居，白云千顷映田庐。
桃花近隔秦人洞，松树深回汉使车。
涧底録觴浮出酒，牀头青简着残书画图。
昨日看茅草，因忆春畦久未鉏。

别刘焕宗

长沙城中夏木清，长沙城外楚江明。
归人尽日思临水，过客常时问入京。
空有使查通外国，每无宾俎置前荣。
相逢又作长途别，多谢西山主送迎。

答刘云章

忆昨浮槎傍海回，只今幽馆向江开。
马卿去蜀夸题柱，郭隗居燕媿筑台。
将诗岂敢逢人诵，载酒空劳共客来。
况复扁舟雨中别，为君临发重徘徊。

巫峡图

十二峰前江水东上疑三蜀路相通青天鸟影连巴峡落日猿声近楚宫每有客舟来系树岂无仙袂去乘风古来奇絶空传尽今日何人赋最工

覓白鸡

君家白鸡异凡种变化恐是西方精食寻丹臼过云影栖近书窗乱月明山鸡映水徒相疾野鹤同林总不惊许寄双双趁画舫竹棚先称雪毛轻

寄方君恕

闻君卧疾近如何闭户时应赋短歌安石或能携妓出子猷常拟棹船过微风倚槛宜修竹落日临池爱绿荷也念湖边未归客秋山回首白云多

送张秀才北上时将赴海南

身逐征帆赴海涯道逢行李问京华涓人解致燕王马卜史工占蜀客槎冠盖早朝星在树管弦春宴月当花盛时繁丽应如昨把酒闻莺肯忆家

夏仁仲兰坡精舍

君家别筑兰坡上好事能来共读书九畹入云秋色迴八牕通月夜光虚唯须杀竹传科斗不待收芸辟蠹鱼闻说四方来已衆买材更拟广楼居

岳阳中秋值安南贡使因怀旧游

洞庭秋气满龙堆为客偏惊节序催铁笛乍闻云外过琼楼应傍月中开越裳重译三年至溟海浮槎八月来忽忆旧游今万里天涯长见鴈飞回

送叶天惠

岳阳学舍古城陰岁晏怜君赋子衿传业岂忧名未立爱亲恒畏老相侵天门挂月乌啼冷梦泽连云鴈去深忆我旧游如昨日逢人离别损乡心

归舟阻风

洞庭十日风势号沙头客舟如系匏沅湘九道白波立衡霍千峯玄雾交神龙欲蛰无定窟黄鹄将归愁故巢咫尺城楼不得上何因一望楚江郊

潘彦宾双剑图

延平津头两神物自是丰城金铁精一朝变化风雷合八极
轰腾烟雾生黑蟠海气通无底白射虹光簸大明岩穴
谁能识霖雨形求先已慰羣情

余嘉宾伴送南使因过家岳阳有诗寄賸和答

越裳贡使出皇州送节南来满路秋乘传过家须倍喜
拥旄归国莫深愁南宫雨露通仙馆东壁星辰接御楼
也念故人炎海去都门何日却相求

王氏相师山庄三首

相师之山云窈冥千崖万壑倚空青上方雷雨藏天井
南极风烟落洞庭溪客去迷花蔼蔼野人居爱竹泠泠
何时遂买登山屐乘兴还来叩石扃

王子高标玉树秋是中泉石称风流胜同辋口居摩诘
清似山陰过子猷一壑风烟临载酒百年才思接登楼
田园日涉今成趣还忆前人感钓游

茆堂闻在断崖居耕凿真疑与世踈黄石洞依秋树冷
子房祠映古苔虚山人自述潜夫论部使空求处士书
见说田间多野兴每惭为客负犁鉏

雪中舟过武昌寄黎别驾二首

日南老子擅文章自昔来朝住汉阳二顷赐田家仅给
百年归国路偏长藏书每欲存科斗吹管犹能学凤凰
近日还闻厌城市题诗多在水西庄

八十之翁恒苦吟一怀故国一伤心千兵入越年犹少
九译朝周岁已深汗竹功成青史後结茅兴聚白云陰
江头归客劳相忆雪夜扁舟何处寻

答何大成

别来短发不胜搔千里还家一緼袍开径自惊春竹冷
过门犹记古松高云中得鴈通书疏雨里笼鹅致酒醪
寂寞腐儒村舍晚烦君文字数相褒

送月明德经历赴工部主事三首

清江地狭仍凋弊上府文繁费剗裁忽报郎官天上召
遂烦使者日边来考工夙已明周礼利用犹宜致楚材
忽有去思情万叠数占云气望蓬莱

明公为政已多闻久客还家喜识君始信明珠能破浊
也知良骥蚤空羣分明汉策存经术零落秦书见籀文
此去扁舟各南北天涯相忆万重云

俭府才华夺上宾各官僚属近清尘月寒乌鹊愁依树日落狐狸喜瞰人乡校久歌公在泮兴梁今见客知津独令文字存遗爱此日谁能借寇恂

赠陈与之

处士穷居已白头春来思泛五湖舟不逢太守知徐孺空使时人惜邓攸一代衣冠余老大百年文物见风流承家独恃诸孙好奉杖相逢慰客愁

赠壽上人之五台约归同虞学士游匡庐

飞锡初闻度岭头看山复作五台游天花杂还来狮座海树微茫?蜃楼即可是中依上首更於何处覓同流颇闻李白匡庐下迟子归来共泛舟

赠黄仲宣

君家城南当市喧昔者读书恒闭门三年作吏淹下邑一日辞亲远故园尘里骊驹久困辱云间黄鹄即飞翻业成愿子勿留滞堂上春来思树萱

送孔伯吾拜祖林

三孔风流谱牒存祖林迢递隔中原家全科斗经秦世路逐爰居过鲁门阙里苍苍云树合闾宫寂寂雨烟昏始知圣德同天地长使恩波及子孙

和杨支直度岭韵

使君三月岭南还五马翩翩晓度关郡邑去思多下泪道途安稳一开颜粤音劝酒通殊俗汉隶题诗徧近山圣主求贤念耆旧丘园那得便投闲

高明楼

江上孤城映水回市中层构出尘开衡庐树入青天尽章贡波翻白日来每曰陈登门有客最传王粲赋多才阡千百尺应能借乘兴谁同月下杯

赠刘天予

每闻章贡多奇术不独杨曾得异书龙忆葬时天子至鹤疑仙後世人踈几家华屋成高冢千载青山照倚闾此日因君聊借问刘郎荷插意何如

送纯德中

翩翩杖锡响空飞五月松风满翠微
禅悟已将诗共入道孤元与俗相违
匡庐迤逦盘秋雾禹穴苍茫散夕晖
此外名山何日徧优昙花发及时归

题胡伯有官溪山阁

湖上羣山浮翠陰山阿高阁涌清浔
天虚彭蠡风帆尽地下鍾陵雾雨深
文字数从名士得壶觞频约故人临
却怜城府无仙分咫尺溪源不可寻

贈侯务本

异人墨诀世稀闻病起论方喜见君
即贡尚方知不媿偶来萧寺许同分
置开玄豹春含雾图戏骊龙昼起云
从此临池增笔势书成祇恐费鷺羣

洪都再贈

忆昨相过愜素闻鍾陵五月更逢君
题诗岂敢传千里学字空能爱八分
树里叩门衣带雨竹间试墨砚生云
送行忽起青冥思黄鹄高飞自不羣

送杨仲刚之藤州学正

苍梧之南多树林石州黄舍郁萧森
紫藤影落书帷静青桂香依礼殿深
殊俗干戈恒满眼古人庠序最关心
亲逢舍弟烦相语日望乡书抵万金

题陈可立所藏邵庵书画後

丹青不见王中允歌赋长怀杜拾遗
一代风流传妙墨百年胜迹寄清词
骊珠出海人能得白璧连城世鲜知
从此华峰多宝气斗南中夜起相思

美陈兰宝州判新修高风书院

圣贤祠宇高峰下风雨漂摇感慨多
兴学遂烦新柱石来游不使废弦歌
旗临碧水晴云动碑映苍山夕照过
遗爱百年何所系诸生朝夕诵菁莪

罗济川百鴈图

天南鸿鴈百为羣泽国微茫岛屿分
飞逐稻粱时共集宿惊蒲苇近相闻
潇湘夜渡霜浮月渤海春还水映云
坐数修程感行客挥弦目送总纷纷

答张德晖

昔年为客上燕台身负虚名媿不才处士有星今始识故人如雨日同来应怜薄宦趋南海岂有雄文动上台欲答新吟正惆怅渴心先近岭头梅

送普上人游浙柬柯学士

寒山寺前江气深吴王池苑正萧森枫根系艇秋重到竹里悬灯夜独吟禅客往还无定蹟古人兴废不关心将诗为访柯供奉想见挥毫风满林

答张仲韩

君家华鄂映堦除红颊修髯画不如树下酒香留客醉竹间诗就遣儿书高飞每喜瞻黄鹄远别亲劳赋白驹海上他年却归日维舟还覓故人居

送释道原游方

九江东去尽沧溟无数云山拥地灵金屐春游云满路木林夜渡月浮灯有时鹤下愁冲锡何处龙来喜听经踏遍诸方应得道故乡烟树正青青

周尚志同归寓所适寺门已闭会宿张伯龙宅

清秋为客依僧寺落日逢君过客窗并座总看人似玉临觴反畏酒如江曲终别院归银烛钟罢回郎闭石幢已去却还仍不恶论诗未觉寸心降

和韵送虎怨斋侍父降香玉笥

萧水东南翠作堆洞天飞路蹑崔嵬晴林守虎花含雾【或作舞非】陰壑行龙树起雷使者旌幢天上至仙人环佩月中回随车况有双珠在【一作树】灵雨霏霏濯暮埃

王顔复丹墨

妙墨早传乌玉玦洪炉更伏紫金丹研磨尽日资文字服食何时致羽翰云中鸡犬飞皆去灯下虫鱼注未乾此诀定从方士得异书寧遣俗人看

题渝南黄敬道耕馐所

州桥南畔足田庐应避嚣尘远卜居傍舍水泉通釜錡隔林烟火映犁锄行人午值田中饭过使春停树下车见说全家咸隐服【或作趣】白头宾敬晚如初

赠陈乘溟【善相地理星命】

闻子奇胸贮海涛逢人冰监察秋毫浮槎夜历飞星近扶木朝回出日高预知仙冢来孤鹤亲
见神山戴六鳌河伯尚来空自负拟垂鹏翼共游遨

送胡汉杰北上

我昔尚幼君壮年下笔看君词涌泉离羣每独吟招隐怀旧何因访草玄长卿志大新还蜀乐
毅才多晚入燕此遇贵游如见问烦君为出赠行篇

寄别林允恭兼简其子鍾英

为客常年去里闾归来踪迹到城疎期人每恨违鸡黍忆弟频劳致鴈书逐禄今晨濒海去卜
隣何日对门居知君膝下斑衣好看竹焚香意自如

赴广经九牛驿次文居安韵

自怜薄宦尚南游共载人疑李郭舟传舍风烟停驿马使槎河汉犯牵牛雨篷对语恒连夜霜
角同听况值秋海上到时应岁莫知心独倚慰离愁

奉陈怡庵宪使二首

故家持宪起儒流远道观风控上游采择旧缘明主识操存须与古人侔西江紫气收龙剑南
海清霜薄蜚楼从此殊方无反侧坐令重译颂咨諏

奉使南行载玺书小儒从役谩崎岖解?不顾千金橐题柱祇惭驷马车此日微官犹蹭蹬蚤年
独学况萧疎目今泮水亲时雨会激长江起涸鱼

次韵刘侍中春怀

天涯怀抱非春事海上晴光忽暖风万里厌随游宦远一樽喜得故人同树陰展席闲挥麈松
外停车远避骢想得故园寒食近榆烟花雾近蒙蒙

武昌送友入蜀访故

黄鹤楼南水接天送君西溯锦江船风高马阁苍霞乱日澹龙门白雨悬慷慨欲题司马柱辛
勤应预子云玄故人置榻遥相迟明夜春山隔杜鹃

题栖碧山为淦龚舜咨赋

揭文安公云予欲赋栖碧久矣兴无由起一日临江傅与砺来开卷同赋之余诗未成与砺已

就非不可更作念无可以过与砺也遂易结语而已

山人爱山如李白幽栖还在碧云深松杉绕屋清宵响雷雨悬崖白昼陰石上每同仙客坐花
间犹恐世人寻京华日日多尘土终拟投簪话夙心

傅与砺诗集卷六

傅与砺诗集卷七

<集部,别集类,金至元,傅与砺诗文集—诗集>

钦定四库全书

傅与砺诗集卷七 元 傅若金 撰五言长律

壽陈景让都事四十韵【四月十八日】

种德由来远流芳信有苗名门多令器夫子最高标地迴瞻崧岳天清见斗杓声名从结髮问学自垂髫江汉栖迟久林亭兴致饶紫兰敷【一作依】月露苍竹倚风飏画艇移书放秋灯把剑挑微名寧屑屑高志独器器五气乘昌运羣英集圣朝武功收赫怒文治付宣昭历数初歌禹聪明已赞尧求贤当晏食梦帝起中宵石室仍高隐金台歛见招赐书悬日月乘传出云霄议论紆三顾荣光【或作名非】动百僚入宫催护玺趋府听鸣鑣郊社陈周礼神人协舜韶出关春衣绣分陕夜乘轺觔觔心弥壮豺吞胆共销封章犹恳切归思遽飘飏袞职江湖隔锋车道路遥凝旒思穆穆行李发萧萧典祀尊原庙承厘洽大寥步依文石进香近黼裳飘白日明骢马清霜急阜鵬帝裾遮道引諫草避人烧佐省持三尺绳民究八条兵曹多暇豫郎位益崇超所向才华冠何曾意气骄台评推妙画士望慰深翹引拔【一作进】连茅茹芬芳杂桂椒银章看且佩金鼎竟须调小草方惭出浮萍久恨漂文章殊豹隐篆刻近虫雕徐穉矜悬榻苏秦惜敝貂敢期充砥砺犹幸致刍蕘黄鹄追高举青松托後凋火行占孟月星聚识生朝壽酒开云液仙音出凤箫祇应成远业未可慕松乔【多一作置】

送孔惟中再谒祖林

吾郡称文物君家续圣贤尼山悬日月野树隔云烟追远逢昭代游方及盛年北通三仲谱南下九江船雁起垂纶外鸥飞解缆前水凉闻雨坐沙暝望星眠岱岳遥临海河流远自天路洵洙泗境人指郢鄢田日观朝辉接风雩暮色连闕宫偏寂寂阙里独绵绵翠合知林墓翬飞识庙壝趋庭槐气润拜下柏陰圆蝌蚪残书帙旋虫坏乐县图稽始祖出世别小宗传远近论昭穆尊卑齿後先杖裁楷木净冠截桧皮坚旧俗闻诗礼遗仪见豆笏玉倾当别酒珠写赠行篇古道嗟环辙长途劝着鞭京师同逆旅瀛海限飞仙赋或君王问贫应故旧怜苦噍水合硯危坐雪侵毡鱼目从人贵蛾眉祇自妍犹怀薛氏剑未絶伯牙弦卒业思归鲁离羣遽发燕霜蹄终奋迅风翼暫回旋文忆来时把诗要去日联绿芜羈思满青柳别愁牵为客慙乌乌因君感杜鹃兗城多驿使频寄彩云笺

送彭叔屿归临川却之尼山山长

毓圣由天纵鍾祥絶地灵文开周宇宙神照鲁郊坰泗水烟中白尼山日下青古祠留草创遗躅接音形绵蕞来诸子萧萧享二丁祭田侵後废植木乱中零嗣续仍诗礼衣冠足典型麒麟

思系纓蝌蚪慨遺經建學謀官守推賢慎委令百年興曠典一語動明廷有客真英選多才更妙齡每看明匣劍羞對讀書螢北極凭【一作凭】元氣中台會德星駿收燕市馬甘荐楚江萍紫電纏鱗鬣清霜整鶴翎久疑淪浩蕩忽作附青冥被檄趨鄴邑從人訪孔庭高堂須覲省歸路正伶俜里父窺夢迺家人閉竹扃壺觴春灑灑燈火曙熒熒還舍雖云樂之官不可停云高瞻泰岳雪盡見滄溟驥服長驅阪牛刀始發硎宮牆上日建弦誦坐時听歲月登倉庾春秋其鼎錙市通槐下道壇筑杏陰亭銀漢侵題榜丹霄映勒銘育材須杞梓匡國備參苓木铎流聲教粲盛着德馨乾坤吾道在常使萬邦寧

寄題番易周子震金漳山居

大氣生磅礴元功接杳冥江開吳楚白山矗斗牛青玉牒呈天秘金潭泄地靈百盤工取勢千疊互殊形石吐高低笋峰羅大小屏忽如森隊仗復似倚娉婷六六移諸洞三三映列星靜宜營道室幽或下仙輶客有依文物兒皆尚典型卜藏思買宅佩訓謹趨庭娛老心能遠登高步每停艱難成宿志窳窳慰千齡雨潦供漂木神祇助荐牲史留徐穉傳碑勒蔡邕銘碧水通銀漢蒼霞護石扃暝迷中谷路晴見隔溪亭鳳穴含飛旭龍湫蓄震霆倚廬浮暎靄行徑俯清泠鸞鶴軒羣岫龜蛇泛遠汀陰陽相抱負存沒總安寧種竹期成實栽松擬伏苓久居隣吠息清誦野猿听夜燭吹藜杖朝饗啜土鏹馬卿能作賦韋氏旧傳經伯仲翔鵬鷖東西念鵲鵲辟雍初識面京國共漂萍磊落珠藏棣光芒刃發硎即看培遠業誰得限修翎何日過彭蠡從君載醪醕遂求靈運屐一往眺林垧

送孔學文之湘鄉州判

郡邑頻騷動朝廷失撫綏君繇先聖出政學古人为北極回旋里東門祖餞時家從天上挈官自日邊移雪樹違燕市風帆掠楚祠大江開浩蕩靈岳見參差候吏迎皆喜州人到恐遲苔虛蔣琬宅竹淨褚公池閑暇應携酒登臨得賦詩此邦稱富庶今代益蕃滋地氣湘潭會天文翼軫垂山川曾屢涉風土向來知杭稻金纏穗松杉翠壓枝魚肥春雨窟牛滿夕陽陂禹貢連三澨虞巡接九疑至仁終遠被淳俗未全漓豹隱多文彩鴻飛足羽儀五兵閑警邏千耦樂耘耔听訟寧求異觀風政在茲治成听舉最萬里慰懷思

送陳道之獻書南歸

天子尊圖史朝臣念布韋着書心力苦為客鬢毛稀雷雨羣龍會云霄一鶚飛文風吾郡最經術古文微夫子辭家塾前年入帝畿尘埃白羽扇灯火綵紗帷訓傳多修補文章并發揮揚雄終得荐劉表暫相依歲月初何晚乾坤事每違買臣今日貴伯玉几年非畫省俄傳檄青山遂拂衣嗟予同邑里奉使隔庭闈路出將軍柱河經織女机艱難成國典安穩恃皇威燕蓟繁霜雪衡廬老蕨薇那知萬里道能及一時歸南海連春霧西江遶夕暉他時兩相憶何處采芳菲

送幻上人還高麗

梵宇通辽海僧居属弁韩鳌依三藏立龙近衆香蟠异域今为一游方故不难绣幢来日下金刹满云端世主多尊佛沙门总授官衣传中土徧锡挂上方寒网树珠垂络香林宝刻栏况兹穷壮丽知尔久盘桓故国春频至长途雪又残风沙归寺远岁月作程寛日落经华表天穷得翠峦木杯过渡稳莲座出波乾暮雨鸣斋鼓春风倚钓竿诵经泉客听传鉢海神看行住都如幻虚空未足抟路应归後忆云向坐时观紫极迷天乐青霄隔露盘如逢国王问为【一作还】说圣人安

送苏伯修侍郎分部扈跸

扈圣千官出分曹六职俱侍郎精古学议礼应时须车盖连诸郡衣冠接两都勾陈严内拱屏翳肃前驱滦水开宫殿龙门起画图仗依云气肃人望日华趋马酒来官道驼羹出御厨露疑金作掌冰想玉为壶地絶分寒燠天清习晓晡会朝常咫尺奏对只须臾旧俗怀周雅今贤诵禹谟爱君期得道忧国况为儒久客嗟牢落诸公念朴愚路经南粤险心戴北辰孤汲引劳修细吹嘘倚大炉临风思何限相送独勤劬【议礼一作仪礼】

送胡继叟赴道州知事

天子绥荒服郎官映列星铨曹严遴选幙府待仪刑迢递苍梧郡微茫有庠亭玉京秋始动金掌露先零去路缘湘竹归船傍楚萍道询虞舜治江吊屈原醒丹极元非远苍生久未宁忌投伤器鼠思去食心螟五岭当羣盗千山震百灵日光兵後白云气瘴余青忆昨过洛水寻君隔洞庭北来还邂逅南望正踈嵬网罟今逾密干戈岁未停浩歌怀古昔远别恋朝廷久客缘三釜时人笑一经看君万里翮从此薄青冥

送张尚德之铜山巡检【尚德名仁伟渝人庚申郷贡】

紫气开霜匣青云倚玉梯才名淹下第文学借卑栖度岭初还北浮湘更向西直求乘小障不作叹朝蠶地险连三峡天回带五溪夜郎花外隔盘瓠竹间迷独木剝船小荒茅覆屋低自从归舞羽应总事耕犁秋嶂沉烽燧春亭静鼓鞞弓刀闲暂閱翰墨醉多题玄豹终辞雾苍虬岂恋泥去乡殊出处行道各扳跻离别肠堪断留连手重携上林频候雁中夜共闻鸡归路何由并生涯苦未齐千峯独南去心折鷓鴣啼

登南岳次黄次举韵

楚望尊衡岳虞巡比岱宗朝廷隆正祀神物閤幽踪宫殿回朱鸟幡幢下赤龙玉书何代册金奏古时钟雷雨中天近烟云尽日重岁穰资长养时治徭登封行役心能远幽寻兴颇浓岩栖多映竹仙径稍侵松地轴通三岛天梯挂五峯危藤猿共栗县瀑鴈相冲羽客嗟长往飈车不可从自疑流水隔那与故人逢江汉低鸿鹄乾坤乱蚁蜂飘零真寄世萧索久成冬山戍喧寒柝边城起夕烽抚时多感慨临眺敢从容

送尉彦诚归长沙却之道州经历兼呈外舅孙公

归客长沙道之官有庠城府公资幕画朝士采诗评一郡优为理千山远作程去瞻南岳雁行背上林莺野店逢花发江帆及水生过齐乡吏识入楚路人迎问字从儿好收书任仆争淥醪春酌暖瑶瑟夜闻清禹凿遗天险虞巡界月明感时双鬓改怀古寸心惊盗贼连饥馑科徭半甲兵实怜民未息深倚政能平儒术宁迂阔人材自老成湘东见吾舅遗世独何情【诗一作时】

送杨翼之还清江

同郡晚相得还家君独先艰难万感集离别衆愁牵盗贼凶荒後干戈餉馈前故园思缩地行路叹登天郡国方收马江湖总税船遂嫌居郁郁竟作去翩翩芝岭宁忘世桃源似欲仙游鯤轻万里归鹤异千年已谢苏秦印无论祖逖鞭道瞻匡阜雨山背蓊门烟远色芙蓉浦浓香?稭田藏书犹有壁坐客岂无毡我亦怀三釜谁能乞一钱将诗不敢寄多是断肠篇【牵一作连竟一作径】

奉送达兼善御史赴河南宪金十二韵

圣治尊儒术贤才翼帝躬立朝防触豸行路避乘骢复道河南去先愁冀北空激扬元自任出处岂谋同地絶看持节天长惜转蓬绣衣今日把尺素几时通别酒花开里征帆木落中蓊门悬夜月梁苑度秋风古县藤萝碧霜林果蓀【一作实】红咨询行每徧闲暇赋能工白日明高岳黄河遶故宫登临兴何限题寄北飞鸿

和镗子简国学冰

凌室晨披雾雝宫夏荐冰水晶持欲滴玉气望如蒸积自羣陰渐坚非一夕凝碧涵天左转红射日东升贮盃寒疑漏侵衣薄未胜战休牀下蚁飞失坐中蝇病肺清堪涤饥肠冷易乘诗因词客诵书忆史官称滹水嗟王霸陰山惜李陵时平销甲马岁足赋金缯二气须调燮诸公正业兢寄言老成子四序莫相陵【列子老成子学幻於尹文能翻校四时夏造冰】

登岳阳楼

驰传自青天凭高忆往年阑干映水迴埤垓与云连水会沅湘大山侵楚蜀偏娘郎通别井龙女宅重渊日月鸿蒙里风沙浩荡前骊珠秋後冷犀火夜深然张乐犹疑奏乘槎欲并仙登临停去骑宠饯惜离筵地气南交接天文北极悬赋慙王粲作诗拟杜陵传渺渺衡阳鴈迢迢浪泊鸞早春回汉节应得泛湖船【泊一作拍】

归自安南赠中书掾凌仲明

皇帝初登极殊方总入朝忽逢歌遣使因得佐乘轺白日临丹徼清秋满赤霄三湘缘沮洳五岭度嶢峣旗对风烟动衣垂瘴雾飘解裘轻陆贾投笔愧班超赏典仍叨忝文风正寂寥玉衡凭气运金鼎待人调掾省遭时彦怜才似久要共成毛义喜竟免介推烧山雨知玄豹天风仰皂鵬逢人写怀抱聊复寄歌谣

题方叔高木斋

种树千章合开轩四面临径微通窈窕檐迴起萧森风雨行春气云霄落午陰碧从修竹间青任古苔侵养鹤幽时下垂猿密处吟都因结构好逾觉往来深花发明开卷藤悬拂挂琴闭门唯净石倚杖即深林寥阔天涯梦逍遥岁暮心归舟过彭蠡思尔定相寻

奉和苏授经八月二十九日明仁殿进讲敕赐酒饌许乘舟泛太液池趋西苑之作二首

东壁图书出西周礼乐修燕闲催进牋清切近垂旒圣学天俱运恩波海共流万几思至理三叹赏嘉猷紫气当筵驻青云满殿浮贤应通隐滞佞岂进俳优虎观风移仗龙池雨送舟词章唐后【或作後非】耻训诂汉儒羞明主虚能受诸公问即酬六经悬日月何止监千秋

圣明思善述耆旧倚交修虎豹开闾阖山龙照冕旒日临丹宸动云拂翠华流献纳稽前古都俞协大猷几筵花气合图史竹光浮当宁经纶远尊贤礼数优内厨深出饌西苑近回舟禁脔由来贵溪毛庶可羞遥勤三顾问各奉万年酬牢落南州客相望奈九秋

送余观嘉宾及第归岳阳却赴常寧州判

主上徵多士郎君最少年丝纶三殿出名姓九宾传月桂浮丹籍宫槐拂彩筵炉烟【一作香】携去重袍色赐来鲜鴈塔青云绕龙门紫雾纏圣谟恭已治文德待人宣日月南垂楚山河北凑燕洞庭飞鸟外衡岳乱帆前禄喜娱亲足官听举最迁京华未归客临别意茫然

送无外式上人还高丽

万国山河混三韩道路通都因圣德远兼使佛书同持钵游天上乘杯自海中烟沈孤屿白日涌大波红入夜唯瞻斗经时只信风本从箕子国来覓梵王宫到日过春草归程及早鸿将诗犹恨少问法久知空鸭綠遥连北鸡林更在东他年许询辈何处访支公

九月六日寿许中书

宇宙生良弼朝廷得钜儒九秋频落帽三日记悬弧露气流金掌天文绕玉枢人皆瞻稷契世拟见唐虞日月悬双阙风云会两都治分黄阁坐朝向紫宸趋凤昔闻周礼从容进禹谟神仙何用学廊庙竟须扶瑞世知龙马传家见凤雏今辰对佳菊烂醉把茱萸

内丘县舍

岁月催行役尘埃废苦吟怀山丛桂远入县古槐陰道倚相如节堂虚子贱琴厨人输传食稚子解悬衾风露占秋早星河识夜深履声嘶秣马烛影动栖禽暗漏时时鼓寒衣处处砧海邦图上见江国梦中寻翌日过洛水何时到象林北来常早起王事最关心

送程伯臯还新安

南宋衣冠尽东吴閤閤存风流成异代文雅见诸孙近日来京国因秋忆故园知交无复在羈旅更堪论旧隐藏山色清江落水痕出愁枫树老归爱菊花繁庾信余幽赏陶潜避俗喧窗风晨下鹤碣月暝啼猿竹净临书卷松高?酒樽云林真可乐轩冕未为尊

送庐陵范会宗入京省兄朝宗

大范留京国斋居接栋梁端门通籍晚望苑曳裾长远客逢难弟诸公比季方题诗晴望岳载酒夜浮湘万里怀燕市三年厌楚乡旅游成独往兄在慰相望马酒宜风土狐裘耐雪霜况闻周选举不废汉贤良紫电依龙种青霄属雁行故人多在北应念独南翔【北一作此】

送安伯寧知沔阳府

久说二车贤新闻领郡专被书辞北极建节指南天水国春为市沙村夜种田鸡栖桑雨外鱼网荻风前山献荆人璞江通郢客船使輶当竹过宾笋隔花传讼狱平如水閭閻望若仙政成听举最勲业进貂蝉

过小孤山

怪石成孤岛长江泻乱淙人愁造化蹟神閤往来踪落势悬千仞盘根下九重浪侵缘岸钓风应隔林春陟险寻幽洞凭高对别峯船依铁柱过庙受圣书封厓絶才通鸟潭寒欲起龙经过毛髮竖不敢久从容

题米仁昭别驾所藏幽篁古木

黄落催寒色丹青着苦心幽篁依磊砢乔木映萧森鸾凤青霄迴蛟龙白昼陰静疑风动壁清畏雪沾襟落日愁空谷寒天忆故林风烟三迳晚霜露百年深汗简谁能任浮槎不易寻他时爱清节对此脱朝簪

咏常宁新钟東余太守樊别驾

牧守新民听钧陶协化功采山羣力会趋冶百心同紫气干南斗玄陰散北风警时成器大传

世勒辞工远响号神兽奇文遶怪虫主司严旦夜撞击破昏聩冰雪悬天半雷霆隐地中自今闻政最歌颂总无穷

题禅居山云堂

丈室蟠青嶂千峰起白云楼台数步隔钟梵半空闻衣润寒偏觉人来近始分树阴当黠谿影度綯縕地迴藏灵气天清断俗氛寸心无着物五色自成文细雨传春诵微风坐夕曛是中支许辈吟啸日为羣

太学上丁

秩秩严明祀煌煌辟孔祠桥门多士集斋庠庶官随礼乐循周典衣冠杂汉仪进牲云覆俎扬燎月当墀道并乾坤大文从世代宜恭惟歌圣德咏叹不知疲

竹深亭

华栋依林下幽篁接磻阿夏阴当座满秋气近檐多修洁同冰玉萧条带薜萝映书光可把侵袂翠相和山阮时俱集求羊日共过知君少尘事岁晚得婆娑

七言长律

奉和宋翰林显夫御沟诗韵

宛宛长波切太虚霏霏晴雾湿高居云涵度影翻玄燕日映圆纹散白鱼遥转石阴通树细稍侵花底出宫徐桥边市起春鸣穀阁里朝回晚曳裾天子数临窥碧藻词臣时勅赋金藻龙池浩荡恩波接草木无情亦胜予送鞠希仁友仁及第归岳阳却赴邵阳县丞兼寄杨秀才裕

巴陵一别鴈来频京国相逢燕贺新桂殿日浮金榜曙杏园云散玉壶春董生对策真能事辕固谈诗耻後尘悄悄闻鸡持别袂萧萧拔马送征轮荆衡地辟通南极幽蓟天回倚北辰湖草欲青应进舫县花初白肯怀人长卿实畏贫归蜀季子徒闻早入秦为报扬雄休识字少年直恐鬓成银

登石鼓山

归途访古驻征鞍悬栈通幽绕曲阑故老尚传唐栋宇诸生犹识鲁衣冠弓封後洞苍灵湿树西溪白日寒诸葛祠前沙浩浩昌黎碑下石团团山浮岫嵒晴时出江合潇湘地底蟠也拟题岩记行迹诗成只畏万人看

寄题吴野夫竹松斋

苍松修竹绕茆庐中有幽人事隐居琥珀入云闲後斷琅玕经雨静来书镜湖冷逼秋声早禹穴晴通晓色虚野客每能携酒至隣人时共带经锄更培老树看巢鹤休损长竿学钓鱼霜雪欲开千亩外栋梁动计百年余子猷兴致从人怪元亮生涯本自疎南望风烟限林壑京门久客正踟蹰

送观至能赴广西宪司经历

蓊门官柳徧鸣禽马上离人酒强斟久以才名称阙下忽持风裁【一作采】照江浔三湘晓雨开衡岳百越春云接桂林何逊到官劳赋咏谢安携客喜登临吏人静住山城僻部使闲过幕府深溪里药苗寒自緑道傍榕树昼多陰蛮夷比岁频骚动岩壑何人更讨寻明日孤帆逐君发长沙南望最伤心【画一作暑】

送杨好问裕北上

京国衣冠集胜流昔年恨子不同游夔龙礼乐开经济班马文章寄纂修此日送君须决去诸公荐士足深谋金门夜奏三千牍玉座春瞻十二旒无复风尘淹白日也知云汉倚清秋明年海上还相念应有书来慰别愁

傅与砺诗集卷七

傅与砺诗集卷八

钦定四库全书

傅与砺诗集卷八 元 傅若金 撰五言絕句

古意二首

人言道路远直傍天涯去头上忽见天近於江南路牵牛一永隔织女经年会咫尺阙相闻何况千山外雪中访友人值出饮未归戏题二小诗

空斋掩深雪知向谁家宴径造不逢人残书诵皆遍期君久不至深坐雪沾扉临当日暮去终同兴尽归

戏效子夜歌体六首【与逵兼善御史同赋】

种荷深水中日夜期成藕莲子逐浮萍风波漂【一作飘】荡久

织锦望成疋终朝不满【一作盈】尺谁知方寸间千丝万丝积

依是弓上弦虽絕犹当续欢如弦上矢一往遂不复思将依别泪溢作长江水处处逢欢船任欢行千里郎心愿成镜照妾生光彩铸铁作同心千年亦不解欢乘紫骝马依作碧蚕丝系在白玉鞭千里得相随

古杨花怨

杨花白如雪无事学高飞莫作浮萍草漂零不肯归

即事

官家禁弓箭不得行人把犹闻马上寇杀人青山下

金竹道中书所见二首

日上清雾开山虚翠烟集纷纷羣木中时见孤松立巨木为人伐细木森自蔽作书谕松柏材大何足贵

陵州

远道千峰隔长河万折流风帆不可住今夕过陵州

庆都道中小憩

暑路宜官柳风亭厌旅尘伶俜七尺影偏与太阳亲

至栳城使者亡其弓戏题

兵革三边静蛮夷九译通犹持汉使节莫问楚人弓

卫州值雨

大泽泥淖多今朝复秋雨不畏道路长惟伤马行苦

题衡阳驿

南来山不尽北望意何如恨杀衡阳鴈来时不带书

题杂画八首

虚舟不得渡立马垂杨侧但见从桥安宁知济川力山翁捐世虑避暑长松里絶壁无来人诸
峯隔流水桥危独骑小江阔羣鸥乱乔木过风帆遥山灭云汉松杉白日冷楼阁青烟暝渔钓
倚孤舟风波夜来定青山宜野服白髮明溪水入暮幽思多微风树声起空江白鹭起远树苍
烟合日落泛舟时长天见孤塔烟寺微茫里渔舟浩荡前松声薄暮起寒气近江天岸陰却夏
暑水影涵云树日暮诗已成长吟不归去

题墨梅六首

弱水不可舟飚车谁能御羣仙六铢服飞度空中去【风】漠漠烟外姿娟娟坐中见分明银
屏影不隔宫粧面【烟】积雪春不坏疎花冷逾馥心鄙汉阿娇贮之黄金屋【雪】月下逢
素娥清辉寒相照应怀不死药玉色长如少月横枝交屈铁疎蕊列羣玉同气复同心相亲不
相瀆孤花临极浦子夜宜清景寂寂林下风娟娟月中影

题瓜图二首

思子成消渴逢人说苦吟最怜贫病里常有邵平心西风吹落蔓白露成秋实对此忆甘寒令
人失心疾

题粹中琅上人所藏墨兰石四首

雨过兰发馨枯禪定中起空林闻叱石一夜愁山鬼三湘连断岸九畹余幽境【一作景】坠露不闻声落星空有影

幽兰不为佩白石不受砉寂寂高堂暮萧萧来远风洒滨足奇石澧浦多香草荆棘何足除芳坚幸相保

题墨蒲桃二首

小架青烟暝空林白露秋谁家一斛酒遂得守凉州上苑根株少流沙道路长也知随汉节终得荐君王

题墨竹石

雨箨化【一作扶】龙梢风枝咽凤匏惟应林下石独称岁寒交

墨石枯木

人传月中树恐是山河影片石补天余参差碧云冷

墨龙

素壁吹大波高堂见神物野人不敢近雷电生翕忽

题水仙

月下湘水寒风回汉臯夕明珠不可赠捐佩空相忆

六言

荆门牖中三首

春光渐浓烧野晚色遥映炊烟茅店行人唤酒石桥流水通船

桑枝蔼蔼春暗桃树霏霏昼晴古径时逢妇汲闲门不断人行

江畔纖纖细麦树头冉冉晴晖败垣鸡犬相逐古道牛羊自归

七言絕句

清河口书所见二首

浊浪生愁愁不禁坐见碧水醒人心无数飞花当棹落几家弱柳映门深
水市春深云木稠吟行偶爱寺门幽老僧石上因留客稚子沙中学打球
溜沟舟中

人家时见小檐低水驿遥疑曲径迷墙里桃花多映户舍前桑树总分畦
杂兴四首

风吹木叶洒秋清忆在湖南江水行野色高迷衡岳迥湘波寒切寿沙明
秋兴亭虚吞远天郎官湖碧照寒烟记得往时黎别驾坐吹箫管共回船
洄东之东巴丘高在昔登临诗兴豪闻笛每吟清夜月倚楼长对晚秋涛
老亲坐堂白髮生诸弟治家幽意成引径或通梅下过疏泉多傍竹根行
夜坐

微月照人不可寐静夜起坐向前除花边犬吠时时近竹里流萤个个疎
忽忆

暮雪纷纷舞势回忽忆故园花乱开江上已应千树遍眼中每得一枝来
寄黎别驾二首

正月已过二月新羈客愁生不知春近檐细草青尚短隔屋小桃红欲匀
临水层轩相次开炎天幽梦拟频来长江漠漠青天去高鸟冥冥白日回
访友不值

故人已出闭幽室使我独到去仍回夕阳树里犹疑见残雪街【一作阶】中更拟来
奉和存初院使二絶句

上林嘉木?连墙冉冉游丝转日光忽忆江南好晴景碧溪春水照鸳鸯
御沟东畔粉为墙云气时时泛水光花带朱桥通螭螭柳齐碧瓦映鸳鸯
题贡有源壁间墨竹一枝

一别湘江烟雾深眼中见汝醒愁心长疑碧水犹涵影只恨清风未满林

题方叔高归羸集後二首【时叔高将归九江】

凤凰城中【一作凤城城中】木落时空斋独夜把君诗最怜庾信肠堪断常恐陰铿鬓蚤衰
归客长途不可迟千回欲发更题诗佳人苦爱倾城笑明月休生按劒疑

寄题进士宋翔仲梦鼎书室四首

淳安县东乡蔗源有金紫峯其支阜曰蔗山山北石室宋齐丘读书处翔仲家山南堂以蔗南
书室扁焉

淳安县东金紫峯宋公旧隐隔云松山人采蔗应常到溪客寻花或未逢

闻道蔗南修竹里小堂清诵夜常勤烟中谷响遥相答月下泉流【一作声】静始闻

宋家窗鸡解人语谈论【一作笑谈】往往能通玄祗【一作只】应风雨长司旦安用云霄
并得仙

石室南边风满林读书之处乱云深颇闻折桂来天上犹忆扪萝俯涧陰

题寒梅冻雀图

寒雀双栖碧玉条竹间疎蕊暮萧萧几回忆得江南路雪树参差暗野桥

和陈宗道元夕怀江南絶句二首

月下金渠照夜晴云间玉管散春声彩鸾何处无消息闲忆梅花坐到明
万家行乐爱春晴花底遥闻度曲声唯有客窗嫌月色照人离恨大分明

骆驼图

紫駝礫硿动秋云白草微茫卧夕曛中土向来惟见画都门今日动成羣

次韵王继志任大瞻访卧病道者二首

游戏人间只寓形空山瑶草为谁青归来市上忘仙药卧向壶中悟道经

门前苍桧古龙形一径通幽接帝青羽客醉归因示病牀头颠倒换鷺经

彰义门柳

送客都门见柳行几回扳折断愁肠如今自向城西别无那柔条拂马长

逢进包茅使

天子明禋盛礼仪楚邦供贡不曾迟令人却恨夷吾死不见包茅自入时

过真定尉佗先冢

殊方久识汉廷尊异代能忘圣主恩南粤若逢人借问尉佗先冢至今存

平安驿

孤灯夜宿平安驿欲寄音书无使将南鴈数声秋雨里却先行客过潇湘

野田

野田风露浥清秋扶耒归来百不忧稚子未知耕作苦阿翁怀里学骑牛

咸寧县

咸寧县南山色青丁师桥畔水泠泠道边松树疑千岁便拟寻仙煮茯苓

广西即事二首

南镇干戈日夜陈西山寇盗出犹频荒村百里无烟火闻道官军更杀人

比岁供输不自聊只今氛祲未全消阵前将士须殊死莫倚功多气转骄

安南人以纸立马求赋梅华

江驿梅花晴照人暗香冉冉拂衣巾可怜结子依【或作生非】南土未得移根近北辰

回鴈峯

江上青峯宿雨开江头归使日南来登高欲访平安字二月衡阳鴈已回

武昌春日

鹦鹉洲前芳草新黄鹤楼下绿波春隔花游女烟中语不解明珠赠远人

与黎别驾二首

夜闻车骑亦已到门外雨急故难来明朝狂走须相覓终日论文未可回

十分白日净可悦无数幽花寒自妍眼中此物差慰意何时得置小堂前

黄冈晓发四首

黄冈县西路多石一夜风雨畏行难鸡鸣山月净於洗龙过溪云湿未乾

石磴崎岖出万山平冈稍复慰愁颜树边茅屋时时见竹里柴扉往往关

道傍拒霜

驿路迢迢入万松人家时见木芙蓉不堪翠盖烟中冷却恨红粧露下浓

小孤山二首

船渡江天暮色青平江峯影动寒星海风忽起玄珠树山月遥生绿玉屏

海上夜失蓬莱山九江飞翠落云间仙人暮暮来絶顶径踏星辰朝九关

偶成

去年诏书禁乘马今年诏下禁持弓犹闻白昼多豪客骑马射人官道中

金人击鞠图

骏马如云击鞠驰衣冠彷彿正隆时向来北地夸豪俊不省中原厌乱离

古松图四首

一寸霜根岁月深养成千丈气森森画师不欲开全树来客徒能得古心
千岁虬枝截古苔余姿犹自太山来即今梁栋俱为用何得山林有弃材
偃蹇巴陵老树枝黄昏风雨使人疑神仙夜过还相识城市朝来独未知
种树常愁岁月迟老根千岁与仙期惟应华表归来鹤曾见仙翁手植时
秋潭

百尺寒渊泻碧峯树根渔艇少人逢凉风忽起吹征鴈明月还来照卧龙
栗鼠图

力尽秋原粟始黄画图逢尔独心伤也知丰岁多遗穗不比穷年耗太仓
和陈道之送子归乡并寄诸兄四首

弟兄不见长相忆况复别离成老翁忽梦谢池春草合不知姜被几时同
古屋秋风吹网丝难兄诵得寄来诗悬知薄暮思家处正是清江过鴈时
夜语灯前坐达明归舟还送阿戎行微官渐得文章力远道能忘骨肉情
思君尽日令人渴忽见新诗手自书况有郎君如玉树鬪将花艳比红渠
即事

五月銮舆北狩时行人辛苦鬓成丝蹇驴日日愁风雨官马如云不得骑
墨竹

嶰谷千年倚月明秋来风露最凄清自从截作轩辕律别有新梢学凤鸣
过长芦追悼故运使赵希顔

此地经过忆往年沙头树色翠含烟故人何处今埋玉归客还来独系船

忆昔过君来见君重来何忍复相闻不成桂剑寻秋树空复题诗泣暮云

舟行二首

倚江云树杂生苔风雨萧萧中夜来常时行过人不识直干已具栋梁材

渔家日落乱收罾欲及前舟苦未能行尽绿杨三十里隔河遥见驿亭灯

无题四首

天台灵草满溪香缥缈鸾笙隔洞房谁见桃源花【一作芳】树里春来日日待刘郎

江头芳树碧重重中有危楼对楚峯尽日娉婷绮窗下看花不使外人逢

楼上仙衣卷薄罗楼前春暖杏花多凤箫最好吹明月惟有萧郎自教他

江草离离江水流玉人何处卷帘钩垂杨学尽春来瘦不省人间有别愁

潞县舟中寄京师杨上舍诸公六首

买得吴船系柳根潞河新雨过黄昏都门只隔烟中树一夜寻君苦梦魂

故人万里俱为客十度春愁九别离京国向来犹未觉天涯明日倍相思

午门烟水浴轻鳧曾共花间问酒罇杨柳青青旧时路别来还解忆人无

二月和风满上林忆君时复走相寻夜来见月堪肠断城锁千门碧树陰

生来不识酒中味忆昨故人常见招不是多情能度曲樽前恨杀董娇娆

春风亭馆看花时自变新声教柳枝只恨秀娘空第一不曾歌得断肠词

戏简张伯贞三首

第二桥东杨柳新舞腰争学楚宫春可怜张绪才情少孤负长条不赠人

张生肆意轻流俗一室萧然独啸歌几度见人狂欲死醒时常少醉时多

日暮醺醺出酒家更过邻肆唤琵琶玉奴已伴他人宿独自归来卧落花

墨梅

天涯不见遥相忆窗外重逢乍欲迷彷彿空山明月夜一枝初出古墙西

寄王敏文四首【时将娶】

怜君卧病更伤离语尽灯前把臂时恨杀城南醉张纪送行不寄一篇诗

月馆花开厌独居故人别後意何如衡阳直过潇湘去南鴈时来好寄书

青楼只在石桥东几度闻君醉落红近日绿陰浓似雨门前别系玉花骢

碧云冉冉泛清觞明月娟娟照曲房想尔此时逢谢女爱渠中夜唤王郎

杨村

杨村岸头驿使回直沽洋里海船来军夫伐鼓欺行旅百里维舟不敢开

临清

五月河桥系客舟旧来河水至今流落花冉冉无消息垂柳深深尽别愁

马都水墓

旧凿河流遶墓长亲【一作新】栽堤树与祠荒行舟借问频回首过客传闻总断肠

孟阳津

孟阳津头烟柳多鸡鸣台下客帆过谁家学舞翻红?尽日含嚬惜翠蛾

擢歌八首

河中日日水悠悠谁道人心似水流河水湾回有时直人心屈曲几时休

朝朝风雨送船行白日无晴夜有晴东岸熬灯西岸见中间犹自不分明

河上风吹杨柳枝河边日落闭门时前船好待後船至南人莫被北人欺

行船日日恨船迟船头水声无断时昨夜天晴好新月谁家学得画蛾眉

攀柳莫攀当路柳系船须系上风船当路人行无好树上风浪小得安眠
去年船里逢端午今年船里又端阳九节菖蒲本仙药如何曲曲似愁肠
生儿宁作渔家子生女莫嫁征夫儿征夫年年好远别渔家朝暮不相离
宁向泥中弃莲子莫向水上种桃花莲子出泥终见藕桃花随水不还家
寄李尚宾三首

久别思君欲白头书来真足慰离愁衡阳五月无回鴈江上常时独倚楼
闻道斋居尽日幽可怜文采独风流只应湖上求如愿何用人间问莫愁
隐隐青山湖水头登山临水惜同游舟中只拟从元礼月下空令忆子猷
和黎别驾四首

汉阳城东湖水碧大别山上高云凉犹苦登临近官舍更将鸡犬入山庄
山中野屋连修竹门外溪流半落花偶入青峯得樵径去寻白鹿到仙家
手种松株逾十寻家藏书卷值千金溪云已任行时满山雪兼从坐处深
凉风满地吹香稻明月当庭照短篱一夜空阶闻落叶平明和露取题诗
魏元君坛戏和陈彦高三首

池上仙房閤古台世人传是链丹来自从云盖空中灭徒见风帘月下开
衡岳仙成只可闻南昌何处覓夫君隣儿狡似东方朔偷得金桃不见分
道士焚香礼紫虚故人题字满斋居可怜宋玉工词赋不及文箫有韵书
赤壁图

忆过临皋访大苏古祠寥落水禽呼如何月夜黄州梦却在西风赤壁图
过丰城二首

石泉灏灏照晴晖山崦茸茸带夕霏忆得往时松下路儿童相逐采樵归

隔溪篁竹似吾庐竹里人家夜读书一去故园如昨日春来频梦带经锄

题宋道震栖霞山四景四首

谷口林庐映水涯树阴鳬鴈【一作鸭】近人家春风恰似河阳县开遍山中处处花

水槛涵虚直翠微风林当昼却炎晖青青石上长松树独称山人白氎衣

木落江南鴈过时独行幽思少【一作野】人知多情宋玉风流在马上犹能寄楚词

雪里无人共酒盃行吟处处只逢梅月明自向前溪问恐有扁舟到却回

题墨蒲桃六首

汉使归朝岁月深离宫别馆翠阴阴不因宛马来中国那得龙须偏上林

西域蒲桃满玉壶贡时常续紫駝酥向来天上沾余沥今日湖南看画图

夜静山庭映叶虚秋来风架落藤疎月明满地无人到时有幽人学草书

暑雨过庭龙怪生南风吹架绿阴清如今零落成秋实犹作萧疎弄月明

闻昔降龙过五湖时因持钵见龙须近来窗下抛藤杖忽悟衣中得宝珠【为僧题松庵画】

架上龙须十丈阴异方风土种来深犹怜汉使通西域未遣宛王见上林

蔡氏隐居

仙隐深深闻远鸡青山别在郡城西亦知好竹能开径只拟寻花共入溪

题画

迢迢云山隔远溪微茫烟水带长堤秋来木叶多摇落日暮寒鸦不肯栖

游园和吴光辅

雪外高亭倚竹根石门幽径蹑苔痕重来花发应千树只恐渔舟失洞门

送桃与孔学在李尚文

千岁仙桃不可期摘来翻恨寄君迟武陵太守如相问莫道秦人始种时

题张天彝山水卷

江上晴云起乱山行人长慕钓舟闲双鸿更背湘潭去南尽衡阳几日还

送杨彦才归南阳

南北云山万里余洞庭秋思近何如故园独傍隆中去落木萧萧见草庐

双燕图赠王惟中

玄鸟飞时绿树春湖南烟际往来频明年社日君何处逢着新巢忆故人

送姚景翔归武陵

沙上清尊照舞裙暂时相值即相分明年花发秦人洞遇着渔舟定问君

方少府席上四首

故人之居湖水傍别有幽墅炎天凉听诗自喜当明月把酒先 尽夕阳

有酒其如醒者何题诗予愧古人多已辞醉後能骑马敢比书成欲换鸢

翠?临觴拂素筵一嚔一笑使人怜多情竹影留归骑何处菱歌起别船

归舟欲行且复住故人有客解相存也知为米求彭泽不是携家隐鹿门

别刘焕宗

潇湘江上旧逢君无数青峰映白云明日扁舟却相别洞庭烟树绿纷纷

题饮马图

一斛寒泉照紫骝萧萧骏尾动高秋夜来枥上西风满忆傍寒云饮陇头

题兰亭图

胜日山陰共赋诗风流犹想醉书时如今池上无余墨长使人间学断碑
题辋川图

摩诘归来爱辋川清辞妙墨使人传江山故业浑千变文物余风见百年
简孔伯明知事

昔别长沙失送君岳阳音问日相闻幙中尺牋应稀少时出藏书校古文
捕鱼图

落木萧条沙渚空截江渔网暮含风天寒紫蟹应无数便拟持螯坐短篷
题潘文学扇

闻说幽亭近水开微风时自竹间来惟应为客通三径尽日清谈不遣回
简邓仁康

洞庭之南地卑暑况复长夏少相亲归舟夜发青枫底忽到巴陵逢故人
简善道原

湖南五月洞庭秋杨柳深深系客舟遥忆郡斋无一事题诗频到岳阳楼
简杨好问

湖亭初得寄来诗几度长吟恨别离近日扁舟洞庭野雨中多是忆君时
题画松四首

石角槎牙折断崖雨声萧飒动高斋忽疑落日翻林影半树参差照水涯
石上枯株老伏苓尚余孤干倚青冥若为借向天河里夜夜浮槎载客星
太山祠下古时松雷雨苍茫已化龙忽向人间见奇画老枝犹恐袭秦封
遥忆商顔松色青女萝枝上醉眠醒自从四皓安刘後岁暮何人采茯苓

题松庵上人墨葡萄七首

磊磊玄珠得露垂
蜿蜒翠蔓与风宜
向西万本无人见
时有山僧学一枝
奉使初从塞外过
车前烟蔓翠婆娑
江南妙墨今无数
未及张骞见得多
初月生林白露垂
近檐秋色正离离
西风一夜明珠满
却是骊龙睡着时
汉苑寻常露下时
月明高架影参差
上林近日无来使
肠断江南见一枝
露颗含香近客衣
蜜蜂蝴蝶绕藤飞
夜来应值骊龙睡
探得明珠月下归
葡萄十丈翠蜿蜒
叶底骊珠万个悬
昨日大风翻架倒
一枝吹堕衲僧前【为僧题】
南岳山僧工学幻
空庭长爱翠婆娑
若教亲见苑西种
醉墨淋漓意更多
和宓子与送圭峯僧二首

飞锡翩翩去玉京
也知富贵视来轻
清江树底天寧寺
讲罢长廊看月生
官道垂杨接帝京
飞花浑傍驿帆轻
扬州南去春多雨
一夜船头报水生
题山家小景八首

万壑苍苍云气昏
石泉斜落古松根
前林欲暝僧归晚
应听钟声到寺门
浴鳧飞鹭聚寒塘
落鴈归鸦映夕阳
忽忆湖南烟树里
倚阑秋思正茫茫
松下孤亭映古茨
幅巾来往静相宜
门前一水应如镜
照见龙髯落半陂
窈窕松杉入白云
千峯何处覓夫君
中洲雨过多芳草
谁见哦诗坐夕曛
门外千峯含緑姿
居人衣服似秦时
仙源直在桃花里
世上渔郎未得知
清溪白石无人到
古木苍藤徧水涯
日出羣鸦浑去尽
山鸡照影独多时
鴈起秋空树色遥
行人江上驻归桡
海门东去应千里
白日微茫见落潮
花底溪流暖映空
石边林气翠含风
轻舟似识秦人洞
直上寻源或可通

酬杨谦三首

江路垂杨乱客愁藕花时节忆同舟鸳鸯鬢?频相近空使愁人欲白头

玉树秋清白露垂东游取醉莫多时金陵小妓能相恼应解明璫乞赠诗

吴女娇歌倚画船柳摇轻翠映婵娟风流妬杀金陵子费尽黄金学步莲

题蒙孤峯小像

紫髯萧森朔漠气白?飘飏岩石间絶似仙翁遗世虑千峯松下采芝还

题廖衡瞻墨梅

别来江树雪参差月夕寻常梦见之昨日双溪重照影春风犹识岁寒姿

送孔庭会之桑江巡检并简邓和仲虞伯雷二宪掾二首

一骑弓刀入桂林桑江孤障暮烟深西南地重多烽燧近喜羣偷已就擒

宪府诸郎总好文将诗烦为道殷勤应怜小弟官同冷日日登高望白云

题萧敬仲墨龙

阊阖迢迢白气通九江云起墨潭风夜来仙杖无寻处应向人间作岁丰

送兰隐上人游方

清江江头芳草春林深尽日不逢人明朝散入千山去叶叶清香是法身

题画罗汉二首

流水溅溅出石间应真游处碧波闲惟应此去天台近杖锡时时共往还

听法归来忆梵天临流坐石意萧然如何不作飞空去却爱山中弄石泉

寄赵德隆检校二首

红叶千林对夕曛黄花三迳踏秋云鴈来莫厌书频寄江上长吟正忆君

鍾陵城郭俯江波
畫省沉沉散玉珂
檢校幕中清似水
新詩應比別時多
台宪今時倚旧臣
嚴君風采照湘濱
行騎驄馬逢南使
肯寄雙魚問遠人
題歲寒圖

梅花亂開修竹里
孤月正挂蒼松尾
空山歲晏憶同心
誰見幽人夜深起
半身松圖

老樹龍鱗雜古苔
晴窗雲氣撲衣來
惟應咫尺論千丈
莫以尋常擬大材
瓜圖

烟蔓蕭條帶守宮
露團甘美熟秋風
可憐旧日青門客
說着東陵似夢中
木芙蓉

別院秋風起翠帷
美人樹底獨含悲
能言宋玉多情思
腸斷東牆乍見時
金沙

青鳥遙從漢殿回
春風吹散九霞盃
羣仙半醉歸時晚
綵節翩翩獨後來
傅与砺詩集卷八

傅与砺文集原序

<集部,别集类,金至元,傅与砺诗文集—文集>

傅与砺文集原序

文章之兴也观之六经可槩见迨後之作者或善於叙述或优於论议往往以偏长见称矧咏歌之辞必声韵之叶而音节之谐又非徒贵於辞达宜兼之之难也自昔钜儒若唐之韩柳宋之欧苏王陈元之虞揭於文与诗皆兼精焉繇其学之富才之全是以能人所不能而名高於一世吾郡之先辈傅君与砺希古之钜儒而有

合焉者也其官止於【原缺】广州文学卒之年才踰四十而文章之誉着海内盖其天才过人学识亦超卓范太史德机先生居百丈峯之下自少承其面论口传者为多迨游燕都搢绅先生既咸獎饬而诸公贵人愿见惟恐後其才优禄薄固时所共惜君既卒後诗文俱尝刻之梓其诗乃范虞揭三先生为之序流传於四方也久矣君之弟次舟以後进愿见之多而旧刻不存乃取而重刻之且续刻其文属寅为之序寅自弱冠游乡校见君所为观澜赋固已知其名敬其为杰士且与君同邑生又同岁月而君之才名播京师结交海内士寅屏迹岩谷穷居以老乃竟不识君然所以知君者亦深矣其为文春容而雅畅质不失之俚赡不失之浮固宜与诗歌并传无愧於古之兼美者君子观之当知愚言之非妄也洪武甲子岁冬十月蒙阳梁寅序

傅与砺文集卷一

钦定四库全书

傅与砺文集卷一元 傅若金 撰赋 诏 策 制 表 笺

郊祀赋

维至顺壬申十月之吉大臣既奉遗诏只嗣皇承天命率旧章云合九族日临万方绍丕基於
既远衍休运於无疆迺稽典籍陈禋祀戒有司飭行事谋泰龟以时日荐淳牡於天地於是春
官议礼庶职效能考坛墀於阳位辟氛埃使清明垣缭丘而规合石绵砌而方平组帷缤其绮
错璫邸翼以相承洞百灵以趋走齐二气与降升牺牲既成粢盛告洁赤精召阳燧之火素液
注方诸之月黄琮掩藹而霞润苍璧泓涵而冰彻是皆将以表至诚通明灵罔不因清浊以辨
位仿圆方而成形也皇帝方以春秋鼎盛肆命重臣摄行大典戴弁星罗飘裾雾卷对越上下
潜交幽显俨临坛而翼翼躬服事以勉勉凡百多士亦肃且和骏奔就列佩玉委蛇御史执法
曰纠其仪端白简以山立铁柱冠其嵯峨于时万境凝净羣声闐寥星翳翳以沉汉斗迟迟其
转杓乐举兮应律烟登兮干霄天门开兮纷照耀灵之旗兮下飘飘般纵纵以振雾芳菲菲兮
而扬飏尔乃酌以玄醴藉以白茅三觶迭进八音不淆蜷龙夭矫於宝籥威凤翩联於云旂祥
光燁以浮宇景气郁其覆郊礼言备神具醉扬空歌簇灵旆神之来兮陰阳会神之神去兮福祿
萃昌皇祚兮弥亿年世修祀兮永弗替筵豆既撤百寮降止工祝将胙致嘏於天子浩浩乎洋
洋乎莫不鼓舞元化永涵恩波用昭明于灵贶咸稽首而作歌歌曰帝承天休膺大宝兮燔柴
于郊假穹昊兮庆云下流被百草兮羣黎熙熙安以老兮崇德罔休以永保兮

观澜赋

渊乎深哉道洋洋不可极兮万化泯泯其同流浩吾涉夫圣之涯兮蹇欲济乎中洲朝濯髮於
江汉兮夕余将浴於沂泗覩逝者之如斯兮沛百川之方至乍澎湃?涌以若倾兮终纡徐迢迢
而趋平空漠漠杳其下垂兮云缤缤暖而上征长风回薄割以合沓兮阳景翕羃羃以滉漾灵
剌剌其交驰兮气凭凭与相荡穷余目不知其远兮下孰?夫丈寻繫进流之有渐兮盍稽夫源
之深心与境其适遭兮冥合乎斯道嗟末俗之波流兮荡澆风其澜倒纷雨集之沟浍兮湔朝
盈而夕枯使河海可蠡而测兮岂云异夫潢污亦惟涓涓之始兮积之以浩浩既混混其不息
兮渊渊焉以深造彼鼃坐以井观兮固难与语夫津涯昧者又不察兮竞好诞而喜夸潏迷源
而滥入兮待望洋以增叹悦遂返其初兮羌徒求乎汗漫嘻先哲岂其然兮亮有本者如兹惟
古训斯昭昭兮归求之有余师净以澄心兮浩然以养气沉浸乎礼乐兮涵之以仁义大中以
正其源兮至和发为灵波一勺不见其少兮弥六合而非多尚丽泽之是资兮旁流之务塞谦
以持其盈兮满焉而不溢成章其自达兮折有万而必东迹之润吾身兮远将及乎无穷乱曰
大川沄沄湍以驶兮来流斯行坎即止兮厥有源泉故不已兮匪道伊合亦何取於是兮

拟汉宣帝尊孝武庙为世宗庙诏

盖闻孝莫大乎尊亲尊亲之至莫大乎乐章德礼报情也高皇帝定有天下以诒子孙为汉太祖庙乐奏武德文始五行之舞孝文皇帝恭让节俭敦尚儒雅复兴三代之治以垂法於无穷为汉太宗庙乐奏昭德文始四时五行之舞孝武皇帝光昭前业威德远被舟车所至人力所通毕贡方物向风来王招文学之士崇仁义之说修郊祀之礼复明堂之制改正朔易服色建封禅宝鼎出芝生齐房黎民谷育休嘉荐至功德莫盛焉宜尊孝武皇帝庙为世宗庙乐奏盛德文始四时五行之舞其世世毋废

拟唐玄宗令州县岁十二月行乡饮酒礼诏

朕闻养老尊贤莫尚於礼移风易俗必由於教礼者敬也将其敬者不可以虚行教以化之宣其化者非由於家至盖古者圣人制夫乡饮之义以为政教之本洁其俎豆致其尊让以成礼也而非为饮食以昭德也而不为沈湎孝弟之行由是而兴贵贱之义缘兹而别民风隆盛国用和平故饮於学者可以明人伦观於乡者可以知王道世斯远矣朕甚慕焉恒亦虚心思求复古乃者风雨时至闾阎岁登既臻兹富庶必导以礼乐宜令州县岁十二月行乡饮酒之礼朕虽无德化致比屋可封庶几礼让俾兆民兴行宣示郡邑其力举行

拟汉景帝立河间王策

皇帝若曰呜呼小子德尔惟克修学好礼敷求前闻人朕稽古建国庸王尔于东方为汉室辅呜呼靡不有初鲜克有终汝尚念兹惟乃祖高皇帝奉若天命以有万邦俾余後嗣厥惟艰哉尔其受兹茅社往义于汝土夙夜烝烝勿怠率乃民慎乃有德俾予一人以康尔亦有无疆之休呜呼敬哉惟子孙世世永保命

拟唐授阳城谏议大夫制

虞帝举贤嘉言罔伏殷王从谏居上克明矧在眇躬弗求辅德予欲明扬幽侧广拔贞良置诸左右作朕耳目俾立朝有补过之益在野无考盘之遗匪采其髦罔致斯美实之所在名必从之处士阳城隐居中条服行古道其学既广厥德弥彰是以乡里习于善良搢绅慕其风采潜虽伏矣人其舍诸盖伊尹致君起於畎亩传说作相得之岩穴是用举尔深山登兹文陛优崇禄秩首长谏垣尔其克副朕怀罔违人望如衮有阙汝则补之惟木从绳朕斯正矣毋以难事而勿责毋以小过而曲从时义之归乃言惟服于兹有庆其永同休

拟唐宋璟进无逸图表

臣闻天道不息而岁功成君道不息而天下义是以大禹孜孜维日不足文王亶亶与天同运用能肇基夏业新命周邦垂大训于後昆着徽称於永世自古盘于游田耽於逸乐未有不政残民怨国乱身危者也故成王以幼冲而嗣业周公作无逸以陈戒言则古昔必称先王远而殷三宗之继绍近而周三后之创始以及天命之微民情之隐靡不毕备反覆为训岂惟一王之攸监斯诚万世之元龟也伏惟皇帝陛下纘述圣图励精文治寸陰是惜时禹之勤一食不

遑翳文之德允兹善始尚克有终臣璟心切股肱之义力微袞职之补谨手写尚书无逸为图以献伏幸张之左右警戒无虞庶天地之化因兹而增其广大日月之运由是而益其光明臣璟不胜惓款之至

天历改元湖广省贺表

天历在躬一人有庆王言作命万国欢心【中贺】以间出之资当中兴之运宜兄宜弟而後以教国人作君作师惟其克相上帝懋纘武皇之正绪用宁神祖之丕基日就月将尚缉光明之学夙兴夜寐时单宥密之心沛泽滂流羣生咸遂臣等旬宣南服瞻望北辰嘉同更始之民於赞维新之治

元旦贺皇太子笺

春王正月成艮始於东方帝座前星继离明於南面亨嘉之会福祿攸降【中贺】恭敬温文仁明孝友从抚军守监国允重宗祧秋学礼冬读书益崇师傅宜此元良之庆肇兹德惠之施某等职守藩邦神驰望苑日重光海重润庸发挥乐府之和车同轨书同文尚协赞皇图之大

留守司贺元统改元表

聪明嗣位正一统以书元历数在躬与兆民而更始声教所至懽忻交通钦惟天授英猷日崇圣学继志述事於昭文武之光持盈守成丕衍殷周之祚有涣其号惟新是图某等职守龙都礼陪虎拜坤顺成物喜符十月之良乾元统天嘉祝万年之永

天寿节隆祥使司贺表

龙见维时式际纯乾之运虹流在旦有开出震之祥光溢九围懽腾兆姓钦惟清宁毓粹聪哲凝华推仁克本於天伦尊德载新於圣学殷宗之旧劳于外既悉艰难虞帝之允执厥中乃膺历数宜此春秋之富侔诸天地之长臣等任职祝厘礼陪称壽臣归美以报上愧莫裨庶绩之熙皇敛福以锡民尚永赖一人之庆

皇太后受册贺皇帝表

大明四照统肇继於乾元长乐三朝号聿敷於涣汗光昭玉册瑞溢璇霄钦惟英文间生明睿有执以武皇之正绪衍世祖之洪图受命而德为圣人尚隆典学尊亲而养以天下益厚彝伦肆发徽称用彰兹训某职居京守班与朝仪十月为良式覩礼文之盛兆民兴孝永歌德教之加

司农司贺皇太后受尊号册表

母仪治内璇宫夙着于坤称帝德光前玉册诞敷于涣号恭惟柔顺居贞慈明作则赞先皇於
再造教美周南翼後嗣于丕承养隆天下肆膺令典以发徽音某职近天田光依月殿瑶池献
壽愿逢大有之年长乐受朝宜衍无疆之福

傅与砺文集卷一

傅与砺文集卷二

钦定四库全书

傅与砺文集卷二 元 傅若金 撰记

寄寄亭记

傅子客游京师数岁贫不能自居恒寄於人而业笔砚以衣食前年有日南之役既还待选天官业遂废而益贫居无恒宇求访者率病焉今年秋舍於丞相掾相人赵德隆所僦明时坊何氏第之西亭因题其门曰寄寄以自别於土着之民使求访者有所迹客有惑其义者曰子以子之居寄於人者乎一言寄可尔谓之寄寄何哉傅子笑曰子未知之乎夫人莫不寄也而又有寄者焉岂惟人哉凡物莫不寄也天地物之大者而亦寄焉天寄乎上地寄乎下人万物寄乎中今夫二气之运絪縕磅礴均覆同载嗇然高者吾不知其所穷矣块然厚者吾不知其所终矣廓然四达者吾不知其所容矣必有所为主者故知天地亦寄也而受万物之寄人寄於天地也而又受人之寄今之客京师其能自买宅而无待僦屋以居者鲜矣矧予又客於僦居者之居乎客诚寄也而所为主亦寄焉故曰寄寄曰然则子之寄也壹无所任其寄於身乎曰否天之生吾人也肖之形而命之以仁义由是率而得之曰道此吾受之天而任其寄於吾身者必能保之而不失达则充其用以庇乎生人夫然後能任夫天之所寄而尽其责也孔子曰文不在兹乎孟子曰当今之世舍我其谁圣贤自任其所寄之重者如此凡学其道者庸可不知其任乎客起而曰命之矣请遂记之

南窗记

君子之治其身亦先其心而已矣心惟虚而後能受夫道惟明而後能不蔽於物虚以立体明以达用是故君子起居惟时游息以方向阳刚以自附偃陰晦而弗近斯内外交致其养欤卫人王良辅敦厚而志於学往年余还清江时见良辅侍其亲郡幕有儒雅之风无纨绮之习盖王氏佳子弟也今年余游湖南良辅复从其亲尹衡之鄱邑以余有通家之好因出中书许公所书南窗二字示余曰斯余昔者读书之所也翰林范先生尝为之铭今先生且不可作矣子盍为我识诸余於翰林为乡子弟而辱知中书以二公之所与虽未尝知其人犹将申一言矧余於良辅有通家之好者乎夫窗虚室也洞乎中彻乎外而南当阳明之方长养之次良辅之进修於是挹虞弦之薰敬羲日之永牖户疎朗吾因以净吾心焉时物假大吾因以长吾善焉所谓内外交致其养者其在兹乎审由是而勉之以达於用则贤者之堂无难升圣人之域可企而及矣若夫徙倚以寄傲高卧以骋怀斯愤世长往者之所为殆非二公相望之意而良辅岂宜早为是哉

兰雪斋记

夫君子之托物其美恶必有择焉故欲知士之贤者亦视其所居与其所好慕者耳友人张天

彝文雅博涉器深而趣远所居列置古经史名书画间以卉石错以琴尊而朝夕游息其间掇芳华以娱翫漱清气而自洁斯其志尚之异不贤而能之乎尝抚唐李供奉白之辞以名其斋曰兰雪而属予记其义兰取其芳以茂欵雪取其洁以润欵夫君子之行处幽独而日闻居闇昧而益章萧艾之杂也不可以合也涂炭之污也不可居也蔚乎诗书之林涣然道德之泽其兰雪之谓乎抑尝观夫物理而质诸古先之言易称二人同心而继之以如兰诗歌生我百谷而先之以雨雪斯二物者其芳馨之德润泽之功有取于世君子以托其志尚宜哉天彝蚤以才諝见知当道由海北宪史辟掾广东湖南二帅府自是且进用未已其芳馨润泽之远庸可既乎是斋固天彝养德之所也吾闻与善人居久而与之俱化吾昔者恒过之入其斋蔼如也芬如也忽不知薰余以仁矣即其席洒如也濯如也忽不知渐余以义矣鲜飈时至尘虑若涤天彝为余援琴而歌之为幽兰白雪之操往往使人坐而忘归於是知天彝信贤者也信知所好慕而有择焉者也孰谓君子之所养不系所居乎请以是为记

梅江记

鄞为邑居羣山之阿山多石鲜平地厓峭壁竦上絶天半水泉之发间关出石下郁流千折然後稍趋平焉其山川清气之会涵异蓄灵於江宜盛凡物之泄其芳润萃其菁华不为佳木奇卉必为秀民鄞治之南有梅江邑士张世杰尝居其浹久之因取以自号夫名者实之所生也江有梅地气所宜昔人名江亦必取其所宜木矣而今者实不见斯物焉此其芳润之积菁华之蕴意者不在於梅而在世杰矣又何必生佳木奇卉而後为江之秀异哉然吾闻江之为德会流大者其润必广为浸小者其溉亦狭土患不志其大者焉苟志之勺水之生可以为河海寸云之出可以雨天下世杰亦大其停蓄而勿拘於细流吾见由是江而导之沛乎汪洋浩乎演迤所至恶可涯涘哉

竹村记

楚自古称有材辰故楚地其土多丹砂黄金美竹之利岁充贡上国天下所珎焉然世俗嗜好观竹於丹砂黄金其不舍此而趋彼几何人哉有能异乎世俗嗜竹甚於丹砂黄金则其人者亦天下之所珍也佐岳阳幕府君龄麋君其为人庶足以当此乎君家辰距城南二里虎谿之村泉石清美君种竹其间而乐之遂命其居曰竹村今宦游千里之外而恒不忘于怀非其心酷嗜之不若是且辰固多丹砂黄金而君独酷嗜夫竹审余所谓其人天下之所珍而异乎世俗者也夫竹虚心劲节有君子之德焉虽处村野而致用於国家君为政廉慎周密守之以正承之以虚所立有近夫竹者自是干云霄而直上历霜雪而不改吾益於君有望楚多材岂虚语哉君因所居号竹村晚又号虎谿老人云

闻道堂记

新喻去?南仅一里杨氏道初之居在焉杨氏代业儒先世两登宋进士第道初勤慎以承其家诗书以淑其後其居故有先人之宅既完且美道初乃弗自利一推以处其昆弟而别作屋於宅之东视旧加飭凡祭祀宾客之位户庭阃奥之次藏修燕息游观登览之所靡不合度屋成

名其堂曰闻道堂之前厅事曰知己堂两傍楼左曰听雨右曰挹秀虽其高下面背之势各利其宜而咸凑于堂葺属栋附鳞奋翼举远吞江流近负林樾竹卉丛植擢颖函秀凝望四睽浮翠蔚起昕暝往还若在尘外间因其所亲林君属余记堂之义道初其尝闻道于堂而有得矣乎夫宇宙之内万化之大羣生之夥纷然接乎吾前者莫非道也而其实岂远人哉人道孝弟而已矣孝先继述弟先敬让故周书以作室喻父子之业小雅以?墙明兄弟之爱其义阐矣道初绍先业而立大逊旧居而弗有是善继述者欤是能敬让者欤可谓孝弟也已眡世之弗肯堂构而兄弟至相仇者能勿愧乎则自今杨氏之子孙观於兹堂之上庶亦有所得矣是不可不记

美竹亭记

江南之产多美材而竹尤盛缘淇经渭甚至环宫室蔽池馆郊原丛植风披露濯下者凌波涛上者矗云汉采诸人以用即供上所需与凡生人任使祭祀食饮记载乘服百工之器咸取资焉竹之利斯世亦材矣然其产或不得所宜土则虽材弗能美得宜土以产而或阻远不迓乎居人则虽美弗见迓乎居人苟非好事者有出尘之趣而好乐之必纷纷狎视为常物几何而不樵牧之者亦安见所谓美哉豫章徐季清好事者也其庐濒江而多竹季清乐其土而居有之朝夕爱赏之不厌迺更筑亭益树名花木日置古书图画其间与宾客之佳者游观相乐焉既名亭竹外而又托以自号盖与竹几无间者其都人张伯贞数为余称其事而请记之夫濒江之土宜竹而美竹又迓乎好事者之居能得其朝夕爱赏而致佳宾客之游观以乐至其名亭不于他名花木而惟是之取是何斯竹之遭也若季清庶几有出尘之趣矣余闻之孔子曰德不孤必有邻又曰益者三友为其相观而美欤夫竹君子之徒固季清之德邻益友也日与之居月与之游吾知其有所观矣抑此其外者焉诗云瞻彼淇澳绿竹猗猗有斐君子如切如磋如琢如磨敢诵以复伯贞书以为记

傅与砺文集卷二

傅与砺文集卷三

钦定四库全书

傅与砺文集卷三 元 傅若金 撰记

常宁州义役钱记

常宁以衡属邑自为州籍民所占田三十一万八千四百又六亩有奇岁赋民钱三千四百五十缗米万二千又百石有奇始为州民二万户既生齿日庶数甯易其户籍天历初属岁荐饥民多死徙吞并之家并缘为奸利往往私取其田而虚其赋入之数於公其无所於徵徙占名籍中者为田六千四百亩赋以岁计为钱五百四十一缗有奇为米二百十又三石有奇会其直又为钱三千二百缗有奇吏不以其时?实日月久远漫不可理常岁赋入徒按籍坐所指户亩责之坊保首正岁终不足恒系縲鞭扑以督之其坊保首正贫不堪役者率隳其产业至鬻妻子以代责入民甚苦之以故富多田者虑害之及辄诡析户徙役贫者前时有司坐视一无所诘太守余侯之再为是邦不忍民之日穷且毙而莫之恤也念得钱万数百缗为孳息之母岁视其赢以充计上可已其害乃身率僚友捐俸一月以风其下郡人闻者争愿出钱得中统钞以缗计万有四百遂移州下广盈库寄主其藏严置出入之籍以时散之富民使质贷生息之月以缗计入其赢三分於藏岁计可得钱三千七百四十缗有奇每岁当民租入时官具文书出之以给前赋之无所於徵而坐之坊保首正者其用心亦仁矣然犹惧同时僚属一旦代去後之至者不知守而行之纵苛虐吏侵渔其钱而惠以不终谋勒石具其事始末凡出钱者悉载名其上以示勿废其为虑不又远乎於是州别驾樊君与耆宿士民咸善侯所举属予记呜呼民者使出赋以给公上者也传曰有人此有土有土此有财故公赋之出繇私田所入今官有常赋民无恒产奸弊相乘底于斯极长民为理能不惻然于中耶若侯存心可以为民惠矣後之不修其政者将不愧兹刻乎侯名泰故礼部尚书明肃侯璉之子世为下邳望族文物典则称其名家先为州别驾时修政教之本兴礼乐之具增置学官之产作人材而宾兴之既去人犹颂称其德不已及是复来衆益欣奋日思就化比闻党术诵弦相闻士君子相望侯之惠居多樊君名琪亦名臣子孙修雅岂弟能佐侯为善治者

江东神庙记

祭法能御大菑扞大患则祀之赣之雷冈有神祠曰江东嘉济庙者相传其神姓石氏讳固自先秦时已血食兹土汉颖陰侯婴过而祀之神遂显名由是历唐宋迄今灵异益着累封显仁元庆思烈灵惠王恒陰佑有国而大庇覆於民人其事具前後金石刻文今南尽岭海北达京师莫不有庙食而吴楚之间为尤盛独祠在岳阳上清观者则赣之录事达鲁花赤曲思不华公始创立焉公前在赣为政忠孝诚敬率人以身遇民水旱疾疫躬有所祈神应响至故虽去赣民犹朝夕不忘其德公亦夙夜思报神之惠焉乃至顺壬申公既还至巴陵即自为疏遣人以香币迎致其神祀於上清心有所为祷之神以卜其休咎而岳阳之人咸得有事於祠而徼福於无穷公於神人之交庶几曲致其诚者欤呜呼神不可测也而可格矣可告也而不可瀆

矣善者福之恶者祸之祸福人所自为神岂利夫享祀而阿比於人哉君子之立祠像神亦以警夫世之不敬而作人之善心尔诗云神之格思不可度思矧可射思观於是祠有不惕然而惧蹶然以兴者乎郡人张孝子琦为述其事来求记予既次序始末又申之以神人交接之槩作迎享送神歌使并刻之庶来者知所事焉其辞曰

洞庭浩兮汤汤赣之山兮路阻长登崇丘兮候神杳将下兮乘陰阳远若见兮静若闻精刻刻兮忽亡以存有陈兮在几芳菲兮若蒞神愉愉兮既闲衆安歌兮又喜宾既御兮我堂逝将游兮不遐我乡岁无凶兮神之庆世修祀兮民弗忘

栖霞记

新喻为山水邑怀道蕴德材艺可任之士显于时者宜数倍他郡而代不多见是必有薄纷竞之习隆栖遯之志以泉石为趣尚烟霞为游息甘长往而不出者焉浮云富贵固不足以易其高也去吾居不能一舍而远斜川宋氏有隐君子焉曰道震父殆若人之徒欤前年尝一过之见其左右图史蒔名花木设琴瑟尊俎觴客取娱间为声诗以自歌咏於是知隐君有以适老信余所谓道德材艺可任而长往不出者也一日得吴兴赵公所篆栖霞二字因名其隐所曰栖霞而自号栖霞山人夫云日气相薄成霞日出乎东海而朝霞发焉没乎西海而夕霞见焉世传崑仑山有五色水赤水之气上蒸为霞意其为物熏蒸而成形薄射而成彩分合无常亦云之类耳凡物之积而不厚凝而不固则不能有所受载而谓可栖乎道家书云五色流霞来接一身又云太上玉晨火道君居紫霞之上或者亦寓言尔然吾闻天地之先一大气也鸿蒙既分三才列焉絪縕相摩万象出焉日月也星辰也风云虹霓烟霞雾雨寒暑四时之变也无非气也故气也者与道合化与神俱行载六合而不坠形万类而无迹天地乘气而立人固不离乎气也昔人有御风而行乘云而举者矣则栖霞又奚怪焉大戴礼曰天道吐气地道含气山川附乎地者也霞天吐之气而山则含之君居乎山间川气上腾霞景下映烂然五采之蒸接乎目而被乎四体咽之而成液吐之而成文由是呼吸天地之英卷舒陰阳之化可以游乎太初凡世之人莫尚其高洁者已岂徒栖之云乎哉余既高隐君之趣而悟气之理作栖霞记

竹深亭记

新淦之鵬溪有廖隐君叔敏者性嗜夫竹自号竹窻其孙中山父魁伟磊落人也雅好宾客而嗜竹犹其祖故屋傍多植美竹而作亭其中名以竹深日与族人宾友往来游谈其上论古今之事教其子弟皆能积学缀文辞而楚楚与竹俱立闲居鸣琴诵书赋诗酌酒以娱父兄于是既乐之久矣及其族日大而别筑室于溪之近二里所五湖则亭亦与之俱徙而益植竹环左右以称名亭其户牖所向几席所当杖履所临暎之以?蒨縹之以幽曲水玉森立云雾演轧輿如也宾客苟非七贤二仲六逸之流得其径者或寡矣而尘土鬬茸之务无因溷吾趣焉日者君合客燕亭中乃出乡先达及今之士友所赋诗歌示余使记其事方显气西至灵籟四起主人举酒诵淇澳之章律嶰谷之音客醉起舞而和之竹色照垓衣?皆碧相顾乐甚忽不知其何乡也於是知廖氏之培植斯竹盖累世矣深居以蔽其陰在今适当其盛焉凡植物之迹於庭若异木奇卉恒必稀鲜乃宜少加茂密焉或者厌其繁且遽矣其多植之而不厌虽遽密亦宜

而幽人胜士乐与之居者惟竹为深耳夫竹之宜於人以有君子之德哉故君子之交处也其心虚可与有容其节劲可与有立其材美可与有用其?远可与有庇直也可与正枉洁也可与厉贪高尚也可与抗世是故多而不烦近而不?就其深而莫?所极焉久矣竹之交有似乎君子也然则与之居而不厌其邃密且益加培植焉者亦其德之似者欤观于斯庶忠厚以固其本仁义以畅其枝使其生息益蕃以远则所谓深者不在乎竹而在廖氏之泽自今其世世居有斯亭哉作竹深亭记

新淦州建兴寺施田碑

州之交衢有僧居曰建兴寺者肇唐武德中始其徒盛大支为院十有四环列左右代迁时移今所存者独六院而院各有田以饭其衆岁久稍增益之独寺正殿为公堂故有田百六十亩有奇岁入租八十有四石以资董视营造之费者前是未有所增焉至正改元会州之东十里所普惠院主僧惠澄年且八十尝苦行节用积其赢买田三百亩之在钦风乡者租以大石计百又五十有奇岁以充衣盂之费而年老不欲以生产自累念世之诸缘若大梦幻非坚固实有不可执而存者而如来自无量刼捐舍身命国城以用布施由大愿力卒证位佛乘流布其法於斯世凡今吾徒得以安坐而致其利益者盍亦思其所自而图报万一耶於是悉以其所置田捐施建兴以益常住之产田入正殿为租石三十其百三十石则六分之入支院正殿之田先会其租入募工聚黄金箔庄严无量壽佛具足色相绘饰牀坐以称他佛其後岁所入者积以待栋宇之有缺坏及凡像设器皿之必新者资以用焉寺僧状其事始末请予文诸石於乎澄公其学佛而有见者乎世之贪于丰已而吝于及人者田连阡陌至不能簞食以恤宗族之穷徒孳孳自苦以老无所述于後而为佛氏者资施於人者也乃有澄者铢积寸累以致顷亩一旦年老大悟遽释其自累之业以利建兴使传之永久其去恒人果相远哉然吾闻始者佛氏之立教持鉢出旬日中一饭未尝大畜田以事生产及後世尊信其法者益衆则自天子公卿下逮庶民之富多田者率捐弃膏腴以惠养其徒大者一寺田至万亿小者犹数百千吁亦盛矣由其教溥广食指之积不啻若聚恒沙以数诸佛田之多不若是则不足以给故食於其教者亦有推其始者耶抑求施於人而已矣有反其施者耶夫有所施者必有所利者矣惟不利其利而利莫大焉澄公可谓善推其始者矣善反其施者矣若夫布施以希福田利益吾疑佛之道不专在是而亦非澄之志学者尚思其大者乎

高远堂记

处城郭剧地朝夕纷纷焉与物接而不为卑陋狭近之见斯其人志於高明远大者耶由是而力焉其所立有覩乎是矣新淦据江右上游凡仕于南及四方游士商贾之过焉者舟车日不絶而其民又庶且富居室鳞比城市土不得尺寸闲出门未跬步往来憧憧踵相接也而张君则惠之居於是乃若廓然不以胶其虑者至取高远名其所居之堂覩其志岂溺於卑近者哉尝得之其所亲之言曰君之先本单州之繇保州军事推官七传至涪州通判自池徙居新淦至于君之身十有三世矣君起徽巡吏凡再转历州郡计年劳当署邑都曹而行省借授贛之宁都州税副既满代当复调其进用且将未已前後治吏事数十年所至以才謂为当道所知凡直指宣抚使部使者及行省参知政事州郡长贰出莅事他郡恒必择廉能吏自随君辄当

其选尝佐谏奉新疑狱多平反之功先後按吉袁仓获贓累十数万缗棘棘无少阿避察洪属邑旱菑賑饥袁瑞所过不扰德其惠者衆多核庐陵民之冒名军役者千余人旬日而正其籍从樵南海舶货所赋入以亿万计仅数月而事集且未尝有所污云夫为吏而见知其上苟怙势肆威无所不可而君则弗为是非其志不溺于卑近能若是乎故虽处城郭剧地而有高远之趣焉即是而求之簿书钱谷之细若不足以烦君者以之为政其存心亦可知矣昔晏子之居近市而喧嚣湫隘其君请更诸高明爽垲之地晏子辞焉人至今贤之夫君子所存岂以其居系吾高卑远近哉必志其大者矣虽然余闻之为高者必因乎下行远者必自乎迓覆篲不已九仞可成焉举足不已千里可至焉是故圣人之道下学而上达夫厌近而骛远与安於卑陋而不求达乎上二者胥失之故予於张氏之堂不徒饰大辞以极高远之义而欲徵诸其实

延龄丹室记

世之修炼以养闲暇服食以希长年非其人负磊落不世出之才遭时不用遯居山林以事神仙轻举之术必其年且老无所用心而资是以扶衰莫者也夫以英妙之姿当文明之治且夙夜励学期一日出而试用于天下而遽自托於遯居扶老者之所为闻者不能无感于斯矣求其志必有在焉清江吴德文质美而嗜学蚤从师习明经治举子业方年富力强孜孜不已将由乡举里选以贡于天子之庭而琴书之隙往往以其余力杂?夫丹书脉诀方技之文因即其居之西偏治一小轩以为藏修游息之所取凡弦诵之具烹炼之器咸贮其中而独书延龄丹室以名之是予闻其义而不能无惑者也然徐察其心则善矣夫人孰不欲保其生也鲜能尽生之道孰不欲壽其父母昆弟亲戚朋友也鲜能知延壽之术今德文之志不徒欲自保其生而欲人之同其生不徒欲自壽其父母昆弟而欲人之父母昆弟同其壽其存心仁矣哉然吾闻之孔子曰有大德者必得其壽孟子曰夭壽不貳修身以俟之是故善养生者不戕其天而已矣药物其外者焉且世所传古龙虎金碧之文陰阳火候之诀亦唯假诸外以喻其内耳故所谓延龄之术者不专事乎其外德文讲学穷理必有得于道者其于杂嗜殆亦游于艺焉耳若其以丹药济人夭死而跻之仁壽之域者是固达为良相之心欤

傅与砺文集卷三

傅与砺文集卷四

钦定四库全书

傅与砺文集卷四 元 傅若金 撰序

李氏大学治平龟监序

龟以卜监以监帝王之道以法虽圣人不敢易焉故卜而不求乎龟则不能知夫事监而不求乎监则不能正夫?为法而不求乎帝王之道其能以平治天下乎是故善为治者以前言为龟以往行为监吉凶罔不有以知于前善恶靡不有以监于後择而行之由一身而达之天下其犹运诸掌矣此无他知所法焉大学一书古今帝王为治之要道也宋子朱子既集儒先之说以为章句而行诸世矣今李氏不畔其说而能增之发明以申其义又引事比类凡唐虞三代下及汉唐历代之君善可以则恶可以戒者悉附着于其下名曰大学治平龟监其言数千杂出五经诸史之文察其用心勤矣昔唐宋璟进无逸图而警戒之道成张九龄上事监而讽论之功着治平龟监之作殆亦欲见诸行事者尔而二公处辅相之近其言易以行李氏居山林之远其书难以见知虽然刍蕘之言圣人不废况托于经以行者乎居今无知其书则已苟有知者采而上之使不见废则于帝王平治天下之道岂独无所裨哉李氏云阳人字朝佑穷经积学盖有志当世之务云

纪史奇蹟序

伏羲造书契而文籍生孔子约史记而春秋出夫载籍未具非圣人孰制作焉载籍既滋非圣人孰笔削焉圣人者万世人文之表也後之有述岂求与之角哉亦取有裨于世云尔史之记事左氏而上勿论繇秦汉以迄于宋简策之载亦繁矣览者惧人之不能日月以竟也则有搜罗剔抉提纲于月撮要于会存什一於千百者其为家不一而咸期于裨世苟戾乎是君子弗取焉侍御史魏郡宋公文雅宏博周于当世之用尝摭迂固以来诸史帝纪世家列传儒林隐逸孝友方士奸佞宦寺外戚后妃烈女之事较然可以垂後者萃而为书共十有五卷命曰纪史奇蹟而自叙之将以传于世呜呼其勤矣乎古今史所载大者积山海小者流江河犹不足拟其极虽号嗜古博涉之士朝夕穷读之且不暇徧能自为书以传者无几也世之食厚禄于位者苟塞吾责焉亦幸矣尚何力以及此哉若公者贤于人人远矣吾闻以古为镜可以监兴衰孔子称三人行必有我师善者从之不善者改之而已是书其兴衰之镜善不善之师乎使览者而有择于是则所谓裨世者庶有在矣

送李思齐诗序

皇帝即位之初郯王使来京师因召其府说书李思齐其友人王屋因清江范谨来告于傅若金曰陕之奉元人李思齐为郯王府说书召且往凡同舍及尝所与游能文辞者咸赋诗道离别之思总如千篇为一卷请予叙之且曰王肺腑近亲受重托领兵镇北边北诸侯王来朝及

贡献者必见之王王计其当行与否而进退之其合给道里费饮食赐予之节一委之王之属所谓磐石之宗也王之府置说书四人其一人为思齐又曰王甚贤王甚爱思齐前年王来朝京师及还将以思齐往不果今既来召思齐其终得于王矣请子叙之夫说书古未闻其制唐诸王侍读宋直谓赞读之任悉置官上属于王府傅今诸王府说书非官也大都掌侍王游处日诵古圣贤之训祖宗之成法谈说礼乐规讽道义陈古今兴衰之由忠邪得失之蹟以朝夕左右王其职要非轻矣思齐居是职顾不重欤昔邹阳枚叔之徒从汉诸王游皆能极諫之忠隆匡辅之道今王受重托为磐石之宗而又贤又甚爱思齐其率尔二三子夙夜单厥心于王俾永保大勲以忠於天子乃克有禄位於无穷二三子其永荷王之休尚亦有利哉诸所赋诗古体若干首近体若干首思齐字某屋字子载谨字诚之在若金为里人云

送卫无极序

天子之庶官咸以治天子民者也唯郡县官于民亲惠之及民也易县官眡郡于民尤亲焉县有簿有丞令则长而得行其志夫尤亲民而又得行其志贤者为之民受其惠矣古晋卫君柔卿磊落明伟人也居官廉慎平直克称其先世前繇昌邑簿升尹乐安民既受其惠矣今再授为无极令且行无极民又将受其惠乎闻在乐安时为政一师乎古发擿如神明上不得挠下不得欺强暴不敢为恶当路者知其能既屡荐之矣今无极去京师非甚远为政之术殆无易乎其前由是而能益闻知益习且必复荐不已其入朝盖朝夕也然则无极民将又不得常受其惠乎夫君子之道唯所用而已用之在邑一邑之惠用之在郡一郡之惠用之在朝天下之惠君往矣後必来用于朝将天下之民且并受惠乎

送傅子通赴山北书吏序

国家科举之兴进士下第者犹得与诸职官及郡吏岁当贡者相错补宪府掾凡其间能卓卓自树立而论建特异者率科举所取士儒者信有益于用哉科举既罢大学生传亨子通以元统三年乡贡进士受御史荐出掾山北将行以余为同道与业又同姓为昆弟来取别而请所赠焉或曰进士而吏者下第者也子通进士非下第宜犹有可待者即科举未复就试大学犹当得七品官子通乃自损为吏耶是未知言耳士顾所行何如用之小大弗计也且宪司天子视听之府羣有司所受正焉民有病於其上者必於是乎取瘳也吏虽卑入则与其官长论议相可否上下古今之道而建其事之当行者出则佐行郡县廉察百司之治而录其繇殿最夫人之行而黜陟之霆击电观所过震慑出一言而善百姓德之有司报焉一言而不善有司不敢非也而百姓休戚系之矣故使贤者为之彰善而瘳恶除弊而兴利恢恢乎得行其志不肖者为之因挟是以张威福自为即不粥狱于货必深文以要誉而残忍不顾焉是故在位必多贤者而後能得贤者以用而使其志得行然而宪府固多贤者也今子通以进士而小试於吏有行志之得而无张威福之挟将蚤夜业业厉操行树风纪以见于行使人曰儒者信有益于用也又曰子通信儒者信贤信宜获用于宪府而得行其志宪府亦信多贤能得贤者以用而使其志得行也呜呼子通往矣无薄吾言乎哉无负进士哉吾见进用也有日

送南雄教授刘务恭序

天下同文尽海隅郡县凡置吏以治者咸立师而教焉岭以南三大府其地之美且近者莫广东若广东地美且近者莫南雄若王化自北近者固先之矣其民宜庶且富而易以为教夫既地近而化先又庶且富易以教庶一变而鲁者欤由是可以至道矣新喻刘君务恭以广西儒学正书满新被命教授南雄南雄去吾江右仅踰岭吾江右故人物之郡殆所谓变鲁可以至道者而君固吾江右士也吾闻南雄守杨侯贤而爱人先礼义後刑政君至教其民孝弟忠信以服杨侯之化使之知君者尊之亲者仁之长者敬之幼者慈之蚤作夜息稼穡以养其生棺槨以送其死笾豆簠簋以承其祭祀材木以为室庐丝麻以为衣服金以为鬯爵铁以为田器而皆勿以为兵奸宄不作礼乐以兴使人谓吾江右果文物之郡南雄果近吾江右文物之郡而易以教刘君果为吾江右之士而善教哉君与余同郡余为广州文学又同道则夫教者余将与君共勉焉

赠儒医严存性序

儒者通六籍之义明万物之故其於百家之言弗事则已事之必探其本始索其蕴奥极其变故弗异夫庸衆弗止焉医家自炎黄氏下及秦汉以来岐伯榆柎仓扁之徒凡以医名世者其书笼天地之化括陰阳之运综人物之生凡四时昼夜风雨寒暑晦明消长之变与夫民生喜怒忧乐以及日夜兴作食息屈伸嘘吸百骸九窍之动靡不备至其术鍼人血脉涤人五藏投之药石以攻其疾养之谷味以卫其生若是岂易言哉世之诵其书求其术者非夫人通六籍之义明万物之故而能识其理者亦鲜矣是故医之良虽不必尽儒者而儒者为医吾知必良也里人严存性年少而力学博涉经史旁及医药百家之言方将以儒术取进士第以是用于世而科举废矣於是益取医家之书而读之求尽其术以游四方而行其志焉元统间尝以其学行京师搢绅间矣不幸家有故而归其志不能以大遂然往年余留京师闻京师之人多称之今年余还乡里又闻乡里之人多德之及与之语出入百家徵以六籍於是知存性果儒者而为医也其为医果异夫庸衆者也今闻其复将出游请赠一言以别夫医近儒者治人之道故善医者医国今吾民病且甚而有司治之不以其道存性行四方有问者具以其道告之吾民且庶几有瘳乎由是存性之医大行吾道行矣

旌孝图集序

事亲而以孝闻不足名也事亲而遭其变而孝闻名且不朽於後世乎夫使其名不朽於後其亦由文辞哉岳阳民张琦生二岁而失母于兵长而求之三十年不得而不倦风雨往复晨昏号呼鬼神为愁行路相泣卒能归其母使二亲终壽於其室家家虽贫匱力业致养莫年二亲病臂则子为父冠带妇为姑栲洗凡所顺承惟其志既歿葬祭情溢於礼远近莫不称其孝焉事闻朝廷命有司旌其门且复其家又令史官张大其事以诏後世自京师及四方之能文辞者闻之争为赞述积诗古文凡若干卷岳阳之文而好事者乐其有裨於风化也既相与纂萃成集又次第为图十二各首以事以尽夫文辞之所不及者别为一编使予总叙其槩将并传之呜呼琦且遂成孝子之名於不朽矣乎夫事亲人之常也恶乎取名哉世必有不善事其亲者而後孝子之名始见圣人君子虑人道之日坏恒嘉夫当世之善事亲以劝其不善事亲者矧琦所遭非常者乎且今世有号学士大夫者犹或不能无慙於其亲而琦也起身闾阎未尝

学问乃能树立若此者名不朽固宜也後之观其图诵其事者其能无锡类之思乎琦字国宝为善盖多孝举其盛者耳

南征藁序

元统三年诏遣吏部尚书鍊柱礼部郎中智熙善使安南而以若金为辅行其年秋七月辞京师明年夏还至阙下往返万六千余里道途所经山川城郭宫室墟墓草木禽虫百物之状风雨寒暑昼夜明晦之气古今之变上下之宜风土人物之异凡所以感于心郁于情宣於声而成诗歌者积百余篇内弟孙宗玉见而录之其意若将惧其零落而欲久其存者嗟夫古之皇华遣使杖杜劳还采薇歌戍役之苦黍离闵宗周之旧斯皆原情所生而诗由作也今人之情岂异於古哉余惟不能禁余之情而达诸辞耳恶能保其必存以久也自古之诗零落亦多矣矧後之人所作乎余独有感於行迹之远而悯夫宗玉之志之勤於是叙而存之

孟天伟文藁序

文与时盛衰道斯系也文之论世皆曰主乎气蒙则以为有志焉不徒谓气也今夫射不志乎彀不能以中的御不志乎绥不能以及辙梓匠轮輿圆不志乎规方不志乎矩平直不志乎準绳不能以成器为文而不志乎古之作者而能合道鲜矣是故志以为主而气以充之必至之道也河东孟天伟好学有才识尝贡于乡下第春官由是辟掾宪司历御史府刑部枢密院用且未已暇日即读书为文不废凡志记叙述铭赞赋颂之作各极其体汲汲焉古作者之度惟恐其不合盖能先其所志而充之以气者也夫南北之气异文亦如之南方作者婉密而不枯其失也靡北方简重而不浮其失也俚君兼采其长而力惩其失其能合古之度不亦宜哉然君方壮进於学不已譬诸登山者足益往身益高余南归当与君别後数年再至余望君絶顶矣

朱敬立文藁序

士之学其犹农夫之耕乎善耕者不以岁不获而弃其鉏耰善学者不以时不见信而徙其业农而弃鉏耰不可以为生士而徙业不可以为学不弃不徙其知所守者乎国家自科举之兴天下学士以明经就选举岁且千万人及其既废世之操觚以进取者曾不若武夫俗吏以及厮养之徒於是四方士稍稍废学其能不厌弃夫经术而徙业者几何人哉余同郡朱君敬立蚤明经习举子业数就试于乡不利而同辈多推与之余尝得其所为程文一编读之学优而辞赡理着而情达科举且废而犹力学为文章不已方之於农所谓善耕者欤其所守可知矣昔之人有为不龟手之方者徒贱技耳犹有时而为用於国况明经以学道者乎孔子曰耕也馁在其中矣学也禄在其中矣吾日於敬立有望焉

邓林樵唱序

自骚雅降而古诗之音远矣汉魏晋唐之盛其庶几乎时之异也风声气习日变乎流俗凌夷

以至于今求其音之近古不已难哉庾陵邓或之尝采诗至岳阳得临湘邓舜裳所着集曰邓林樵唱者来长沙以示余古体幽澹闲远有自得之趣近诗亦皆清畅可诵特异乎流俗殆古音之近者欤吾闻湘江之滨楚放臣屈子之所游其文辞之被兹土者山巔水厓之居人必有得其遗音者矣然屈辞多悲愤悒郁之声而舜裳所谓樵唱者不类乎是呜呼余得之矣治世之音安以乐亡国之音哀以思邓林樵唱其安乐之音乎吾於是庆舜裳之遭治世而悲屈子之不遇也

欧阳斯立诗序

诗本性情为辞者也古之圣人以成政教予尝恨今之诗不复古矣而其人性情岂异哉昔者孟子对齐宣王曰今之乐犹古之乐取其所本云尔余以谓今之诗亦犹古之诗也故夫善言诗者不徒以其辞而以其所本所本正矣辞或未工不害其为教本失其正辞虽工何益哉古鄙欧阳斯立蚤以能诗见称诸名公间余往年过鄙见其所着时余未能知诗不足以识别今既十数年而复过之则前所见者多已亡散其门生故友手抄口诵仅十存二三而其言皆本诸民彝切乎时政未尝无为之於是知斯立之作不徒以辞者也莫年积力深至气益苍老当更胜昔余又恶知古诗之不在今乎斯立既寻绎其故编属余序其首因出余旧所倡藹数什视之使人心悸面赧欲自毁之而不可得不识後之视今其悸赧复何如也亦本乎情而叙之

玄机子序

百家术数之传不一而其言皆欲使人知死生富贵之义吉凶祸福之理进退存亡之机君子取之以守道安命岂无补於世哉作玄机子序玄机子者新喻人也姓张氏慧敏而多学父子以所能斗数游衡湘间其法三十二星本之以二气变之以五行衍之以七曜错之以四余以人始生年月日时之支与日之数遇所得某星而生数若干重四以一八而布之以观得位之曜万千百十分厘以积之而成出身之荣星有吉凶筭有赏罚赏者益之使多罚者损之使少多者贵富少者贱贫死生祸福一占乎是矣其术世所罕能相传出汉时东方朔之学而由来久远卒不可考然其为法颇简易而善取徵其言陰阳战伏之机阳衆而胜则赏陰衆而胜则罚夫阳者君子也善也陰者小人也恶也善有赏而恶有罚善者吉而恶者凶其为义固有大焉而托之细也史称东方生博观外家之语而列传记其狡狴是数之传信出於朔耶何其异哉

临湘蔡氏所传洞玄法书宗派图序

道可以形求乎曰不可道无形形者道之寓也法可以言传乎曰不可法无言言者法之喻也古之真人契道於无形悟法于忘言凡其赫然而外着者非夫寂然而内定者欤临湘蔡君栖云读书好道术尝受洞玄法书於武当刘尊师因诉求传授之次乃图尊师而上至於玉枢青灵之像为一卷又录前人所述本末及所传法书大要於後予过岳阳访之山中出书及像使余序之呜呼道非可形求也无形者存乎神法非可言传也忘言者存乎人故神者二气之能

依人而行者也一闔一辟吾气动息一慘一舒吾气吹嘘一出入吾气呼吸天地清宁吾气之凝风霆激作吾气之抟濯濯乎吾前烛烛乎吾後奕奕乎吾左右上下肃肃乎吾身之中惟无所感焉感斯应矣是故道不在图而在夫人法不在书而在吾心之神传曰诚於中形於外不诚未有能着者也蔡君自号渊默是宜有得于寂感之机诚中之义矣道法岂外求哉

王安民管斑集序

夫规两於铢至微也而百钧起之营寸於分至寡也而千寻始之求亩于跬步至近也而万里基之君子衆辞以成文片言以见道岂徒以博为哉亦有其要而已巴陵王君安民积学为文有志於古之作者余过岳阳得其所着管斑集阅之诗古文凡若干首短章泉幽大篇云委本之以六经贯之以百家出入韦柳之门步趋韩欧之径要皆不违乎理而必涉于世教其於学可谓博矣其为言可谓富矣其於见道可谓非拘拘者矣而其名集取喻於小管斑之义母亦百钧之铢千寻之寸万里之跬步欤吾知自视欲然不为夷世之辞而举微以见着也故自管而窥豹犹因文以明道指一斑以谓全豹不可而全豹之章不殊乎一斑执单辞以论至道不可而至道之文不离乎单辞昔者孔子蔽诗以一言反义于三隅示学者以其要也今君之学固亦得其要矣乎吾闻志之壹者其视不乱守之专者其得必精喻学於窥管则志壹守专於是益见君之所学矣苟自今进进气日益充识日益广濶步千古之上高视八荒之外文将彬彬乎典诰诗将被乎风雅时而出之灿然虎章烂然彪炳吾且见其变化犹龙矣又岂窥豹一斑而已哉

送清江孔学礼谒曲阜诗卷序

清江孔君学礼盛年力学才艺兼美而意气卓犖如干将镆鋂不可狎视出与贤士大夫游皆敬之爱之奇其才以为必见用于世今辞亲别友将展敬孔林掉鞅燕冀曳裾王侯之门以抒其平生之所蘊蓄於是邦之士夫咸诗以壮之余覩其家藏谱牒知为毅夫平仲诸孙则洙泗之流分????演葩华滂沛是宜有异于人也方今崇笃夫子之道凡诵其诗读其书者取官爵如寄矧为圣人之胄乎学礼造曲阜而挹孔林之秀升堂而闻金石丝竹之音入宗庙而见琴瑟书册之懿精神意气互相感发而心领神会於千载之上他日施诸事业必求无愧于圣人之胄是则吾党之所期待也故为之序

傅与砺文集卷四

傅与砺文集卷五

钦定四库全书

傅与砺文集卷五 元 傅若金 撰序

衡府判于公复学田序

衡石鼓书院故有田在属邑茶陵者东西庄凡六百亩有奇茶陵既自为州三分其一入州学独东庄仍为书院田不幸庄近灵巖寺寺僧恃地阻险而去衡又远校官力弗能制数夺有其田事即闻有司恒受僧赂易置曲直前後数十年田三复书院而三夺之然文牒藏学官虽未得田犹不可泯或教僧购得其牒毁之以踪迹自是积十余年莫与理者後至元三年程义孚为山长时会监察御史部使者俱至郡以其事白之御史按有司得实即移湖南两府使复田书院而罪寺僧且徵田租御史去寺之主僧泰赂藩府文法吏求解吏受赂乃檄衡判府于公会茶陵守更详诘其是非实欲缓之泰自喜陰使人行赂於公公弗受泰乃夜遁公至茶陵悉致寺僧案得其奸状上之藩府文法吏受僧赂者驳前议非泰辞不听复田檄再下公益自坚不为利夺未至茶陵先遣人至寺执泰送州州不受欲纵使逸去公闻之驰至茶陵立治泰诬夺书院田状泰具服不得有所隐狱上文法吏不能破矣卒复其田衡之士德公者各为歌诗以道其实俾余序之嗟乎君子之食禄於上者将使事平于下也凡民有争犹必眡其曲直而理之不敢有所阿私矧书院田以供先圣之祀而为邦家育材者乎前时有司不顾是非之正予夺之宜徒惑於浮屠氏而利其贿赂视公所为而不愧且死则非人矣士之歌公有以也夫公治衡善政不少复田特其一事云

送李尚文之广西序

海之远也或可桴矣九夷之陋也或可居矣昔者孔子不遇於鲁卫而去之志岂厌近而乐远哉君子道合则仕不合则去亦何固必之有吾友庐陵李尚文材美而好学介直而不阿其不达於乡郡而游於湖南也有以湘乡之直学荐之者久之志稍不合即复浩然弃去且遂为岭南之游尚文孔氏之甥而亦孔氏之徒也母亦勇于浮海信于居夷者哉吾闻圣人非果为是也居今之时虽科举暂废而四方牧人之长循行之吏无不得举茂材荐遗逸者夫以湖南之大而使士之不遇怀道以适远吾惧彼人之不知而讥子之不能屈已以求合也然今岭南两府多贤大夫嗜道如渴饥求贤若不及且以余之不肖尝受知於是矣子之往也必有合焉传曰怀与安实败名子其行矣余亦不合于湖南而求去者君子之道岂固塞於近而通於远哉

送孔学在诗後序

送临江孔学在谒曲阜林庙遂之京师诗文凡若干首郡人傅若金叙其後以终作者之意呜呼孔子之圣其犹天地乎天之德人不忘其覆矣地之德人不忘其载矣天地之德不可忘也圣人而可忘哉是故莫大乎孔子之道莫远乎孔氏之泽自吾生人之必由其道万世不能忘

其泽矣而况为子孙者乎於是学在将适京师念其先世之不可忘也则浮江淮导河济以达於洙泗求曲阜林庙拜之而序长幼於阙里之族然後北之京师焉可谓知所先矣夫京师天下之会而阙里圣人之乡也为士者身不至京师不足以昌其道为圣人子孙者身不及阙里不足以正其宗不昌其道非忠也不正其宗非孝也忠孝之失君子不与今兹一举而二德具焉而又先其所厚庶无愧圣人之子孙矣且京师之搢绅大人佩服吾圣人之道沐浴吾圣人之泽孰不欲富贵吾圣人之子孙者乎学在益宜不忘其先矣诗云无念尔祖聿修厥德富贵其外者焉学在名思深距先圣五十四世其先四十世祖绩仕为吉推官子孙遂为西江孔氏云

恒斋诗序

长沙当两府之会郡人山房易君多与其士大夫游凡为郡邑守令之贤否日闻焉数为余称宁乡尹臧明府之为政忠顺以事上恺弟以莅民久于其道而不变尝名其修省之室曰恒斋斯其治民得于修身者欤愿徵辞以记其义嗟夫人而无恒不可以作巫医况君子之临民者乎夫恒者悠久之道天地之经人之常也天无恒不能久其覆地无恒不能久其载日月星辰无恒不能久其照四时无恒不能久其变化圣人合德于天地并明于日星同序于四时亦惟有恒哉是故君子修其身而信于民其必有恒守者矣吾闻臧君之尹宁乡治农桑之本修常平之政申庠序之教直民冤狱御军卒之暴于其邑者而又新丽譙以谨人时造舟梁以济病涉凡堂宇祠庙之必葺者莫不备至民既信其令而安其政殆所谓贤尹而有恒守者哉苟由是一邑以达之天下久于其道而不变可以辅成圣人之化矣

清江王君孝感诗序

莫易乎事亲也而可惧焉莫严乎事神也而可孚焉事亲而惧斯事神之孚欤清江王君奉二亲克致其孝敬徙居长沙之日孝益加焉亲尝有疾且笃君以至诚祷于江东之神而亲疾以瘳乃为庙于其居之侧身自尸祝而晨夕奉之以报神功德于无穷凡其所以为亲者可谓至矣今君之母年且九十而康宁如当时君复有子以承其家而嗣君之志神之所报君又庸有穷耶呜呼赫如而幽也寂如而昭昭也神可畏也不可度也而於王君之求应答若是其疾神果依人而行哉吾知善者佑之不善未见神之可诬也故曰孝弟之至通于神明人之欲致事神之福者其亦尽吾事亲之道乎

送南宁路总管宋侯之官诗序

边郡视中州远王化地重而多险故得人则治不得人则乱守令恒难其选虽其佐吏朝廷亦皆优其禄秩以庸之而三岁特一遣尚书御史属会行中书视大府所上郡县阙共合比其名数而加铨择焉至正改元潭别驾宋侯以宽信廉慎受知于时选授广西南宁路总管夫宽则衆得信则民任廉则不伤财慎则不慢於政合是四德而为郡南宁之民其庶几乎南宁本唐邕州其土与左右江犬牙相入而南控交趾旁郡獠獠出没不常宋因南汉升建武军镇以节度国朝复邕州即其地剏宣慰司制两江後稍徙太平加都元帅府元贞初始合广西两江道

定置宣慰使司都元帅府治静江而分府于邕天历间改邕为南宁分府所部两江州郡数十各受节制其俗剽悍守长多所自署岁赋徒入其文书而已朝廷亦羁縻之不切?以法独南宁赋税之征刑律之治一砥中州守令将佐悉上命所置然比年西南兵兴无时列郡骚动供亿之费百倍于昔加之贪虐相乘掊克无已民力困弊斯时为甚郡守之选益难其人传称管仲之言曰招携以礼怀远以德吾见今之招怀者或异于是矣昔龚遂为渤海而盗兵息孟尝守合浦而去珠还无他去民之害而思其所以利之者耳夫海隅之民其情岂独异于中土之人哉其乐生恶死同也趋利避害同也其有父母之养妻子之育而耕作食饮同也求其秉彝之好见善而喜见不善而恶又无不与中土之人同者苟抚之以其道则携者以附远者以来咸愿列于中土之民矣不以其道则虽中土之民其不胥为乱者几希书曰民心无常惟惠之怀孔子曰道之以政齐之以刑民免而无耻道之以德齐之以礼有耻且格夫德惠之感岂惟中土之民为然哉侯尝为岭南推官刑不滥矣为浙西漕属事集而不扰矣为潭别驾上不失信下不失民心矣今郡守位既尊得专其政而侯吏事益多又恒承之以礼让守之以忠笃所谓虽蛮貊之邦行之者乎汉史称良二千石而他日有自郡召至阙者请於兹行告之矣同郡多赋诗相饯俾若金序之

送德巖父上人求母序

德岩父上人者新喻钱氏子也幼时以其祖母之命薙髮从浮屠师受业云山其母段氏独靳之然卒强从其姑自是恒郁郁不乐无何与其夫俱入沔阳因留居十余年不肯还虽其夫与子数往来以好言慰之请与俱载终不许且曰必致父俱来乃可归上人闻之亟白其师请往求母不许即日夜戚戚思慕不可堪与人言常若有不足于心者语及辄於邑泣下不已今年春得母报且疾甚又请往不许则又日夜思慕泣下不已益持斋戒不近酒肉恒昼诵经礼佛塔至终夕不懈以祈母生凡可以用其心者无不至誓必往求母以归余过清江遇之天宁目击其事状如是察其志有可深悯焉者嗟乎夫人莫不有父母之爱圣人作经孝先百行虽释氏书亦有所谓大报恩者七篇近世其徒多诵其书不由其道视上人所为亦可少有启发矣夫不能亲其亲而又禁人之亲其亲者彼独何心哉其同学瑞中与上人皆读孔氏书其心皆与儒者合於是行力相之谓余学孔氏者宜乐诵人之孝故余既赋诗赠之又序其事于首以坚其志云

送熊立义游学庐陵然後北之京师序

清江熊立义将游京师自惧其学之未充而请所益焉因为之辞以告之曰凡土地之产可用于国者多矣而亦由人力之至哉松柏非不材也不先之以培植不足以中梁柱南山之竹非不直且达犀革也不继之以栝羽鏃砺不能以入深培植之而大矣羽之鏃之而利矣虽欲勿用人其舍诸於是立义且将束足卷轮还之庐陵蕲师取友讲切旧学益培其本以植其干仁义以为羽栝忠信以为鏃砺然後持之京师求试其用若是则立义之行将有成矣然犹自疑南方疎远之儒不敢信其能必达与否也而又请益焉则又为之辞以勗之曰九州荆去中国诚远矣昔者圣人之定土贡未尝弃其风土所生之物焉况土之有用于国者乎今吾与子固皆荆之士也无所用于世则已苟有用焉岂以远而弃於圣人之土哉行且见子之充贡矣其

往勿疑书以为送行序

送刘伯原适武昌将之京师序

京师固舟车文物之会而遭时休明圣天子更化羣贤彙进天下之士苟非负巢许之志厉夷齐之行而违世长往孰不延颈引首愿一至其地以观礼乐之盛哉而或不能勇于自遂者将其才不足以自见欤抑其力不足以自振欤才足以自见力足以自振而不能犹是或者其人安于田宅之养溺於妻妾之奉而所乐不在是欤自有志者视之其为人何如也清江刘伯原盖所谓士之有志者往时絶彭蠡溯江汉登武昌大别诸山访神禹导水之蹟求文王南国之化怀古赋诗北望天际未尝不慨然即有乘云远举之思而遭邇不进以需其时焉今既遭其时矣四方之游京师者且相属道路矣矧武昌视江西少北去京师为近在伯原又非有前数者之患是行其勇于自遂矣乎过燕台之下见有以千金市骏骨者幸为告曰千里马且至矣

送纯上人序

世之学浮屠氏而局焉者惧其师说之见黜于孔氏也恒树辞以自卫而絶游於吾徒吾徒者亦以其说之不合於孔氏而黜之不与之游於是道之相去益远矣其不惧见黜而游于吾徒闻吾徒言则乐而修习之斯人者是亦孔氏之徒矣而服其服而居其居而氏其氏或者亦托焉以浑其迹耶清江兴化释德中读书能文辞日以孔氏之言教授於其宇郡之贤士大夫多与之游今其志汲汲若不足将行四方求名人鉅公而访之以廓其高明而恢其所未大岂余所谓孔氏之徒而托焉以混其迹者欤何其乐闻吾徒言而急其求也夫孔氏之言道高远也而不为虚空使不可即焉卑近也而不为土块使可辄焉徵诸一身放诸六合达之万世人病蔽且画尔求之则不远履之而能至谓吾浮屠氏而不资孔氏之道者自欺者也谓吾道且广大而狭孔氏之道者欺人者也自欺不明欺人不诚不明不诚道恶乎行而德中皆反是反是孰不乐与之游哉吾见其往也譬之海水焉虚而无不容矣其返也譬之泰华焉高而不可齐矣闻闽越多浮屠学子行而见之有局而自卫者彻其障焉

赠魏仲章论诗序

苟不足其所已能而必之通都大邑文物之会求名人而私淑之斯学之善者也审能是进于道矣况文辞乎诗之道本诸人情止乎礼义古之人非尽学而能者三百篇虽曹邨小国之风圣人取之亦奚必通都大邑之求哉然吾闻古之时淳俗未去人知礼义其性情无大相远则其言辞固相近也故虽涂歌里咏在今之学士大夫且有不能几其语者而不学可乎学也而不求诸其上可乎新淦魏仲章妙龄秀质敏学好问於为诗尤所笃意清逸之韵俊丽之语观者谓称其风仪其师陈道之尝为序论其集而称之京师诸名公间仆虽不及深?其所得而窃窥诸君所与可知矣今者其志若不自足将遂北游观诸中朝之作者以庶其进是固余所谓善学者矣而犹厯厯徵余一言以发其槩顾余何足以知诗哉独尝远游於先辈之以文章名天下而及见之者邹人范先生蜀郡虞公浚仪马中丞其机轴不同要皆杰然不可及者也而今先後逝矣退老于山林矣其在朝者翰林揭先生欧阳公深厚典则学者所共宗焉相继至

者王君师鲁陈君仲衆贺君伯更张君仲举皆籍籍有时誉而居省台及仕於外者犹不少凡其学之所诣虽不可合论而皆捐去金人龕厉之气一变宋末衰陋之习力追古作以鸣太平之盛子行见之而请益焉必有以语子者余何足以知诗哉孟子曰一乡之善士斯友一乡之善士一国之善士斯友一国之善士天下之善士斯友天下之善士以友天下之士为未足又尚论古之人仲章其尚论古之人欤异时归自岭南求子都门请刮目以视新作

送习文质赴辟富州吏序

国家萃人材广文治然科举所取士有恒数承平既久士益自奋为学举者日多江西岁就试且数千人而预贡礼部南人才二十有二於是不能无遗才焉而朝廷亦恒视其能之大小所胜而录之使各称其用国初定令儒生愿试吏郡县者优庸之而不屑为者有矣及比年幸进既多正涂日塞持法者病其壅于治也则闭之门而固拒之冀杜其滥而儒者亦缘是而胥厄焉凡子弟之有志禄仕者苟非藉世胄之资其不由刀笔发身则不能以达吁亦其时使之然欤识者知吏治之不可不资於儒也顾名实何如耳新淦习文质将以儒术饰吏於富州而问言于余以别文质尚?夫国家用儒之实哉富为上州距大府不数舍而远大臣之所监临风纪司之所纠察行一政善其上必先知之行一政不善其上亦必先知之而黜陟系之矣吏於斯者可不慎乎然文质以儒名者也用真儒无敌于天下而况吏一州乎昔者孔子谓子夏曰女为君子儒文质之於儒庶将为君子欤毋使由他而吏者得以藉口则岂惟一州哉虽大府行之矣岂惟一府哉达上下行之矣

赠世医李宜卿序

医之论世尚矣曲礼曰医不三世不服其药故疾者人之所慎也疾而必世医之求以其业之专而施治之习耳业专则视证必明施治习则取验必速新学之士苟非儒者有博辨明敏之资得名人而师之则於轩岐以来医家之书读且不能句况望深?其理以达於治哉医之明暗病者之死生系矣不慎得乎新淦李宜卿儒而世其医者也以儒故明乎理以世故习于施治祖若父皆尝为医官四方大夫士多敬礼之至宜卿嗣守先业益充其学问而不求闻於时顷年有自京师来者以太医檄授宜卿医学官宜卿谢不受曰吾本隐于市医以行吾志耳奚以名为哉平居蓄善药远近有疾者无贫富贵贱有叩焉辄应之无所择且不尽责其利家有堂名曰诚求即其所取义而存心可知矣孔子曰君子素其位而行不愿乎其外宜卿守世业以行其志非素位欤辞太医檄不受其名非不愿乎外欤是亦可谓君子也已传所称韩伯休宋清者岂斯人之徒欤

邹云章利市卷子後序

艺有相悬絶而相资以传者装潢是已夫六经诸史百家之文圣贤君子以载道述事而垂世不朽者也而篇帙之不成籤轴之未备岁久坏乱将不可理安在其能传故凡图书及今人之文辞欲存远示久者必资其装潢之功艺虽微恶可少哉於是新淦有邹氏者专其业且数世矣其曰云章者一日?是帙以请曰吾先世本道蓆诗书之後其业斯艺以名者自吾曾祖始吾

曾祖业之吾祖又业之至吾父业之益工又恒与一时名士大夫游岁大比吾乡之角艺塲屋者自吾家为试卷必捷必奏名春官号利市卷子当时搢绅士所赠言至于今手泽之气犹存也而吾修吾祖父之志不敢变先生幸赐一言以张之嘻异哉邹之艺余固有取其切于斯文矣而又能利人之进取若是乎宜士之趋之也然余有感于兹矣夫利市云者譬之鬻器物焉幸其必售且获厚利也故曰近市利三倍士之欲事君而可为市利之道耶古之人以乡三物取士固贵其贤能耳且圣人岂不欲仕哉昔者子贡问於夫子曰有美玉於斯韞匱而藏诸求善贾而沽诸子曰沽之哉沽之哉我待贾者也市利之道而可为圣人盖孳孳矣是故龙断之夫君子贱焉余非有靳于邹氏世业之利也直为文士之嫌耳若其名一艺于世而使经史百家必相资以传是固慎择其术者其为利亦远矣哉

送道士李环间序

清江多名山其最神秀而大者曰阁皂曰玉笥仙者所宫焉玉笥之西数十里有山曰所峯者相传南昌尉梅子真尝隐于其上石室故又曰石室山山能兴云雨以泽其土有司岁致祭遇民水旱必祷之夫有仙者之迹而能兴云雨致祭祷其山灵矣灵秀之发固亦鍾乎人哉西峯观有李尊师环间者吾友平江文学尚宾之兄之子也清修力学攻为辞章将游京师览乎舟车人物之会庶几遇名人真仙发挥其道妙而大其观盖其志不欲浮湛山中局於旧所闻而已也吾识李氏诸父昆季文雅宏博其出仕多儒者之政师承文儒之风居乎灵秀之境而力学攻辞章不局其旧闻有不出出而进於道必名其山矣人之杰固与地之灵相发哉昔师之先世周柱下史聃尝着道德五千言後世有用之而治者师之出母亦有意於用世乎他日归益得其家学吾将就之问礼焉

送张闻友游湘中序

士之游必之通州大邑者岂徒极登览之胜角声利之雄哉观乎山川人物之富以发其气益其见闻必有进於道者矣荆楚之邦地大而物蕃其镇衡岳羣山宗焉其浸洞庭衆水瀦焉其人屈原宋玉贾谊之流百世慕其风焉观於是者问学宜识其所会归而文辞多忠义之气施诸世用盖将一日不忘乎君者也清江张闻友好学而志远将游湘楚之间以余尝涉乎其地也就问津而请所赠焉夫人之志同不同不可知也而游观之感随遇而变矣昔者余过熊绎之封登定王之台访太傅之庙古今交于前忧乐集於中南望苍梧九疑緬緬而有虞巡狩之蹟纷然结乎吾虑矣北眺则大江流滔滔而禹平水土之功悠然兴乎吾怀矣左瞻炎帝之陵则思耒耜之教矣右顾三苗之山则慕干羽之舞矣由是浮沅湘求骚人之事并江汉询文王之化历河岱掘邹鲁之风然後北之京师以观其会南至越裳以极其远凡吾气之所发见闻之所益而於道少有进焉游之助也闻友之是行也其所感遇将有同於余者乎其将观乎衡山洞庭屈贾之流而学问文辞有所增益者乎施诸世用亦将不忘乎君者乎书以为赠行序

傅与砺文集卷五

傅与砺文集卷六

<集部,别集类,金至元,傅与砺诗文集—文集>

钦定四库全书

傅与砺文集卷六 元 傅若金 撰 说解

东楚说【并序】

前衡山尉满子谦恭让谨信以忠孝自力为政一本乎爱人自尉衡山摄县事辄能使民歌颂其政既去而思之可谓难矣苟充其道仁不可胜用焉尝自号东楚得湖湘人文辞甚富来京师复以示余求余为之说说曰

大哉气之机乎天圆而运四时行矣地方而载四维张矣运者不息孰知其极载者无疆孰知其旁其为化则有渐焉故天地尊严之气始于西南而盛於西北天地仁厚之气始於东北而盛於东南天地果何心哉亦顺其化尔吾尝观夫东方之野日出乎海四方莫不照也而濒海之墟先被其光矣云兴乎泰山四方莫不雨也而近山之土先承其泽矣故东者生物之始东作而西成人理岂异於是哉仁以生之义以成之仁者其天地之心乎以之亲亲而亲顺以之事君而君悦以之教民而民信以之顺物而物化故东於位为震於行为木於时为春於五常为仁合天地人之道也吾求东楚之义而得天地人之机作东楚说

贤山说

金生乎鑛者也而鑛之贵也以金玉韞乎璞者也而璞之贵也以玉世之所贵乎山川者为其为生贤之鑛韞贤之璞欤距新淦百余里栎山之奥羣峰环焉张氏之族居之张氏之贤者贤叔富而乐善质而好礼闻名士大夫之过其乡恒卑辞重币以致之使诸子若孙日侍其游处而皆知好学为文章今年且七十余岁聪明康强居是山之间熙熙然安夫生而不伐吾性是可谓贤也已其尝所往来者题其所居曰贤山好事者因图以传观上下而吾郡之先辈能文辞者叙而记之诗歌而颂之是何贤叔之能得此於人也何兹山之能得贤叔而遂名也夫天下山水亦富矣而其美恶之誉率由夫人以闻故莫非泉也而有廉泉泉非廉也廉者廉之耳泉何与於贪廉哉莫非谷也而有愚公谷谷非愚也愚者愚之耳谷何与於愚智哉故张氏兹山无与於贤不肖其以贤称者贤叔贤之贤叔贤之而知贤叔者因亦贤之知贤叔者贤之而凡闻之者衆起而贤之贤叔亦贤山也是知山之有贤固为金之鑛玉之璞矣继今张氏之子孙其亦无忘兹山乎诗云高山仰止景行行止朝夕仰之而增高焉吾见张氏之子孙盖多贤矣作贤山说

栖梧说

物之异者不常有其择所止亦必异夫常有之物夫两足而翼昼飞而夜伏渴则饮于溪饥则啄于野求林薄而依之天下之常禽皆是也或集于桑或萃于柳或起于榆枋或投于丛棘蓬蒿之卑也榛莽之污也举无所择焉彼其志之苟安斯止而止矣夫何择之有鸟有凤者两足而翼渴饮而饥啄无以异乎常禽也然其为德五色而文天下有道则见无道则隐翱翔千仞之上俯视万物之细择非其止不止焉於是其志异常禽千万也故竹实以食之醴泉以饮之而非梧桐不栖惟无所苟而已矣向使凤者其志苟然巢於枳棘之林杂乎鸡鹜之伍饥不待竹实而食渴不待醴泉而饮则世亦不贵其为凤矣於常禽何别哉是故君子之异乎凡民其志亦无所苟焉耳临湘蔡氏子若凤幼时尝从吾游今既长而仕矣朋友因其名而称之曰栖梧是能择所止而无所苟者欤诗云梧桐生矣于彼朝阳凤凰鸣矣于彼高冈今天下有道吾将期凤之朝出鸣也作是说以贻之

元英字说

时之治也以其人矣非人不可以徒治士之显也以其才矣非才不能以徒显世之所望乎士者岂徒私其才於身哉固将达其用於国家焉前巴陵监县葛公克诚之子月鲁英敏而锐於学师友奇其才之迈而期以必显也相与字之曰元英是为国朝之英而将为国家之用者欤夫天地之间元气冯冯人物以生精气负负人物以异列星之英五行昭其耀矣羣山之英五岳专其秀矣草木金石之英榘楠豫章芝兰芳草瑶琨磐砥莫耶干将属镂之属内全其美外着其用矣古今之士怀利用之器负不羣之望德施当时名显後世若是者人之英乎故知天下不徒治人才不徒生材不徒用诗曰思皇多士生此王国王国克生维周之桢元英尚为国之桢乎无负师友之望也

竹山说

蒲圻王君读书能文辞喜谈老佛之学以竹山自号其所亲临湘蔡栖云昆季数为余称其为人求书竹山二字遗之且徵其说余未尝识君也独于其所自取号而知之孔子称仁者乐山以其德之似也夫王君固取其似者以自号欤然山有羣木之茂密矣有衆卉之荣华矣有百草之芬敷葱蒨矣君何独取於竹哉夫茂密者未必皆材荣华者未必皆实芬敷葱蒨者未必久而不变今夫竹羣而不比分而不孤清虚而能坚林壑之幽也不能隐其美霜雪之厉也不能易其 昔之七贤游於林六逸放于溪皆惟竹焉是好夫固有所取尔王君或亦斯人之徒欤惜余未之识也何时访君山中共造竹下果有得焉必以语我

监翁说为医者甘明叔作

夫穷理以致知犹鍊金以取监修治之必精而後明可及焉工之治监而不精其能成业鲜矣况其可监乎凡为学莫不然而医尤甚穷理之不深视证之不明而求愈人之疾是不治监而求照也监之不明无损於物医之不明几何而不杀人哉岳阳甘君明叔号监翁者以儒者业医又博通天文地理陰阳法家之言其於轩岐以来名人所着难素活人诸书穷讨之必尽见其义故切脉以知证譬持镜以鉴?投药去疾不啻若镊颌髭然翁於医学殆所谓业之而精者

欬吾闻昔之神医有所持铁监能照见病人五脏六腑者庶几翁之谓矣翁见病人腑脏固以心为监哉作监翁说

王经历名子说

甄用监经历王君孟甫以其二子及其兄之子皆未名而问於余且徵其说夫问名古之义也余不敏何足以与於斯虽然尝闻其略矣不以日月不以山川不以国凡若是者窃知所避焉君之长子年十有五既导之以学将责于成人其勤未可以已也请名以进兄子年十一知所以事长矣必教之让请名以逊幼子生甫三岁则日望其成长者也请名之以遂夫人幼而学长而教使之知进进以立父母之道也幼而学长而欲有所称焉其子之志乎昔者孔子圣人也而必曰吾十有五而志于学学矣而必曰不厌夫然故至于立至于不惑至于知天命至于从心圣人且尔而况于他人乎君子之道若大路然夫固行之而必达譬诸适千里者中道而不进吾止也苟不止焉其至必矣进也其不止於中道而求必至乎请字之曰公至余盖期进于成人矣逊与遂也请俟其时而字焉

止堂说

新喻云峯佑师以止堂名其禅定之室而俾其里人申一言以证其义遂为之言曰学道亦有止乎曰道无穷止则罔功学恶可止也然则无有止乎曰学必知止乃有定学恶可不知止也故止非画而不进之谓安其所而不迁之谓也且天地万物莫不有所止矣轻清而覆者止于上重浊而载者止于下鳞而泳者止於渊翼而翔者止於木蹄而角者毛而伏者齿而啮者止於丛薄林生而上植倮而能言者止於土故岩穴隐者之所止也田里农夫之所止也道路行者之所止也猎所止山林渔所止川泽商贾止市百工止肆公卿大夫止於朝圣贤止于道德道德者人之舍也孔子曰於止知其所止传曰为人君止於仁为人臣止於敬为人父止於慈为人子止於孝与国人交止於信斯之谓矣抑又有义焉止也者定也静也动而不挠於物也夫人之心日胶胶乎与物接万事役之衆慾攻焉惟静定而後能应惟静定而後能不乱不乱而後能返乎性返性则至道矣是故止乎静者德之始止于极者道之终止乎止乎其始终道德者乎或曰师浮屠也其道以清静为家圆通为宇光照为户庭吉祥为牀座无所止亦无所不止故无有止亦无无有止吾恐子之言不类其师何如予笑而不应作止堂说

张伯龙字说

临川张氏子弟之秀有举为临江之新淦直学者曰汝用本名某荐者不知其某名而用其字以名之名既上不可以易也所与游者因请易其字曰伯龙而属余为龙说余见伯龙好学而多能将欲进而有用于时者其尝观易羣龙之象而有得乎夫龙者物之至神者也圣人取之以着乾刚之义而示消息进进之几学者於是得时行之道焉初九曰潜龙勿用以其时之在下而不可有为也隐而未见行而未成故君子居以养其志学以充其德孜孜夙夜体健不息以俟夫二五之位交君臣之德合而後沛其泽於天下其为用岂不博大哉然过是则为亢矣为有悔矣君子戒之故龙宅乎九重之渊嘘吸元气登降六合凌厉三光之精用之以雨天下

两仪资其功万物仰其泽不用伏於渊泉而已耳夫固需其时焉是故善得时者莫尚乎龙善言龙者莫尚乎易且龙德之大其来岂一日之素哉养之於下成之於中达之于上故物不素其养则不能成乎用君子不素其养则不能成乎名孔子曰君子进德修业欲及时也伯龙诚有志君子之德业欤其尚进修之以及天下文明之时吾见其泽之施也有渐矣

张生德常字解

仁义礼智人之常德也在君子无以异於人者君子之异于人惟能恒有其常耳常之为义博矣哉夫天地德至大矣天之尊也而失其常天则不能以覆地之卑也而失其常地则不能以载常德之失在天地且不可而况人乎是故父子有亲父子之常也父子而有不亲失父子之常矣君臣有义君臣之常也君臣而有不义失君臣之常矣兄弟之常友也夫妇之常别也朋友之常信也而皆反是兄弟夫妇朋友胥失其常矣恶在其为德哉故君子诚之为贵君子之於德体之於心修之於身诚故无伪无伪故可久可久故不易不易故谓之常孔子曰中庸其至矣乎民鲜能久矣庸常也夫人之於是德岂独非常性哉由之而弗能知得之而弗能有有之而弗能常君子果异乎凡民也已

临泉解

天下之士心慕朝市之荣者必违山水之乐志希岩壑之胜者恒乏当世之虑处乎荣而兼有其乐据吾胜而不忘斯世苟非道义君子学圣贤而有见焉者弗能也余游衡之酃邑得惟中王君为邑校官殆其人乎惟中家来之大川环其居青林翠壑幽泉净石与云月烟露争胜几席之上朝观夕游吾知其乐於斯也审矣乃今出仕于外自是而升将致显荣然其处也不必絶乎市朝出也不必谢乎岩壑尝以临泉扁其读书之室以志其胜夫山水登临之乐均也独取夫泉何居惟道也在天下犹水之行地中往者汨汨而未尝息焉来者混混而未尝竭焉始之以涓滴成之以河海君子体物而观妙莫近於斯是故逝川之叹闻诸孔子源泉之喻发诸孟氏惟中盖学吾孔孟而有见者也不然奚取於泉哉今夫发蒙於山成流於江委顺于海洋乎吾见其流动而无已也浩乎吾见其充满而无际也惟中观于斯泉反诸吾身坎止流行必有得于中矣孔子称知者乐水惟中庶其知者欤夫知者为学不厌惟中其不厌於学欤溥博渊泉而时出之亦取如是而已惟中名得臣其先本出晋阳徙居於来祖若父世有长者之行道义固其家学焉

傅与砺文集卷六

傅与砺文集卷七

钦定四库全书

傅与砺文集卷七 元 傅若金 撰题跋

书安南使求书卷後

安南使至京师之一月阮飞卿持纸即余求书大纸六十二番为一帙其作大字者三十七纸纸可四十字书醉翁喜雨二亭及岳阳楼严先生祠堂记次者十七纸纸六十字则书前後赤壁赋又其次者二纸纸百四十余字则书克已铭既悉为书之又如克已铭字者六纸求书吊古战塲文而余意不欲书也夫兵者圣人不得已而用今天子方以文德怀四裔苟不得已伐罪之师则有矣岂若好功之主穷兵以毒天下者哉余不欲称古战塲於今日也且其求书於余亦以余尝使其国而见知乎吾闻伐国不问仁人有问焉君子且耻其对今而求书古战塲文於余将以余为不仁是余前日不足见知其国余又耻而不欲书之藉曰文以吊古有风利之义而其辞则已戚矣自余幼既不忍诵焉况书之乎若纸不可虚反则请书汉文帝赐南粤王佗书以归之呜呼余书不足称也远人之求及此盖笃好於文者矣岂不深可尚哉

书邓敬渊所藏大明历後

右邓君敬渊所藏至元十四年丁丑岁大明具注历一本盖国朝混一天下始颁正朔之制也其十二月下所注与今授时历小异而加详焉有长星短星往亡公辟俟大夫卿六十四卦七十二候自金正隆戊寅迄大元至元丁丑百二十年咸属而建国革命之始改元置闰之次灿然具见若八门占雷五鼓卜盗十干推病八卦勘婚凡以使民勤事力业趋吉避凶者亦莫不备至呜呼古者圣人顺天道敬人时所以重民事也今观我元受命颁朔之初而敬天勤民若此其至兹国之所以兴欤尝闻先辈言国初历庚午岁闰十一月而宋历误置闰十月今验之果然夫闰月以定时成岁者也置闰差则时不定岁不成矣宜宋之将亡也是故历象之制有国者不可不慎

跋章存诚所藏杨妃齿痛图後

孔子曰吾未见好德如好色者也关雎之乐淑女鸡鸣之思贤妃後世无画之者若唐贵妃杨氏病齿而玄宗视之当时未知果有此否即有之亦常情尔非若扞乳之浴洗儿之赐为大可怪而画者争传之以启天下後世之议何其薄哉然使玄宗之勤政恒如初年时励精求治不耽于乐不溺于爱此亦何自而至焉呜呼宫闈之内可戒者多矣古之人君左史记动右史记言夫有以哉

题宋尚义所藏宋马麟画皇都春色图後

宋高宗皇帝以飞白书唐吏部侍郎韩愈早春诗一首其臣马麟以其意作皇都春色图一卷进之今流传人间为新喻宋氏所葆藏余惟此图合韩吏部诗宋君臣书画为三絕宋氏葆之宜也独因是有感焉唐之都至汴宋已墟宋南渡汴之都亦墟矣当时君臣能无黍离之叹耶今距宋南渡又二百余岁宋故都之墟益可感矣而书画独传其流风犹可想见然国之所恃以久远者有大於此岂徒书画足传哉

书程子廉诸人诗後

右五言古诗共四十六首魏郡程子廉及豫章王敏文张伯贞之所作也清江傳若金曰自国风不作而古诗之道熄矣五言诗莫尚乎汉魏学之者鲜至焉而世之能好是者亦往往罕见何其难耶观三子之作不求苟合于世好盖汲汲乎汉魏之诗而力焉者也若伯贞又时时能出入晋陶阮诸人间三子所至岂易得哉然吾闻昔者齐人好竽客有操瑟立于门者三年不得入以所求非其所好也吾惧夫三子之於世其操瑟而求齐者欤虽然非瑟之罪也

跋赵学士所临兰亭叙

吾闻善书若画画之妙者岂徒以形哉故临书非形似为难得风神为难尔晋王右军之兰亭序世之临者不少即唐诸人以书名家者勿论其他得称善于天下几何人耶赵吴兴学书一世其胷中皆右军全书故其所临譬之轮扁斲轮得之心应之手故能极风神之妙岂若区区以形似求者哉虽然此非一日之力也夫书一艺尔苟日力不至不足以深谙矧君子之学有大於是者乎

跋王武所叙谭济川战功後

余读史爱司马迁叙李陵战独奇因抚卷叹曰何迁之能言也亦迁能知陵耳非迁文後世谁复传陵事哉然世之事若此类者当不少无迁其人亦湮没而已矣谭君事及其所遇非陵比而余知君如迁顷余在京师每为京师之人言辄抚臂不平独恨不能如迁叙陵事以传後世耳余南归终不忍其遂泯因以授余友王武传之君归与余会长沙以武所为传示余武虽非迁亦能言者也而朝廷文章之士复缘武而得君君之事果因武而遂传哉余无复恨矣

跋李以声所藏范先生墨蹟

范先生人品重一时而文章之高古神妙名公作者莫不服之称其必传後且不朽其书亦精劲有韵神气清朗无毫髮倦惰苟且之思类其为人此诗和答乡人李君以声所遗长句即是虽不足以尽见先生所得之蘊而其委曲温厚要非世俗之作之比且先生平居行甚峻洁不妄与人交而於乡党姻友则未有不曲尽其情者观於是可见矣亦以声之为人有以致之哉当先生在时乡人之不知者犹有视若东家某者焉及先生歿文章益可贵重於是夫人知其不易得矣若余家居去先生之舍不甘里恒晨往夕还有得於先生盖多而今不可复见独於辞翰恒若先生之存焉则以身之宝是帖有可起敬者已

跋廖敬亮所藏乃祖字说

右新喻廖敬亮所藏故宋太常丞太山萧先生所为乃祖幼声字说及诸贤题跋一卷呜呼逃虚空者闻足音而喜矣故人之不忘其先者虽琴瑟书策无所不敬焉况名若字本乎先哲之言可以训者乎观太常当幼声始冠切切焉责之以成人期之以相业使大其鸣然幼声值宋之季积学而未试于用卒隐声以没是有非人力所能也吾闻蓄之盛者其发闳鸣之大者其振远发而未闳振而未远其必有余声者矣夫能益盛其蓄大其鸣以振发其先世者将不在後之人乎今去咸淳且七十余岁敬亮能葆藏其先祖之手泽以传于後幼声之令闻固未已也记称君子复古复始不忘其所由生敬亮能不忘其所由生矣乎诗曰无念尔祖聿修厥德敬亮尚修其德而勿替乎将见声之远者益闳于後矣题新淦监郡忽都哈刺公所藏大小学二图後

新淦监郡忽都哈刺公至州之始首进多士访民俗利病而论政所宜先遂出旧所藏大小学二图使共订之将揭诸座右以为学则示人知所向方呜呼可谓识为政之本者矣昔者子游闻诸夫子曰君子学道则爱人小人学道则易使也故欲化民而不由学徒区区簿书期会之急是岂知当务者哉於二图之作可以观政矣

傅与砺文集卷七

傅与砺文集卷八

钦定四库全书

傅与砺文集卷八 元 傅若金 撰赞 颂 铭 戒

孔子履赞

大道如砥以步以趋行与礼会藏与义俱出入鲁卫周旋陈蔡发迹三王超踪万代孰不丝絢惟德之则孰不纯缘惟行斯飭匪履之贵圣仪将将企言瞻之如见於堂

渊默赞为临湘蔡栖云作

惟心之澄如水斯静惟神不测如响斯应宵兮若寂其深罔极砻然而彰其声孔扬反思无忒守正在默方寸之功溥博之泽

故肇庆文学袁君遗像赞

天沦星地毓奇和内蕴着威仪江之区化于德端之士瞻尔式岁六十将未艾胡厌生奄遗世神不死俨明明百孙子思勿忘

庆云颂

至和絪縕纷离合兮休祲所凝般其杂沓兮五色布濩烂成文兮非烟非云鬱轮囷兮焕其耀日不可名兮元象窅窅孰营其精兮王泽广被洽斯世兮灵用昭假集此嘉瑞兮天佑匪常自致多福兮明明在上母替休德兮

布衾铭【并序】

卫君靖卿得巴陵褐布一褐制为重衾縕以橐驼之毳夕寝而覆之愜然自适不啻若锦绣之美也属傅若金铭于其寝遂为铭

厥衾维何匪纁伊毳匪纁伊布胡美丽弗御乐是俭素虽则俭素眠若绮紈匪公孙干誉惟分之安矧在四体既充既燠既宁既止繄锦衾之烂孰与易此夙兴夜寐反余求心莫显密室庶无惭斯衾

寻所乐斋铭

两仪絪縕理内充其细罔析大莫穷斂不盈寸散弥空物物自化安以丰惟圣仲尼心体融动

与化合静天通天气周流无时终疏食水饮乐在中子渊深潜睿若蒙三月其仁几圣功簞瓢不忧天者同孰将求之匪外攻圣贤所乐备我躬

诚庵铭为边君实作

惟天至诚万化斯出惟人时宪所践伊实人之不实匪生之异物乎交昏情以滋伪去伪有道反身而思莫显惟闇心焉勿欺相在兹宇敬慎朝夕曰予致诚庶用不息

敬所铭为彭存礼作

心官在舍入复出智人持之久乃一中严外着庄以栗独居如衆夜若日神明後先不可必慢生菑危慎安吉猗维彭君善居室以敬为所思罔逸动应羣务静处密谨而存之永勿失

清江慈济寺钟铭【并序】

去清江城南二十里丁家渡当江广水陆之道岁春夏水潦暴溢舟人因阻险要重利行者病焉里人刘允成思弥前患乃致浮屠之能任斯役者得新喻广惠桥寺僧永华持疏走上下即好事有力者劝共出钱造舟为桥以通往来其旁屋浮屠令守之庶勿废事未集会郡幕长月忽难君适至兴利去弊政先仁民华走君匈主其事令出郡人士翕然从风以劝且无敢沮挠者华得钱若干万缗桥为方舟四十有五为浮屠屋若干凡木石工作之费桥万五千缗有奇屋五千缗有奇既成桥君割奉入钱二百五十缗畀浮屠令范金三百斤为钟勒岁月其上志始末焉集贤揭公傒斯乐与人为善者为题其桥曰月桥寺曰慈济桥以君名寺以善称昭勿忘也始工至元五年己卯九月毕工明年十月又明年至正改元辛巳四月君移官工部当去郡华与刘氏子本来请铭钟且着君之不可忘者呜呼昔郑子产以有君子养民之惠而见称孔子及以其乘舆济人溱洧则犹不免孟軻氏不知为政之讥而其存心则善矣甚矣古之君子之难哉近世之为政者非徒惠不及民且多渔取以自利民病甚至莫之恤於是去子产远矣其能知政之本急所先务而又割其奉入以建永久之绩如月君者夫固无愧古之君子而足感发今之人哉声之闻达且不朽将有类是钟者已铭曰

江之芮不可以揭不可以揭有坦斯济民之聰不可以虹不可以虹有铿斯钟鼓钟铿铿震彼冥行孰其范之於閼厥声厥声閼止佐于天子天子万壽德音不已

自懲

嗟嗟为人维忠与信尔职于是式谷尔身宜言而失勿言而出惟尔德之疾宜断悠悠宜勤休休惟尔德之尤尔惟弗觉尔则齷齪尔觉云然心胡不作尔尚少时实克勉之亦既壮矣反是不思见善尔取恶用弗履庶几夙夜以安尔止

傅与砺文集卷八

傅与砺文集卷九

钦定四库全书

傅与砺文集卷九 元 傅若金 撰行状

故中奉大夫湖广等处行中书省参知政事赠推忠宣力功臣通奉大夫江浙等处行中书省参知政事护军追封上党郡公谥忠定樊公行状

曾祖行

祖德

父仙

公讳楫字伯川冠氏县人父仙有长者之德当金季隐居种瓜过客食者时不取直里中儿数盗瓜一无所问即觉反多取瓜遗之戒勿恐曰吾惧儿走伤足耳公幼有智勇好骑射年十七从千夫长刘伯顔射柳营中矢发辄中刘大奇之郡将段某亦奇公以女妻焉至元初始从军攻宋襄樊河南统军郑某器公辟掌籤记後立行中书省以公为令史主边事至元十一年平章阿里海牙分省至岳宋臣高世杰屯荆口与我军相拒公督军水陆俱进袭破之遂乘胜取江陵录功授其省都事未几从攻潭城死守不下公亲犯矢石督将士昼夜攻之其守李芾自杀城遂下他郡悉降明年春入觐赐衣服鞍辔授承务郎行中书省左右司员外郎是年从定广西十四年授虎符进少中大夫全州路总管兼府尹行中书省左右司郎中明年与平海南又明年入觐拜中奉大夫参议行中书省事二十年改同知湖南宣慰司事明年诏镇南王脱欢平章阿里海牙用兵占城以公佥荆湖占城等处行中书省事十二月师次安南先是安南国王陈先昞既受封于朝至其子曰烜不请命而立召入觐又以疾辞至是师次其境谕使开道给食以观其所为而日烜又不听遂移兵讨之明年春退师复同知湖南宣慰司事秋进师仍佥荆湖占城等处行省事自是岁征安南廿三年迁湖广等处行中书省参知政事明年改赐明珠虎符授湖广等处行中书省参知政事冬十月镇南王会诸道军十万於来宾遂分道而入约俱至泸江济师公与参政乌马儿以舟师出钦州十一月戊戌次绿水口遇贼船五百艘公分兵击走之明日复战又败之俘百余人获船数十艘斩首千级溺死者甚衆十二月己卯公分道进北江安南军塞江口伏兵华林公命部将击溃之及泸江与镇南王军会王留公守万刼自以军济江直走其国廿五年正月王军还无何复命公将舟师百艘从入至海岛遇贼船二千公帅将士转战十余日粮匱王命退师衆以海道险絶请弃舟俱陆行以还王不果听於是舟师自排滩分道出内傍关贼伏兵断关口公与万户塔剌赤刘世英击溃之斩其二将右丞程鹏飞别以兵并江送舟师至东潮阻水乃夜自他道驰及镇南王军贼追至公力战却之至竹洞贼复大至公又与万户刘珪击走之三月壬辰至白藤江闻日烜以精兵数千出我後公亟会将士逆战天忽大风潮水遽落舟不得进退贼乘风以小舟数百合步卒翼两岸击我军四面矢下如雨公被大创十余犹奋臂督将士力战而贼益滋军公遂执念不死必灭安

南明年使者至求公等会公已被毒贼见使者言状即北面拜稽首语使者且必归吾屍遂趣装倚焉而死使者以其丧还时年四十有九事闻上惊悼久之三十一年八月日始克葬汴之开封南原後八年夫人段氏卒乃以祔焉又二十九年为至顺元年公赠推忠宣力功臣通奉大夫江浙等处行中书省参知政事护军追封上党郡公谥忠定夫人追封上党郡夫人公魁伟皙白音声如钟读书通大义作字得顔鲁公法其在军与士卒同甘苦上所赐予悉散之麾下故将士乐为之用夫人段氏亦有淑德尝出公战服示诸子曰而父身勤王事以歿儿子辈生长富贵宁亦知而父苦耶至感泣终身不忘子五人炳煥?灿炫炳以父歿王事恩授怀远大将军永州路总管後官至嘉议大夫广东廉访使?刘阳州税课使与煥灿俱蚤世炫今甄用监令史女三人长适西台御史赵元善次适京几漕运司同知翹某次适淮西廉访副使陈思谦孙五人琪璘珪璋琥炫谓其友傅若金曰先公忠烈宜在信史然不幸炫诸兄即世今又不及炫求文以刻诸墓道惧日月久远遂湮没不闻於後嗣不肖将何以自文哉子为我叙其事庶作者有所采焉呜呼我世祖皇帝以神武造区宇一时智能毕出为用公特起行间乃以刀笔坐筹军旅卒平江南立功万里岂不伟哉而不幸身殒蛮越裹屍以还可悲也夫余往从使安南过故战处民至今祠之遗老犹能谈其事云谨状

故百丈尹张先生行状

曾祖某

祖柔宋乡贡进士

父仲宝宋乡贡进士

先生讳希文字质夫瑞之新昌太平乡人幼穎敏好学长益博洽为文章满家性急义又多材善谋早有志当世喜言治化之术凡乡里姻族有争必折以理其力役征税贫不能自输者出私钱代之大德中蜀人蒲侯来为郡得先生进客之问政所宜先先生为疏民间所利病与吏弊数十事侯大悦因属笔具条教下之属邑数月大治方伯连率部使者至取其所条令他郡仿行之李应中为江西行省检校官屈先生为吏行省遣应中録吉贛诸郡囚庐陵氓有为豪民诬致死狱者先生阅其牒得冤状即白应中平反之活数人吉守将恣横为民患数持郡长吏短长长吏不堪或不从将言将怒闻长吏子方从数骑饮城外且归日未夕遽遣卒挝鼓断行者执长吏子及其从者掠掠城门内迟明官吏尽造诸将第致饩牵服谢乃得解部使者闻其事一无所诘先生念莫敢孰何者白应中曰是大猾不治他事何足问应中即令具其事委悉当以法上之省卒从所论自是郡人安堵无何先生去吏延佑初入游京师以荐授百丈尹不赴所居积书園四壁若巢然人因号书巢先生京师名公卿大夫士日造巢中与语或竟日乃去前太常李彦方以清介自许而与巢同里巷有弟客死京师其子来归父丧贫未有所取具先生闻之即以所宝玉养和从富人质钱二百五十缗赠之既发丧先生送之城外见其病且跣行乃还马走城中更取衣衾质得百缗与之使僦驴以往语在虞先生书巢诗序中然不止是其亲戚言先生家居时见城中仁济桥坏民岁有溺者以告郡守愿身任其役卒能成桥又尝出私钱万缗作石梁横江里其傍往来道皆砥之去梁一里所张氏有故祠祀玄武神及

汉天师者久废先生复之号之曰留张道院云先生故有痰疾不事药餌尝对客谈辄连咳欲絕咳已复谈自若即客有辞去必固留之日为常不懈一日从容语客曰陰阳家言明年我当死果死吾不为夭先时其子汝惟尝再至京师迎先生归不果约二年复来且必归矣後至元三年十月汝惟乃来十二月二十一日先生竟卒京师年七十有四配胡氏先先生卒有男一人即汝惟女一人适李继黄氏有子曰大都驴孙男一人平生所着有丁祭考一卷十三卦考一卷诗杂文若干卷梓行于世汝惟既卜以某年月日归葬先生於乡来请状其行将乞铭当代执史笔者以示来世用书其事以授之谨状

傅与砺文集卷九

傅与砺文集卷十

钦定四库全书

傅与砺文集卷十 元 傅若金 撰行状

故朝列大夫金燕南河北道肃政廉访司事赠中议大夫上骑都尉礼部侍郎追封天水郡伯赵公行状

曾祖温

祖德

父仁金钩州同知

公讳思恭字仲敬姓赵氏彰德安南人赵氏之先出有虞伯益之後周穆王时造父为王侍御有功赐封赵城子孙後以国为氏散处天下代不乏功业安阳之族在金时多显官属贞佑播迁逸其谱牒有居磁之滏阳者金礼部尚书讳秉文以文章显名当时盖公之从父云公之曾大父大父隐迹弗耀父仁字壽之孝友勤俭兼儒律之学仕金为钩州同知金亡不仕太宗皇帝特命与名士田师顔为三教试官乘传四方试儒中选者复其家试僧道经通者给牒受戒去取精当朝议韪之着为宪令国初天下所存经文儒户是已公才识通敏读经史明理乱之要治刑名书不为深文年十九彰德守高公鸣辟任府史郡称廉平寻且贡部会河北河南道巡行劝农使侯公爵辟劝农书吏未几入为刑部令史选大司农掾转宣徽院至元十六年授承事郎宣徽院照磨兼管勾承发架阁明年迁主事阶承直郎廿年院陞二品改经历阶承德郎宣徽掌共天子储后以及侯王卿士食饮膳羞飧锡百用之需素号丛剧任难其人公在幕府十年出内必当奸弊无所乘入台臣荐公能廿二年擢授奉训大夫燕南河北道提刑按察司判官治办最诸道廿八年入拜监察御史山北饥公上疏请亟赈贷廷议竟以其便宜属公请行既至即发廩以劝富民之积粟者收其离散拯其捐瘠又黜冗费罢征徭蠲税之不能输者民有质鬻其男女或自没入为奴婢则购出之生数万人时相桑哥擅政恣暴恒沮抑台宪所论劾少迂意辄构害之在廷之臣不敢吐一辞公独守其职不变相益忌之因奏六曹户工事繁夥岁閱其牒御史府宜防吏废程请诏御史分其属即两部治之志欲病御史且伺其过公与赵世延治工部世延私谓曰工部掌营造更为奸费用滋不法吾侪置弗问即不职太察必中时忌召禍亦少纵之可免耶公曰不然与不职而幸免吾宁尽职而被无辜之譴苟文牒有可求衅而悔之则无及矣於是纖悉必究心不为苟简率一牒反复数四公素敏给事无留难至是独若冗滯琐屑之为者至累月而後理人多讶之及异时政府选深文吏搜索脱略毫髮无所得衆始叹服京师岁以二月八日大张百戏列伎乐迎佛城西高良河费以钜亿计织染提举储普华倚相权并缘为奇衺公立按之用事者挟声势求解不听走白相召公至省诘曰国家事佛求福利若弗欲敢坏挠耶怒不可测公从容对以侵扰之实且曰求福所以安上利民耳今奸人乘大役重衺斂以病天子民使愁怨塞道且乖其和坏福利孰大於是相熟

视公辞不少屈卒从其理十二月改大司农经历进奉政大夫尝与大农董公诚之少卿尚公周卿条务农重本关民休戚数十事入奏上前公敷对详敏上嘉叹久之可其奏二十八年诏改提刑按察司为肃政廉访司加朝列大夫以公金燕南河北道肃政廉访司事所至务大体先德後刑恒以仙居令古灵陈先生训民之语条为令以谕所部使人知孝悌忠信崇本抑末寡过远罚之方岁循行诸郡首率博士弟子员诸孔子庙庭升堂诵说务明教化郡县有豪民不法者必痛绳之不少恕其决滞讼轻疑刑生死狱之冤者盖不可枚计故吏畏其威而民乐迁善焉岁终第其劳诸道莫能及元贞二年行郡至大名十一月以疾卒官舍春秋五十有八十二月八日葬安阳聂村原之先茔公资嗜义理之学不乐为词章先贤格言若宋二程先生朱夫子所著述手自纂録以类成卷遇行事取则焉其他若唐陆宣公奏议宋真文忠公大学衍义国朝许文贞公文集皆爱其有益於治化日把玩之不置雅尚志节厉廉隅然不立畦町乐於从善士有行能转举扬之其所荐引若保定郭贯张仲宝濠阳安佑洛水刘赓後皆为闻人显于朝矣而公未尝以为言居官不殖货产屋庐仅取蔽风雨旁无侍妾自奉泊如也世祖皇帝时台省臣皆赐第京城中及所部郡县多闲田得取为业君壹弗受既卒家无余貲夫人焦氏金进士泽州焦茂才女茂才与元好问同年相友善夫人贞靖淑慈能自鉴书史自幼不事容饰事公躬丝枲菲饮食安於恒素以相成其志年八十有二後公廿五年而卒合葬公墓子男三人侃通国语选翰林国史院译史年十九先公卒天纲举茂异由宿州儒学正辟燕南宪府史转御史大夫掾未至文皇帝亲署濠东廉访司经历拜南台监察御史迁内台出金淮山东两道肃政廉访司事陞岭南广西道廉访副使移湖南彰善纠慝声籍甚犹前人方大用矣天经以兄天纲让父?授获嘉簿调冀宁録事亦刚介不苟年十八卒于官女二人孟羸适州屯留簿同郡王兰季羸适朝列大夫金江南浙西道肃政廉访司事荏平傅汝砺孙男五人天纲生植构槐栋植槐早卒构今江西行省检校官栋尚幼天经生楷曾孙男四人构生炳楷生輝烺燿天纲为广西廉访副使赠公中议大夫上骑都尉礼部侍郎追封天水郡伯夫人追封天水郡君凡欲知先世之善者亦于其後之人观之耳赵氏之德其盛矣哉若金既生晚不逮事礼部而识礼部子若孙三世副宪端慤清慎敦孝友崇礼让遇士接物恂恂然寬厚长者及馭吏毅不可犯然用法平允不以深刻为名高检校务学有才藻行称其文亦时之望也检校之子炳在京师时尝从若金游敦重简默虽髫龄器如成人於是益信赵氏先德之有由矣凡礼部之行事见於一时文士之记载咏歌者当不少若金所闻殆十不一二请徵诸家传萃次而状之以俟当世之执笔者采録焉谨状

故奉训大夫临江路总管府判官袁公行状曾祖克昭

祖原溥

父本固赠清江县尹

公讳万里姓袁氏其先出妣姓陈胡公之裔本爰氏秦末有曰告者居河洛间其少子政始氏袁繇政至汉司徒安二十余世繇安至宋雍州都督顓又十四世顓後又九世为唐宰相滋谪刺吉州子孙家焉其後曰立德者徙居新淦之淝水立德三传至皓生二子俱蚤世夫人刘氏通书史教其九孙皆有成年九十八而卒九孙邦为字号九邦自九邦一传为二十四仲而淝

水之袁氏遂大诸仲之显或以德义或以功名公之曾大父克昭仲明其一也克昭生源溥源溥生本固固力学有用世之志既蚤孤遭宋衰乱遂杜门养母不复出後以其子贵追赠清江县尹公字庆远曰果山以其号行从少颢迈博观羣书为文辞疏畅茂丽若振葩布叶粲粲悦人又善笔札至大辛亥庐陵文庄侯入京师载与俱侯宋忠臣文丞相贤冢嗣国朝所尊礼而公为之客由是重京师侯南祠海岳不返乃更客董忠宣公馆中董氏勲臣世清白多贤者所荐用率文武才能士其尝在馆中若清河元公明善临川吴先生澄蜀虞公集父子清江范先生棹其道德文艺与所施用皆暴白当世者故公在董氏益重大夫士交荐之既直举国子助教吏部且上其名中书属左卫阙校官遂用荐者言授公卫教授始卫学绵蕞以祀先圣师弟子无所廩公至首葺庙庭访得故所赐学田千二百亩之侵于屯者复之以共祭养而军中执经受业者多至百数十人皆能谈仁义知尊君亲上之道矣无何丁父艰去官弟子号泣送者塞营道服除任饶之乐平州教授去积蠹归侵疆艺树浚池庙学以新游士有业乐平故多豪猾守佐获终三年代去十不一二而公在乡校摄州事半之无敢肆欺者民怀爱惠士歌其德秩垂满湖广省辟为掾廉介忠厚遇事无留难时平章高昌王雅敬士见公尤加礼遇自王以下皆字而不名比七月辞去诸相固止之不肯留上其年劳授将仕郎南安路总管府知事南安江右之穷远郡吏不知检事多害政公至理凡郡之滞讼及属邑之不法者数十事不弥月悉就绳度狱为之空上犹虐其民且乱吏皆遁逃公往摄之即出令复其流逋稍谕以祸福许之自新民大喜相谓曰是公更生我也乃均赋役兴学劝耕以富以教民既乐业始葺县署大修学宫及殿庙之在祀典者凿渠疏池泥涂者甃之病涉者梁之大旱公祷雨上犹立应还祷于郡亦如之是岁连郡大饥南安民独赖以给天历初作兵器南安郡最下而数反倍他州令且急公曰民不堪役宜请于行中书三分损其二僚吏欲因为奸利皆曰请不便公力争之状数上行中书竟是其请及御史至僚吏多坐奸利被罚公独无所与且得声称上犹民弑其兄前有司纵弗问公曰是伤人伦之大者立按其事且成狱上之南康氓有诉里中催租吏诛求杀其父者县受赇反收氓付暴卒苦之且疾甚公访得其奸状即日勅县按所主史罚之正其狱大庾饥禁土豪之畜负驴以夺民利者贫人得食其佣不死且至今市之贾者恒杂沙谷水米以欺细民自公为政皆相戒勿欺三年部使者取其治元统初进承务郎潮州路总管府经历始至谒于金山之神曰潮之民困矣瘁矣怨且尤矣吾何以安之耶神其相予亦竭吾力而已矣所不以至公者神实在上潮人闻之喜曰此仁人之言也吾民其有瘳乎未几省词诉薄赋敛均力役之征潮果大治暇日数临学集博士弟子员陈说经义申以孝弟之教潮故昌黎韩公过化之邦而文集未列之学官乃割俸倡郡中有力者板传之以惠潮士潮守将以营中不利士卒纵部曲杂居民庐而因夺有之公在郡立下令徙还其营以复民业潮无松杉公使人自闽中致二木千余栽植之治後之金山将与韩木俱不朽焉先是仕于潮者贪吏多虐取当使者行部惧事觉恒进厚贿求免去则又取偿於民以为凡而以祸败者亦先後相望独公在幕府时郡无留狱部使者至深异之尽屏私谒毫髮无所受郡有石刻具载其事云既年老不乐居海隅秩未滿遽解印去府僚及郡之士民强留之不可得争持钱追数十里大设祖帐饯之虽去民犹思之不忘遇东西行者时时候起居冀其或来也既出岭遂告老於朝居久之加奉训大夫以临江路总管府判官致仕命下而公卒一年矣公兄弟五人曰惟宜希逢者最少母孔氏且歿以希逢属伯兄九万而惟宜属公子之既室且皆有子孙矣乃复为昆弟如初公既退休悉以其先庐居惟宜而分田以给之别自筑室于峡之柚木岭益辟地为园池环室前後植修竹嘉树艺花卉果蓏麻蔬日课童仆治生产宾客往还时相与赋诗酌酒极笑谈登

临之乐坐则引其孙授以诗书卒时年六十有九後至元己卯十一月廿六日也夫人孔氏生子惟德雅善干蛊有所植立不废其家学女适胡适宋孙男二铁头麟儿女二将以至正改元辛巳九月十有一日乙酉葬里之都督岭枫林之原距峡七里许呜呼公始以一布衣士趋京师取知卿相身致显荣以及其亲用虽未大而所至能修其政使豪猾不得肆而善良者感化既去人犹歌颂其德是可有称於後世者已若金与公同郡在京师既辱与游处家居时又亟相见故尝得其行事列叙始末如右庶执笔纪述者有取於斯焉谨状

傅与砺文集卷十

傅与砺文集卷十一

钦定四库全书

傅与砺文集卷十一 元 傅若金 撰志传文

龚隐君墓志铭

清江龚隐君卒之明年将以某月日葬郡西萧洲桥之原其子益哭以请曰古之葬必有铭今益昆弟不幸遭先君之丧葬既得月日矣而不得铭先君之德其可遂泯乎子郡人且善益其哀益昆弟而不使先君之德之遂泯必赐之铭既再辞不获请则取君友人徐必芳所为状而叙之君讳茂宗字国英其先汴人九世祖大从宋高宗南渡占籍清江历五世生某府参军文聪文聪生琳琳生荣祖荣祖生君君生而岐嶷长而好学性谨直和厚然甚介与人居毅若不可狎人莫涯涘平居孝友睦姻勤俭率下朋友之交不以後先盛衰损益其敬亲戚族人昏葬之不给与不能自养者随力资之君大父新喻县都曹父临江镇税务副使皆务积德始君幼时琳抚其顶曰吾贫遗子孙者独特吾方寸耳吾平生恒教人以善吾先世及吾身未尝为不善继其善以大者其在若乎君能有知即笃意书律用世之学欲自振奋为功名显亲及父歿母张氏不乐君出繇是不仕养之终身凡衣服饮食有所施与一听母所命母歿治葬祭毕出古礼斥俗中巫祝事不得杂闻者嘉焉既去丧犹时时哀慕其亲不置岁遇始生日子若孙进酒肴前为寿君戚曰是非吾亲劬劳之日耶遽辍飧擦涕於邑不已晚治一室集古图书列花石左右坐客其中焚香煮茗谈终日间具酒视所有丰约不为勉强然极欢客因号君真率翁君喜亦自号真率好读史观古今事成败其书恒不释手生前至元庚辰四月四日乙亥卒後至元庚辰五月十有一日癸亥卒时男女侍左右请所言君曰死矣予何言又问不应娶同邑黄氏蚤卒再娶周氏有淑德子男四人谦复益泰女四人秀真壻王珪佑真壻周邠淑贞壻熊鑫惠贞壻朱偶孙男六顺元德元庆元佑元一元鼎元呜呼君承先世之善其才非不足以致显于世而卒奉母教终养不出生既能使其亲无违于心歿又能使其子弗忘其志是固可铭也已辞曰陰德之报施固有久近哉昔人决狱二十年而大其门以待子孙之兴其责报何其近耶吾观龚氏自参军而下虽代不乏禄仕而未甚显其世德之积至隐君之身又不食其报以卒天之所以兴其後者亦将久其泽欤

廖母萧夫人墓志铭

夫人姓萧氏新淦玉峡人先世自子云隐居郁木洞子孙散处山下近地其在峡者至宋益蕃盛遂姓其地为萧家峡云曾大父懋德宋进士仕至衡州守有文名大父某父某遭宋季衰乱不仕夫人性贞静寡言不事华饰年十七适里中廖隐君师爽勤俭柔惠顺事其尊以相于夫子凡理财用共丝枲麻絺治食饮虽寒暑靡懈而家益富饶宗祀弗违族姻以和隐君得专力外事闲暇辄从贤士宾客咏歌酌酒放怀山水间无内顾之忧延佑六年隐君卒而隐君之母犹在夫人敬养之如隐君存时且日夜诲飭诸子就学使勿坠先业又十五年而夫人亦卒子男四人云龙虎圣云读书孝友蚤有所树立自其父歿云独以冢嗣抚长其弟妹至于有室家

不使忧其母龙後其从父某蚤世女三人适陈继志梁有胡珣皆同郡士族孙男四鼎善力学尊贤取友将有闻于时泰心奴槐尚幼孙女五曾孙男二将以年月日葬崇信里宝堆之原从予游者鼎述其父命请铭夫人之墓状称夫人卒时白云而下衰麻以哭者几数百指呜呼盛矣哉非夫人之贤其哀荣有若是耶铭曰维妇德弗爽维母教弗忘于後之人有庆

艾母张氏墓志铭

张氏世为新淦人桂琦俱隐德弗耀琦女婉懿贞淑嫁为同里艾氏之介妇其在父母所善事其亲友爱于兄弟来归夫家協于姑嫜宜厥娣姒中外肃睦人无间言者夫佑谦抑重厚处乡党有礼遇宾客友朋虽卒遽中不失其敬尤善治生然深嗜浮屠言乐施与夫人克合其志州之建兴寺有支院曰普贤者其栋宇坏不支佑夫妇辄捐貲撤而新焉又割膏腴田若干亩以施之凡州闾之有急者视力之所及周之无所吝自相其夫积累起家数十年财用益饶旧庐之在州北者厌其湫隘则既改筑东巷以居而子孙日蕃盛夫已歿又益辟地增筑二室分授诸子貲产使自主之而身受其养日教以忠信孝友令毋忘俭勤每向夕必有酒馔子若孙诸妇咸列侍其前无敢少踰礼者闻者称其家法云生宋咸淳戊辰十月六日卒时後至元庚辰九月十日也距其夫歿二十有三年四子志奇志中志清志静敦厚慤愿皆能有以自立光于前人静年十九未娶而卒三女适同郡张观张俊杰傅麟皆蚤世孙男十克恭克诚以茂克明以时宝泰显和定皆英敏知向学葬有日奇昆弟因其客袁某以状请铭稽诸所闻既信而又察其子孙之盛且贤若是是其尤可徵者呜呼非积德之报耶铭曰

福必有徵兮善必有兴兮丘麓之凝兮伊贞魄所宁兮後嗣其绳绳兮

金罍传

金罍者大冶人也其先少昊金天氏之後已姓少昊以金德王天下色尚白生有功德于民既死其神为西方帝主肃杀子孙因先世有金德之瑞遂姓金氏周之时有曰闕者从太公佐武王伐纣有天下显其名穆王时有自西国来朝者号昆吾氏世称昆吾氏夏之时尝为侯伯汤之其後世或犹冒昆吾氏云或曰非也西国昆吾氏金姓汤所?者已姓之国盖已与金本同出然不可考矣罍之祖曰鍛始自昆吾氏自三代迄战国暨秦其族日蕃盛世多闻者罍之祖鍛自昆吾徙居大冶大冶之人与之俱化鍛後生从革从革生伯鋸父是为罍罍生时望气者见西南有白光如虹曰此非金星之精耶夫金义气得之者昌失之者亡然必以类合其当卯金刀之世乎罍生而刚决不凡然少锐好持短入长之术遇与鬪者辄伤莫之敢婴里中有越人石生者见而器焉数相就摩厉之罍谓石生益友不可失也遂相与为刎颈交前时天下战争金氏之族若干将莫邪辟间者用於吴豪曹湛卢用於越湛卢者负奇气折冲伐敌当时无能过者越王後以进于吴遇公子光弑吴王僚湛卢乃去之楚楚泰阿亦金氏之族与湛卢齐名晋郑闻而求之不得兴师围楚三年不解王引泰阿登城而麾之士卒迷惑流血千里罍私念先世多杀越人不祥即深藏于家非其人不为所用汉高祖起丰素闻罍生时望气者所云心窃喜自负意兴刘氏必罍也购求之千金初项羽亦求之既而鄙曰此一人敌耳罍知高祖有异且器使人善取其长遂归之夜偕行径丰西泽中遇白帝子化异物当道行者惧不敢进罍

直前斩之由是益见爱重未尝去左右高祖之见项羽鸿门罾从在军中赖卒脱其难从还霸上高祖抚其背谓曰微公吾几不免寻拜为护军中尉常以三尺法自持军中望见胆栗无敢怀异心者有反覆不用令高祖命立诛之天下已平论羣臣有功当封者第之诸将至日夜争功不法罾独不言出入卫上益谨自萧相国何张留侯良齐王信樊哙陈平诸在军中莫不服之者大臣既多受封上即诏曰王者功定而行赏有劳者爵之护军中尉罾自吾起沛丰以至有天下出入兵革诛平暴乱多其功力今四方休兵朕与功臣剖符受封愿世世共安利之其封罾为昆吾侯罾顿首谢曰臣顽钝不能修先世之业陛下幸拔臣左右令得从陛下诛无道秦臣之望过矣今更封臣列侯非德之宜臣所善越人石生重厚长者隐居山中砥世磨钝自臣有尺寸之用多石生之力陛下不弃臣愿进石生而封之幸卒使厉臣顽钝非臣独蒙其利陛下万世□石之安也上善其意遣使以安车召石生至即封为越乡侯未几韩王信赵利陈豨彭越之徒反罾常以护军中尉从上击之居无何慕黄帝飞仙之术遂愿弃人间事学导引轻身他日谓石生曰吾与生当暂别去愿生自爱後五百年其求我豫章丰城石室中是夕风雨晦冥见一龙奋空而去且失罾所之太史公曰金氏之先相传出帝少昊神明之後昆吾侯信其苗裔耶何其异哉高祖以布衣取天下多昆吾侯之功然当其受封退让如不自胜必推引所善可谓不背本矣世常言金石交有以也夫

湖南郡学造大成殿上梁文

集大成而为圣人经纶不朽作前殿以居王者构架维新屹上栋下宇之规仿左城右平之制潇湘改色洙泗增波恭惟大成至圣文宣王道继三王教垂万世我闻在昔修诗书礼乐之文民到于今识父子君臣之懿惟其不见而章不动而变是以所过者化所存者神与天地以同流沛江河其谁御道之行道之废如用我其为东周圣之清圣之和自生民未有夫子在当时固隆於观感迨後世益致其尊崇矧庠序学校之兴及闾巷宫都之广维王国克生多士允赖神休故天子以至庶人咸亲祀事睠此邦当鹑尾之次原其先始熊绎之封自北而南化者有如於时雨瞻前忽後皞乎莫尚於秋阳因庙藏衣冠琴书升堂闻金石丝竹周邦虽旧鲁殿独存顿栋挠於震凌寻土焦於煨烬爰究爰度宜新改作之图来游来歌毕相经营之力故能百工具作庶绩用成阖户谓坤辟户谓乾取则合变通之妙大木为桷细木为桷抡材适位置之宜于以称日星山龙藻火黼黻之文于以容钟鼓管磬簠簋豆笾之器墙高数仞焕乎鸟革以翬飞律正五音展也金声而玉振爰效闕宫之颂用歌泮水之章

梁之东湘水攸同如道斯行其流靡穷

梁之南维岳岩岩下民仰止高明是监

梁之西有?者奎为天之章式旋于题

梁之北星环于极如彼衆人怀于有德

梁之上惟天荡荡惟圣伊合孰知其两

梁之下有彝有斚笱豆孔修陈常时夏

伏愿上梁之後风雨攸除神人以和奕奕圣门有百官之富宗庙之美洋洋吾道如四时之行
日月之明文教永昭彝伦益厚

傅与砺文集卷十一

附录

钦定四库全书

傅与砺文集附錄

欧阳文公送之广州儒学序

古之使宾有介主有摯介之数有九有七有五有三摯之名有上有承有绍人之多所以备仪文慎辞命也然诸侯聘问之道宜若是也我国家奄有六合率土悉臣新天子即阼则一遣使颁正朔于南交驰一传可也以尚书一人行以郎中一人副又听其以文学之士从焉虽柔远之事亦重矣岂非斟酌古人摯介之设欤元统改元之使事清江傅君与砺实相其行闻其辞命之际傅君之助尤多次年南交来朝贡其人往往称傅君之能於是庙堂特以粤郡文学旌之擢傅君在京师好学能文章尤长於诗缙绅间每诵其佳句语曰诵诗三百授之以政不达使於四方不能专对虽多亦奚以为诗本人情通物理其言温厚和平长於风谕故能诗者必达於政而善於言其或不能则口耳於诗者也今傅君以能诗名中国以能使名远夷不亦宜乎记又载夫子之言入其国其教可知也其为人温柔敦厚诗教也粤为郡极东南之濒意其东南温厚之气磅礴鬱积於斯故其民庶而富而教兴焉矧以能诗之士教其人乎异时观风之使采诗之官至于南粤将【一作归】以醇厚之俗和平之声陈于中朝缙绅之士其翕然曰是吾傅君之为教乎其行也叙其事以为之兆云至元戊寅四月初吉翰林侍讲学士中奉大夫知制诰同修国史兼国子祭酒冀郡欧阳玄序

揭文安公送行序

元统三年秋七月诏假羣玉内司丞铁柱吏部尚书丞相掾智熙善礼部郎中使安南以临江傅若金为辅行若金字与砺为学有本末为文章有规矩至於歌诗盖无入而不自得焉其高出魏晋下犹不失於唐又能知为国体要自秦汉而下逮于我朝凡使安南贤否姓名若出使岁月皆历数不遗故凡使事悉以谕之动静相维举措必戒先事而虑物至而应举小包大万变不穷国中赂遗毫髮无所取而皆本之至诚得尊中域抚四夷之道虽僭从趋走皆畏憚过於使往返万数千里所至大府交荐其贤及安南入贡使及国门首问傅先生安在初安南数侵占城占城遣使入告是行也有别旨切责安南而所降制书上有安南王字行至真定默省曰安南自陈日烜絶王封朝廷有诏安南上表皆止称世子今制书有安南王字是无故自王之也安南遂自称王奈何请二使还白朝廷二使议未决迺自请行即赁马驰至都堂都堂大喜立收还制书且以得傅君辅使事为甚幸而君命以不辱及使还首循旧制授以广州儒学教授呜呼向非朝廷知人不能使傅君非傅君之学不足以称朝廷任使使朝廷皆若用傅君安有败事哉然傅君之名由是而立傅君之荣由是而基他日任朝廷之事必有大於此者又当何如也故余於送傅君之行不及广州之说而本於使事云至元四年岁戊寅四月十有一日揭傒斯序

范德机诗序

范先生者临江之新喻人也少家贫力学善文章工诗尤好为歌行年三十余辞家北游卖卜燕市见者皆惊异之相语曰此非卖卜人也已而为董中丞所知召至馆下命诸子弟皆受学焉於是名动京师遂荐为左卫教授迁翰林国史院编修官与浦城杨载仲弘蜀郡虞集伯生齐名而予亦与之游焉伯生尝评之曰杨仲弘诗如百战健儿范德机诗如唐临晋帖以予为三日新妇而自比汉庭老吏也予独为范德机诗海内无双若比唐临晋帖殆未逼真故改评曰范德机诗如秋空行云晴雷卷雨纵横变化出入无朕又如空山道者辟谷学仙瘦骨嶙嶙神气自若人如豪鹰掠野独鹤叫群四顾无人一碧万里差可彷彿尔晚尤工汉隶吴兴赵文敏公曰范德机汉隶我固当让之若其楷法人亦罕及其居官廉直门不受私谒历佐海北江西闽海三宪府三弃官养母天下称之尝一拜翰林应奉文字不果行而有闽海之命至顺元年某月卒於家其诗道之传庐陵杨中得其骨同郡傅若金得其神今皆有盛名其平生交友之若终始不变者同郡熊輶也杨中将刻其诗道其子继文求序为书其本末如此呜呼若德机者可谓千载士矣杨中字伯允若金字与砺熊輶字敬輿凡诗若干卷後至元六年正月五日集贤直学士朝列大夫揭傒斯序

范德机与虞伯生书

山居乏江海之使无由上记即日伏想神相台候起居万福某株守碌碌耳近来武昌与乡友傅汝砺会其人妙年力学所为诗赋警拔可爱其为人静慎又可尚论将北行介之以见无他出门而瞻望泰山黄河以洗穷乡之卑陋此其志也与语当知仆之非妄未由参侍更冀以斯文自爱不宣

题范德机书

范先生与集同岁生又同在故平章董忠宣公馆中于今不复见矣与砺携此书至先生已宿草在墓矣怀想畴昔可胜凄断与砺文采动人以为方至之彦莫汝砺若也余方犯严荐之会以病告去国不获如志然汝砺之才奚必有待于不肖也哉汝砺欲仍藏先生书题此而归之虞集拜手于城东岱祠西舍虞集书

又附诸名公送与砺诗

十年身不到瀛洲江上逢君又素秋行李祇今何处在看花须及俊年游沧波远去浮三岛白日高悬照九州大旱若将敷说命贤良记取旧箕裘
右范德机冰玉空青不易求兰苕翡翠擅清秋才情岂是人间少不到巫山梦未休

宫树朝霞起宿鸦人人解赋上林花如何西溆还东岛

天上清秋有到槎 右虞伯生二首自古诗人天所放海堧乡土旧来谙使星曾照雕题外教雨

还沾越峤南土风槟榔是良药世味橄榄留余甘先生三鱸还小剧仙人五羊应共骖越王台
远见明月大庾岭高多夕岚朝路怜才留未得銮城载笔祇多惭

右谢端敬德

耻学山人赴辟书勇随使者驾轺车横经久合居高座上冢先须过旧庐黑夜文星南斗外青
冥鹏路北风初来期莫落梅花後待诏先生席正虚

右金华黄潛

早年文采动公卿此日承恩出凤城万里舟行休惮远故乡亲老得归荣路经梅岭香云湿潮
落珠崖瘴海清纶阁日长思校理暂将余力训诸生 右张孟功轺车已出瘴云深还抱除书向
海浚官有广文堂下马装无使者橐中金千年国史书奇节万里蛮荒入壮吟今日东归人共
美斑衣如绣照家林

右张翥仲举

贡玉堂中客梅花岭外游儒衣轻结束祖席且淹留古昔文为理诗书自一流明珠堪结佩白
璧可聯鉤飞动摧雷电微茫犯斗牛王杨端有体沈谢本相侔前辈嗟零落风骚道阻修千人
一入少十度九言休之子年方盛诗名孰与俦芳华红锦段尘土黑貂裘狗监无人荐鸡林有
价酬张骞回汉节王粲在荆州凤诏论功早皋比属望优番禺秦郡县泮水鲁公侯象迹烟中
堞鲸波雨外舟蕉花迷越徼柳色记卢沟诸老皆青眼横经尚黑头相思应有寄清絕变蛮讴
右王沂师鲁京国今多士君诗独有名才能诸老荐辞命远人惊陆贾惭分橐终军谢请纓一
官何足浼三命亦堪荣台阁专相待山川暂远行且令南海上文物变风声

右太原王守诚

君不见丹穴产凤雏五色不是凡禽状广文年少薄游吴一旦诗名动天上前年开诏赴交州
今年载书东海头仙人骑至渺何许归梦先落江南州树枝当窻灵鹊喜彩服趋拜庭闱里别
有佳期隔片云洞房月照潇湘水君歌有所思我歌远别离落花飞絮春去尽杯酒相送都门
时一官今热何足取文章自可名不朽沧波早掣钓鳌竿莫遣玉堂人待久 右安城刘闻霆西
江年少饶才俊跌荡京城名益振已知骐驎隘九州更看鸾凤起千仞行囊萧索无金璧?里携
将五色笔锦心绣腑自成文只借笔头轻写出吾闻缙绅传一首脍炙千人万人口铿鍠韵发
韶濩中浑噩义宗南雅後人人只解爱君诗我独多君智略奇一朝去作安南使慷慨万里宣
皇威看君专对真不辱朝廷益尊远人服陆贾掉舌能成功马援穷兵翻取讐十年白屋坐飘
零有志从知事竟成青毡坐上旧无物黄纸书中新有名春来夜雨江湖梦桃浪扁舟归兴动
蓊门垂柳柔堪折潞水飞花远相送蹇予京国尚蹉跎东南持宪故人多诸君爱士精衡监去
去知君入礼罗 右赵亭买得吴船便欲东更骑羸马别诸公文宗久许江西盛诗律非因海外
工人美义阳封介子客从泰時荐杨雄五羊城下南风起茉莉花开荔子红 右贡师泰上国邦

初造南交乱用餽包茅留不贡大钺往当戡自尔忠仍孝其民乐且湛皇风高邈邈紫海静滄滄癸酉年初改朝廷议所堪衆星皆拱北二使遽行南宝历天文簇丹书凤喙含年千时遇一下五上登三因极儒林索将同虎穴探惟才非久次其举不常参玉鴈湘灵瑟龙驹伯乐骖天香仙桂蜎水缕野桑蚕有士方穷讨多艰盖屡谖吴鉤俄有赠楚笠旧曾担暂食如瓜枣还持数寸柑往来非屑屑气宇正潭潭艺圃趋耘急文塲角战酣眼空窗外雪心入笥中蟬周礼方闻鲁王官已问郟高才传狗监奇字识龙龕文选精犹熟羲爻玩实耽草书怜竹滑爇火厌鱼□慷慨诗千首风流玉一簪干将无不合橄欖有余甘沃若轺车变坚乎衡木?马鸣风荐爽佩结蕙生葩节弭雕题楚文招秃鬢儋徘徊行石砦咨访过松庵砺齿囊中石清心海渚?英雄高自置勋业古犹贪兽闕扬眉入蛟宫抵掌谈酒行夷乐舞章就侍臣耽共识中原士争扳贵介驪陆装挥不顾廉水饮何惭毛遂盟终长常何赏合覃出门天正白渡海日初?雕矢摧犹羽鱼鞍败复鑕龙蛇三伏气烟雨九真岚纓垢江初濯衣轻火自燂已多行土辄何有颌珠搏入见臣容釐来前圣语谭使人皆赐紫奇士但衣蓝南海今遐远黎民本慙慙在庭方有望用子畏如惓谕蜀相如渴传经柱史?三鱣堂上集一丈席间函朝饮椰成盃秋吟荔满篮世方怜□裏人岂弃梗楠此别诗尤老何时酒正酖公卿多荐宠况有雪髭髥

右贺方伯更

忆昔始相见兹晨忽为别关河信郁紆归意不可辍屡有思亲念岂为捧檄悦京华春序逾高树森成列引领□犹深长歌浩难阕况之百越地礼义须贤哲追琢无奇工文采自昭晰伟哉三献姿美璞期终洁

朝饯京都门远望东南州南州本故乡道路长悠悠清飈振纖叶白日溢林丘念我意中人心迹咸光休充容郁深萃秉心慕前修恭承廊庙咨领教赴遐陬一维道理丧再拯风俗媮夙将周孔情岂效时所谋但期德日广别离焉足忧 右相人赵构德隆二首

春风本无方塲圃日已塞欲令桃李花根株何处植一朝仙期至去作海上客海上有菖蒲青节何历历食之满千日肌肤生五色烟霞忽然起变化成羽翼可以高飞翔风雨亦不隔云间衆仙人飘飘远相揖

右季序仲伦

扁舟乘兴欲还家分教宁辞瘴海涯未必杜陵成汨没由来贾谊擅才华红蕉遶屋含秋雾丹荔垂檐炫晓霞万里何堪慰离思好凭江驿寄梅花 右鄞俞述祖广州教授安南使只爱斑衣捧檄荣今日朝廷优爵赏当时才学动公卿题诗絶徼银盃入敷教炎荒木铎鸣漫笑归舟乖夙约都门折柳送君行 右危起与予俱客燕相逢间里间意气即相许然诺在一言南金非所重燕姬非所叹古称慷慨士捐躯赴人患自谓金石交从今至岁寒子忽远行役喟然伤肺肝

执手出都门长揖从此辞游子归远方壮士亦苦怀邓林非无木木恶不可栖冀北非无马马弩不可驰高天上无极浮云将何依日月苟不终重来以为期

右王武二首

贫贱苦离别君行在良辰去去何能留徘徊出城闥浮云蔽中野回风动飞尘俛仰重回顾执手含酸辛夙言远结交绸缪日相亲君今万里去欲去良无因

燕马纷北驰越鸟翩南翔良友不可别嘉会焉可常一日为九秋三岁悠且长相顾从此别对酒不能觴念子难久留愁思结中肠安得千里足相与俱腾骧

征车出都门良友独何之傍徨不能别攜手欲同归临河解两袂相顾各有期芳时不努力岁月日夜驰君亮怀至宝我独何能为 右丰城陈克生三首早并诸贤进大廷亲传天语下南溟龙符夜剖宫臣节驿骑秋回使者星尚念殊方无善俗聊从博士训遗经崖山四顾三千里共看儒衣听说铃

秋尽黄茅瘴雾收计程若合到交州天垂北极星文现地尽南图海气浮灵药漫从方士采明珠岂效贾人求临岐不作经年别有约看花上苑游

右藁城倪道原二首

十年文采动公卿京国蜚英里閤荣已向平原为上客更看湖学得先生芳茅压地蛇涎毒碧海潮天蜃气惊为想此身金玉重两司清誉雪霜明

右袁万里庆远

广州儒学东南冠才子文章天下传岂但门生如荐豆定知岛户尽输田山头麋鹿过堂下海上凤凰鸣日边对此题诗应百首蚤从梅驿寄长笺

右襄城杨士弘伯谦

傅与砺文集附錄